

## **Basef Amama Bu'wami Luk Nanda'ami**

### **Basef bandami Luk nanda'ami**

1:1-4 Basef Luk nanda'am mali'i

1:4-2:52 Jon napisi'as embeli nataga ea' Maria  
kola Jisas

3:1-20 Jon nandandomba eafa Jisas neafi'i

3:21-4:12 Jisas nofa' baptais ea', Satan nafi'i  
nagwambana ma neanda' waf aonai

4:13-9:50 Jisas nafe' etap hiagoma Galili  
nawalipasa basef bu'wami nanda' enis epes  
awes nanda'asi sataga bo'wes

9:51-19:27 Jisas nakwaha Galili na'i notanima  
nefe' Jerusalem nowalipasa basef Godi

19:28-23:56 Jisas nafe' Jerusalem nowalipasa  
basef bu'wami ea' agufumi manda'mana  
basef maundana lawag usi'inai tu'wanainai  
ma sohana neaga'

24:1-53 Jisas nahafel wapoti' nase'asa opeh  
alupumi ananimi

### *Basef amama Luk nanda'ami mafe'mago Tiofilus*

<sup>1</sup> O dembinai Tiofilus, fowa' amam hiami  
manda' basef hiami mail buk ma amamaga  
hiami God nanda'am mataga la'afena afa'i.

<sup>2</sup> Fowa' dambadamba Jisas nafela opeh nanda'am  
ea' amam dambadamba mali' mati amamaga  
amama naep amamumi dei' mawalipafa basef  
amama ea' afa' wanda'am mail buk. <sup>3</sup> Ae'

dambadamba ali' ahali' enisa basef amama afi'i afi'i dei' egawam andeande' si'i fowa' mataga, anom amam mihi'ambamam dei' ae' egawa basef amama ofagema. Amama atom dei' ae' elagen andeande'ma enda' anom basef mefe'mago ine', dembinai Tiofilus. <sup>4</sup> Anda'ama ine' neagawa andeande' basef amama ofagema esis sawalipanami endilisimi atom.

*Ensel na'ipa Sekaraia ma waulu'mana kola Jon*

<sup>5</sup> Nemaŋ anama anona king Herot dembinai gavamani numafi etap hiagoma Judia, anona aman pris nape, agilinama Sekaraia. Anan wambota Abiya, anan aman dembinai fowa'inai. Sekaraia waulu'mana Elisabet. Akwa'w kwataga wambota Aroni. <sup>6</sup> Esis bias Sakaraia Elisabet sape bo'wes ma naep Godi saila mi'uli ananinai hianai hi'alana. Ea' saila basef Godi andeande' basef ofagema a'as. <sup>7</sup> Ea' Elisabet asa'w ea' esis bias awasi a'as, ahages ea'.

<sup>8</sup> Nogota anama amam hiami wambota Sakaraia nemaf amamunai nataga ma meanda' maol Godi, ea' Sekaraia nawis ipat lu'unai Godi nanda' maol nondolalima God. <sup>9</sup> Amam maila waf amamunai mandandepana ma niowis ipat anama nomon nofa' amamaga amama nogoh alogw bu'wami ma'ami. <sup>10</sup> Nogota anama anan nawis naofa amamaga, esis amam nematawa hiesi sanda' lotuwi sandatama sape sanda' beten ande'.

<sup>11</sup> Ea' Sekaraia nati anona ensel dembinai Godi nataga naitu balata wa'ol lagel da'isinai. Balata anama amam pris mondolalima Goda amamaga amama alogw bu'wami ma'ami. <sup>12</sup> Ea' Sekaraia

natolona gegelalasang ombamahana nomonas matamea ma ensel anama. <sup>13</sup> Ea' ensel anama na'ipana na'ama na'i, "Sekaraia, ina umba mohana, owa'. God name'enama beten ine'inai ea'. Waulu'mina ine'ikwi Elisabet nambimb kola enin awani aman ine'inai. Ea' ine' nefalana agel ananinai Jon. <sup>14</sup> Okom ine'inai nambimb nope andeande' nendanifela awani inima. Ea' esis amam nematawa hiesi wapoti' sondanifa so'uso'uni inima netaga. <sup>15</sup> Dei' main, enin anona nemaf netaga dambeni nefa' agel lu'unai ma naep Dembinai. Enin ina nea' embel wainim moloma embel la'ifimi, owa'. Enin ata' nape opaf mama'wanai, Ambal Bu'unai Godi napaina si'ina nonda'ana la'ifina. <sup>16</sup> Anona nemaf enin netaga damben nomboma amam nematawa hiesi Israeli ma nefa'as sotanimani seafe'ma God Dembinai asasinai. <sup>17</sup> Enin nili' nefe'ma Dembinai nefa' pepel Godi ma neanda' maol ananinai si'i fowa' Elaija nofa'ana nanda'anai. Ea' nomboma opalef ahapasi mefe'ma awasi ma esis ukup mi'imi'ias. Ea' nomboma epes isima sosambala basef Godi ma sofa' nomonas bu'wami ma niegiambamas nonda'as sondandombam seapoma Dembinai neafi'i."

<sup>18</sup> Ea' Sekaraia nahali' ensel anama na'i, "Ae' atuwasi iti maina ikwafa eagawa basef amama meataga endilisi? Ae' hage'w." <sup>19</sup> Ea' ensel nagwamana basef na'i, "Ae' Gabriel, aitu naep Godi. Anan atona nasapa'e afi'i a'ipina basef amama bu'wami. <sup>20</sup> Ine' name'am etin, ine' owa' nembale'a basef ae'ami. Na'ama etin dei' malogel ine'inai nese'ena, ina nambimb ni'i, owa'etin.

Ea' nefe' nefe' neatagama amamaga amama ae' a'ipinami meatagamena. Basef amama ae'ami nambimb meataga na'ama etin anona nemaf God na'ianai.”

<sup>21</sup> Ea' esis amam nematawa hiesi sape sohafa Sekaraia ande' ukup matamea sa'i, “Main natagamana nape nogota laona ipat lu'unai Godi nomon?”

<sup>22</sup> Anan nawisi ande', ina na'i anom basefa esis, owa'. Na'ama esis sogawana sa'i anan nati anom amamaga mandati na'ami ipat lu'unai Godi nomon.

Ea' anan nape nanda'masa lagel atona na'ipasa amamaga, ea' malogel ananinai nase'ana nape.

<sup>23</sup> Maol Sakaraiai hi'alana, notanima nafe' wambel ananinai.

<sup>24</sup> Anan nape anom nimeguf, waulu'mana anani'wi Elisabet a' opafu'w. Ea' kwandambaho' etin kwape ipat aomb wanemb biamb kwa'i na'ama kwa'i, <sup>25</sup> “Dei' Dembinai okom na'ina'i ae' ma nagiambame na'ama. Fowa' ae' asawe, ambal ae'anai aona ma esis amam nematawa ea' dei' owa'etin.”

### *Anona ensel na'ipa Maria ma kola Jisas*

<sup>26</sup> Elisabet opafu'wa aomb wanemb biamb ea', dei' anona aon wapoti' wanemb wanemb. Dei' God nasapa' ensel anama Gebriel nafe' anona wambel Nasaret nape etap hiagoma Galili. <sup>27-28</sup> Wambel anama ano'w nemata'w awiawai'wi kwape, agel akwa'unai Maria. Ina dei' kwase' anona aman, ata' owa'. Dei' sandan-depa'wa kweaso' anona aman agilinama Josep. Anan nataga wambota anama akunamana king Deviti. Ea' ensel anama nafe'ma akwa'w na'i,

“Nemaf bu'wafi, nemata'w. Dembinai God okom na'ina'i ine' endilisi. Anan nofalo'mena nape nalomena la'ela'ef numafina.”

<sup>29</sup> Maria kwame' basef amama okom akwa'unai a'nimanina endilisi. Okom akwa'unai natanea na'i, “Basef amama ofagema mataga mi'imama?”

<sup>30</sup> Ea' ensel anama na'ipa'w na'i, “Maria, ina ombamohena, owa'. Okom Godi bo'onama ine'. <sup>31-32</sup> Ine' neme'. Nambimb ine' opafina nela enin awani aman. Ea' nenda'mana agel Jisas. Anona nemaf anan nope aman dembinai, sefela agel ananinai lu'una. Ea' sofala Anan nogalomanana God nape ilifi. Anona nemaf dembinai God nenda' awani inima nofa' agel lu'unai nepe dembinai king si'i fowa' gani Devit nape king. Devit anan wambota anama dei' awani inima neataganai. <sup>33</sup> Anona nemaf enin nepe dembinai king numafi epes hiesi Jekopi la'ela'ef. Enin etin nepe dembeni la'ela'ef ma amamaga hiami moloma epes ananisi.”

<sup>34</sup> Ea' Maria kwa'ipa ensel anama kwa'i, “Amama meataga mi'imama? Ae' ina dei' aso' anona aman, ata' owa'etin.” <sup>35</sup> Ea' ensel anama nagwama'wa basef na'i, “Ambal Bu'unai Godi nifi'mai ine', pepel God nape ilifi nose'alina. Ea' dei' awani inima nambimb nelani enin bo'wen. Ea' esis nambimb sefela agel ananinai lu'una sofalana si'i Anan Nogalomana Godi. <sup>36</sup> Neme', amani'mina ine'ikwi Elisabet akwa'w hage'w ea', dei' ea' opafu'w. Fowa' esis sa'i, ‘Akwa'w asa'w, ea' dei' akwa'w opafu'w aomb wanemb wanemb akwa'umi mafe' ea'. <sup>37</sup> Owa' anom amamaga ahifima God nonda'am, owa'etin.”

<sup>38</sup> Ea' Maria kwagwamana basef kwa'i, "Ae' ape anda' maol Dembinai. Ae' a'i Anan nonda'meam motaga si'i ine' na'i."

Ensel anama na'ipakw na'ama ma ea', nakwaho'w nafe'.

*Maria kwafe' kwati Elisabet*

<sup>39</sup> Nemaf anama Maria kohafel mehip kondondomba amamaga kondowasa' anona wambel nape halafutagw anona etap hiagoma Judia, <sup>40</sup> kwafe' kwawis ipat Sakaraiai kwanda'makwa nemaf bu'wafi Elisabet. <sup>41</sup> Elisabet kwame' Maria ata' kwanda'makwa gude etin, awani Elisabeti fete' etin nape opaf akwa'unai nomon. Ea' Ambal Bu'unai Godi si'inama akwa'w, <sup>42</sup> koga kwa'i mehip kwa'i, "God nofalo'mena nanda'ena nandanifel endilisi. Danifel ine'inai nikila' danifel anowa nematawa ofa'anai. Ea' awani inima nambimb nelan, enin wapoti' God nofalo'mana nonda'ana nondanifel. <sup>43</sup> Ae' gege-lalasowe ma God okom bo'oma ae' nanda'e endanifel ma nanda' ine' mama'wana Dembinai ae'anai nafi'mai ae'. <sup>44</sup> Neme', aligah ae'ami ata' mame' nemaf bu'wafi ine'inai atona, batawin nape opaf ae'anai nendanifel fete' etin nape. <sup>45</sup> Ine' nandanifel endilisi, nembale'efa basef Dembinai na'ipinami nambimb meataga na'ama etin si'i anan nali' na'ipina."

*Awaf Maria kwanda'anai*

<sup>46</sup> Ea' Maria kwanda' anona awaf kwa'i, "Ae' a'i basefa Anan Dembinai afela agel anan-inai lu'una. Okom ae'anai napoma basef amama,

<sup>47</sup> God nofa'e etanimani. Dei' andanifel ma anan.

- 48 Dei' main? Ae' nemata'w anda' maol Ananinai, ae' falafuwei, ea' anan okom napoma ae' nagiambame. Ipe' peme'. Dei' epe anona nemaf owagama wapoti' epes hiesi sigi' seatagai la'ela'ef sehafel seapani sofale si'i, 'Dembina God nagiambame nase'e dani-fel.'
- 49 Dei' main, God la'ifinai endilisi nanda'me amamaga pepel ma ae' eafela agel ananinai lu'una nape andeande' la'ela'ef.
- 50 Okom dahowinai ananinai nape la'ela'ef ma emi egafis umbamahasa sa'i sila Anan. Ea' nape la'ela'ef naloma epes isima sope na'ama etin dei' awasi bafasas ehasas anona nemaf seatagai.
- 51 Lagel ananinai nanda' amamaga la'ifimi. Ea' ukup asasimi ma'i esis etis sofa' agof lu'wami ea' nali'amonas safe' gani gani hiagoma.
- 52 Anan natalogofa amam king dambami ea' nafela agofa isima sape owina enis epes.
- 53 Anan nase'asa amamaga bu'wami ma isima nolomahasa waf bu'unai, ea' epes isima amamaga hiamisi, natofam mafe' etin.
- 54-55 Anan okom napoma basef na'aim ananinai endilisimi la'ela'ef mope owagama gani. Amama fowa' gani na'iam naloma bafapapa akupapa. Basef amama fowa' gani na'ipa Abraham naloma wambota ananinai owagama sigi' setagai. Ama anona nemaf neati esis uwahipisa niegiambamas la'ela'ef. Anan nagiambama ape' Israel manda' maol Ananinai."

<sup>56</sup> Maria kwape kwaloma Elisabet aomb wanemb, ea' kotanima kwafe' wambel akwa'unai.

*Elisabet kola Jon napisi'as embeli*

<sup>57</sup> Nemaŋ anama nataga ea' Elisabet kola so'uso'win aman. <sup>58</sup> Esiŋ wambel atona saloma esis wambota akwa'unai seme' baseŋ ma Dembinai nati owahipi'w endilisi ma kola awani inima. Ea' esis sandanifel saloma'w. <sup>59</sup> Nimeguf 7-peleim mafe' mali'mana ea', nemaŋ nafe'ma 8i, esis safi'i sa'i seatopa'mana alop ananinai, ea' sa'i sofalana agel Sekaraia si'i ahalomana. <sup>60</sup> Ea' mama'wana kwa'i, "Owa'. Ape' monda'mana anona agel Jon."

<sup>61</sup> Ea' esis sa'ipakw sa'i, "Owa', esis wambota ine'inai tagasi ina enis sanda' agel anama Jon, owa'etin."

<sup>62</sup> Ea' sanda' lagof atom sahali' ahalomana sa'i anan ni'i nonda'mana maina agel. <sup>63</sup> Ea' Anan nanda' logel atona na'ipas sofa'ai anota selet ma nonda' agel nogalomanai. Ea' nanda'ana na'i, "Agel ananinai Jon."

Ea' esis gegelalasis kwapete'. <sup>64</sup> Anan ata' nanda' agel etin, noga na'i malogel ananinai, afega ananinai neawi andeande', nandanifel nafela agel Godi lu'una. <sup>65</sup> Ea' esis hiesi wambel anama umbamahas. Ea' dei' amamaga amama gatom mafe' wambel hi'agoma nape halafu-tagw etap hi'agoma Judia. <sup>66</sup> Ea' amam nematawa hiesi same' basefa amamaga amama, ukup asasimi matamea mafe' sa'i, "Anona nemaŋ awani inima nepe ni'imama?"



Dei' main, esis sogawa pepel la'ifinai Dembinai nape nalomana.

*Basef Sakaraiai*

<sup>67</sup> Awani inima Jon ahalomana Sekaraia, Ambal Bu'unai Godi nape si'ina anan ea' nawalapa basef Godi si'i amam profet fowa' gani mawalipasam na'i,

<sup>68</sup> “Ae' a'i ape' mofela agel Godi Dembinai lu'una, God ape' Israeli. Anan nafi'i nagiambama ape' amam nematawa ananipai. Ea' natagahepa makwaha waf aonai ape' manda'anai.

<sup>69</sup> Ea' nandandepa anona aman la'ifinai nambimb nofa'apa nokwahamapa waf aonai meatanimani. Fowa' gani Devit nanda' opeh Godi, ea' dei' aman anama nofa'apa motanimani, anan akunamana Deviti.

<sup>70</sup> Basef amama si'i fowa' gani nawalapama amam profet bu'wami ananimi ma'iam malogof amamumi.

<sup>71</sup> Ma'i anona nemaf anan nofa'apa meatanimani mokwaha lagof esis naumbih ape'isi soloma epes isima ukup aom endilisi ma ape'i.

<sup>72</sup> Fowa' gani anan na'i anona nemaf nieti akusapa ape'isi fowa'isi uwahipis nigiangamas. Ea' anan okom nopoma basef bu'wami fowa' gani na'iam endilisi mope owagama gani.

<sup>73</sup> Anan na'i basef amama endilisimi atom na'iam la'ifimi gani ilif naloma akunamapa ape'inai Abraham.

- 74 Ma anan na'i notagahepa ma lagof esis naumbih ape'isi ma meanda'mana opeh ananiami, ina umbamohapa, owa'.
- 75 Anan na'i basef amama ma ape' mope etap anae' monda' opeh ananiami nimeguf hiami danda mefe' mefe' meatagama meaga'. Ma naep ananiami monda' opeh amama ma waf ananinai bu'unai andeande'.
- 76 Ea' ine', awani ae'inai, basef ine'imi amama. Anona nemaf sofalena profet nanda' opeha God pepel hianainai. Dei' main, nambimb ine' nefe' nili'ma Dembinai nenda'mana eaf ananinai.
- 77 Ama neawalipa amam nematawa ananisi sea-gawa anan nefa'as seatanimani. Ama neakwaha waf aonai asasinai.
- 78 God ape'inai nati esis uwahipis endilisi dei' nakwahamasa waf aonai asasinai. Anan nambimb nosapa'i howalagon mape heveni mifi'mai ape' molomapa mope la'ela'ef. <sup>79</sup> Ama howalama epes sape akoti, ea' isima ga' na'i neatagamasi. Ama nenindina ape' ma meape eaf opalef awanami.”
- 80 Anom nimeguf mafe' ea', awani inima nataga damben la'ifina ea' okom ananinai negawa. Anan nape etap wafiguma epes a'agoma nape nape ma nemaf anama nataga nandawalap alihinama naep esis Israeli.

*Maria kola Jisas  
(Mt 1:18-25)*

<sup>1</sup> Anona nemaf anona aman gavman dembinai esis Romi Sisar Ogastus nape, nanda' anona mi'uli gavmani na'ama. Anan na'i nofa' agofa esis amam nematawa hiesi sape etap hiagoma esis Rom sumafiagoma mil buk gavmani. <sup>2</sup> Nemaf anama dambadamba anan nali' nofa' agof. Nemaf anama anona aman Kwirinius nape gavman dembinai ma etap hiagoma Siria. <sup>3</sup> Ea' amam nematawa hiesi safe' wambel ofagama asasima ma sonda' agof asasimi. <sup>4</sup> Josep anan aman wambota Deviti. Ea' nakwaha Nasaret nape etap hiagoma Galili, nondowasa' nafe' wambel Deviti Betlehem. Wambel anama nape etap hiagoma Judia. <sup>5</sup> Ea' Josep nafe' naloma ano'w nemata'w Maria, esis sandandepana'w sa'i nese'akw ma esis bias sonda' agof asasimi. Ea' akwa'w opafu'w. <sup>6</sup> Esis bias ata' sapani etin wambel Betlehem, nemaf akwa'w kolanefi a' nataga. <sup>7</sup> Ea' kwali' kola awani aman ako'uni nali'i. Ipat sa'ohanai asi'ina. Ea' dei' kowa'ana lowaf kwalana nomon bokis gwa'aimi bulmakauwi malama.

*Amam ensel ma'ipa amam mumafi sipsipi*

<sup>8</sup> Felefele'ma wambel anama anom amam mumafi sipsipi mape wa'ol mumafi sipsip mape owamb. <sup>9</sup> Ea' anona ensel nafi'i nalumai howalogon Dembinai, howalama amam ea' umbamaham endilisi. <sup>10</sup> Ea' ensel anama na'ipam na'i, "Ipe' ina umbamohepa, owa'. Peme', ae' ifa'mipei basef bu'wami ipe', amama monda' amam nematawa hiesi hi'ilas sondanifal endilisi.

11 Dei' nemaf anae' ano'w nemata'w kwape Betlehem wambel Deviti kola enin awani aman. Anan aman anama nokwahomepa waf aonai nofa'epa peatanimani. Anan Krai, God nandandepana nasapa'ana nafi'i, anan Dembinai. 12 Ipe' pefe' piti awani inima pegawan na'ama. Piti sanda' lowaf so'unai sowa'ana salana na'oh bokis isima sala gwa'aimi bulmakauwi malami.”

13 Ensel anama na'ias na'ama ma ea', mehip anom ensel hiami si'i ami misila'i gani heven mataga maloma ensel anama ea' mandagala mafela agel Godi ma'i,

14 “Ape' mafela agel God nape gani ilif endilisi lu'una. Pepel howalogon ananinai atona. Ea' epes emi sape etapi God okom bo'ona ma esis, opalef asasimi mope awanem.”

### *Amam mumafi sipsipi mafe' mati Jisas*

15 Ea' amam ensel makwaha amam mumafi sipsipi motanima malata heven. Ea' amam mumafi sipsipi manda'ipama etin ma'i, “Wale, ata' ofe' Betlehem uti amamaga anama Dembinai nihi'ambafami.”

16 Ea' mohafel mehip mafe' mati Maria kwaloma Josep sape. Awani salana na'oh bokis nomon sala gwa'aimi bulmakauwi malami.

17 Amam matolona ea' mawalapa basef ensel na'ipamami ma awani inima. 18 Ea' amam nematawa same' basef amama amam ma'iami, esis hiesi same' basef amama gegelalasis ea' nomonas matamea. 19 Ea' Maria kwame' basef amama hiami okokomam mape okom akwa'unai.

20 Ea' amam amama motanima mafe' mafela agel Godi lu'una ma'i anan dembinai bu'unai. Amam

mandanifela amamaga amama hiami mame'am matulumi mataga si'i ensel na'ipamami.

*Esis sanda'mana agel Jisas*

<sup>21</sup> Nemaŋ nafe'ma 8i nataga, nemaŋ anama amam ma'i motopa'mana alop awani. Ea' matopa'mana alop awani inima amani. Ea' sofalana agel Jisas si'i ensel nali' na'ipakwanai nogota anama owa' ata' kofa' opaf.

*Simeon naloma Ana sati Jisas ipat lu'unai Godi nomon*

<sup>22</sup> Nemaŋ anama nataga ea' ma esis sonda' awani inima noloma mama'wana sondolali sonda' ofa setaga bo'wes si'i basef mail mi'uli anama fowa' God naso' Mosesanai na'iam. Ea' esis mamasana sao'wana safe' sondowasa' Jerusalema sose'ana awani inima Dembinai Goda naep ananiami. <sup>23</sup> Esis sanda'am na'ama si'i basef mape buk Baibeli ma'iamami mi'uli Dembinai ma'i, "Awasi amam wali' dambadamba olami, amama ipe' pefalam pi'i amam dembinai Godi atom."

<sup>24</sup> Ea' bias sa'i sondolalima God sila basef mail mi'uli anama Dembinai fowa' gani na'ipa Moses na'i, "Esis bias sofa' amiguf mai'unamb biam, o sofa' ambegof sa'umi biam."

Ea' sefa'am sanda'am na'ama.

<sup>25-26</sup> Ea' anona aman nape Jerusalemi agilinama Simeon. Anan naila waf bu'unai Godi andeande'. Anan nape nahafa nogota anama God nifi'i nigiangbama esis Israel nokwaha waf aonai esis sanda'anai. Ea' ambal bu'unai Godi nape okom ananinai nihi'ambana anan ina nambimb

noga' ulal, owa'. Anan ata' nepe niti Kraisi, Dembinai nandandepana nosapa'ana nafi'i. <sup>27</sup> Ambal Bu'unai Godi nafelana nafe' nawis ipat lu'unai Godi. Ea' esis mamasana Jisasi sao'wana safi'i sandolalimana si'i mi'uli Godi na'iam. <sup>28</sup> Ea' sanda'am etin, Simeon nandalombasana lagof ananiami nanifela God nafela agel ananinai lu'una na'iam na'ama na'i,

<sup>29</sup> “Dembinai, nahapila pepel hianai ae' anda' opeha ine'. Dei' ine' nenda' opaf ae'anai nupe awanena ea' ega' efo'o si'i basef endilisi atomi fowa' gani na'iami.

<sup>30</sup> Naep ae'ami atilin ea' awani aman inima ine' nasapa'ana nafi'i nofa'apa meatanimani. Na'ama dei' ine' nekwaha ae' ega' efo'o.

<sup>31</sup> Ine' nanda' awani inima natagama amam nematawa hiesi satolona ea'.

<sup>32</sup> So'uso'win inima si'i anona howalagon howalama epes isima sololama Godi nihi'ambas. Ama nonda' amam nematawa ine'isi Israel sofa' agof lu'wami.”

<sup>33</sup> Ea' mamasana Jisasi gegelalasis ukup asasimi matamea ma basef amama Simeon na'iami. <sup>34</sup> Ea' Simeon na'ipasa basef bu'wami nanda'as la'ifis ea' na'ipa mama'wana Jisasi na'ama na'i, “Ine' neme'. Awani inima God nandandepan ea' ma nahambombaga enis amam nematawa Israel sowa' alafugaha enini. Ea' enis epes nofa'as sokwaha waf aonai siefi'mai enin. Enin si'i anona ikwaf God nanda'anai ma enis epes hiesi sosambala basef ananiami sondaiwa'mana. <sup>35</sup> Awani inima napoma newalapa nomonas hiami mape mandambahi'i

motaga alihim. Maria, ine' nambimb okom nimanina si'i anona bainat hi'alina notopa' okom ine'inai.”

<sup>36</sup> Ea' ano'w nemata'w profet agili'wa Ana kwape kwalomas. Ahaloma'w ako'unai Fanuel. Wambota lu'unai akunama'wi Asa. Akwa'w ahage'w endilisi. Fowa' kwase' aman kwalomana sape afagof 7-peleim. <sup>37</sup> Ea' waulunama'w naga'. Ea' kwape etin, kwafe' kwafe' dei' afagof akwa'umi mataga 84-peleim. Akwa'w ina kwakwaha ipat lu'unai Godi anom nimeguf, owa'etin. Akwa'w kololama gwa'aimi kwape kwanda' beten ea' kwanda' lotu kwahapila opeh Godi kwanda'am kwafe' owamb alip. <sup>38</sup> Nema anama dei' atef akwa'w kwafi' anama Simeon naloma Josep Maria saituma kwanifela God. Enis wapoti' saitu na'ama sape sehafa nema anama nambimb God nigiambama esis sape Jerusalemi nofa'as setanimani seape wafifis. Ea' akwa'w wapoti' kwa'ipasa basefa so'uso'win inima.

### *Josep nao'was satanima safe' Nasaret*

<sup>39</sup> Esi Josep naloma Maria sanda'am sailam ea' opeh ahalomana si'i Dembinai fowa' gani na'iama mi'uli ananinai ea' satanima safe' Nasaret asasima ofagama etap hiagoma Galili. <sup>40</sup> Ea' so'usowin Jisas nataga dambena la'ifina ma gawa hianai. Ea' God okom nainailana nagiambamana etin nanda'ana la'ifina.

### *Jisas ata' sa'ona nape ipat lu'unai Godi*

<sup>41</sup> Afagof danda mamasana Jisasi sondowasa' safe' Jerusalema sanda' gwa'aimi lu'wami so-falam sa'i Pasova. <sup>42</sup> Afagof Jisasi dei' mataga

12-peleim mahape'ana ea' sao'wana sondowasa' Jerusalem saila waf asasinai si'i afagof danda sanda'anai. <sup>43</sup> Ama nimeguf amama Paso-vaimi hi'alam, esis mamasana satanima safe'. Ea' sa'usa'win ina nafe' nalomas, owa'. Sak-wahona napani Jerusalem. Esis ina sagawa anan napani, owa'. <sup>44</sup> Sa'i nali' nafe' naloma enis epes safe'. Esis safe' anona nemaf si'ina hi'alana, ea' sagolopana la'afena esis wambota atona saloma esis alupisi. <sup>45</sup> Esis mamasana sagolopana sati owa'etin, ea' satanima safe' Jerusalem sagolopana. <sup>46</sup> Esis bias sagolopana safe' nimeguf wanom. Ea' satolona nape nomon ipat lu'unai Godi. Anan nape naloma amam Juda gawaimi mawalipasa mi'uli Godi. Nape nagehembema basef amomumi ea' nahali' amam. <sup>47</sup> Amam dambami maloma esis hiesi same' basef ananimi, gegelalasoma basef maloma gawa ananinai nagwamama basef amam. <sup>48</sup> Ea' mamasana satolona nape la'afena amam dembemi nalomam mape ea' gegelalasam kwapete'.

Ea' mama'wana kwa'ipana kwa'i, "Nogalome, dei' maina ine' nanda' na'ama ma afa'? Ahalomena naloma ae' opalef afa'imi nimanim endilisi ma wagolopena."

<sup>49</sup> Ea' anan nagwamas na'ipas na'i, "Dei' maina ipe' bipa pagolope pafe' hi'alagon? Ae' dei' ape anda' opeh ipat Ahalome Godi, amama ipe' pegawam o owa'?"

<sup>50</sup> Ea' esis ina sogawa basef anan na'ipasami ofagema, owa'.

<sup>51</sup> Ea' Jisas nafe' naloma esis bias safe' Nasaret, name' esis naila abasef asasimi nimeguf hiami.



Ea' mama'wana anani'wi okom napoma basef hi-ami ma amamaga amama matagama sa'usa'win akwa'uni nape okom akwa'unai. <sup>52</sup> Jisas ea' nataga dambena. Ea' gawa ananinai nataga lu'una andeande' bo'ona, ea' God naloma epes wapoti' satolona ambo'ona endilisi.

### 3

*Jon napisi'as embeli nandondomba eaf Jisasi  
(Mt 3:1-12; Mk 1:2-8; Jo 1:19-28)*

<sup>1</sup> Anona afagel anona gavman dembinai esis Romi Taiberius Sisar nape dembinai ma etap hiagoma esis Romi afagof 14-peleim hi'alama anona afagel wapoti', nafe'ma 15-peleim, Pontius Pailat ata' nape dembinai gavmana etap hiagoma Ituria naloma Trakonitis wambel hiagoma Herot ata' nape dembinai numafi wambel hianai etap hiagoma Galili. Ea' Lisantias nape dembinai gavman numafi wambel hiagoma etap hiagoma Abilene. <sup>2</sup> Ea' afagel anama atona Anas naloma Kaiafas amam biam pris dambami mape mali'ma pris hiami. Nogota anama ma afagel anama basef Godi mafi'mai Jon, Sekaraia nogalomana nape anona etap wafiguma fatauguma. <sup>3</sup> Ea' nafe' anama hiagoma walemb Jordan na'ipasa basef Godi amam nematawa. Na'ipasa somboma opalef sowa' alafugaha waf aonai sofa' baptais ma God nokwahomasa waf aonai esis sanda'anai. <sup>4</sup> Anon nawalapa basef amama Godi si'i profet Aisaia fowa' gani nawalapam nanda'am mail buk Baibeli ma'i,

“Anona etap wafiguma fatauguma, malogel anona amani anona nemaf noga ni'i, 'Pondondomba eaf Dembinai, penda' ana nefe' usi'ina.

<sup>5</sup> Pewam gambiwah asiasinuguma ma si'igin dondo' etin, petopa' halalef laumi bandami hiami ma mowala dondo'am. Dilindila'ma penda'agon usi'igin. Ea' ufiawa amama manda' lotasila'ma sonda'am andeande'.

<sup>6</sup> Ea' amam nematawa hiesi hi'ilas anona nemaf siti God nagiambama enis amam nematawa nofa'as sotanimani.' ”

<sup>7</sup> Hiesi amam nematawa safi'mai Jon ama sa'i nupisi'as embel. Ea' na'ipas na'i, “Ipe' panda' waf aonai, si'i awasi iguf awami molaipei. Emi na'ipipa ma pa'i pefa' pefe' pindihi'ama okom wandafunai Godi anona nemaf na'i neatagama ipe'i? <sup>8</sup> Ea' dei' a'ipipa. Penda' waf bu'unai ma pih'i'ambas ipe' pamboma opalef endilisi paila waf bu'unai. Ipe' ina ukup mondanda' mi'i, 'Abraham anan ahalomapa ape'inai', owa', hapaimi. Ae' a'ipipa endilisi, God anan la'ifinai ma nonda' otamba amama motaga epes si'i awasi Abrahami. <sup>9</sup> Tamia'w nandandombol na'oh neatopa' lawah ofagem nombalefima. Maim lawah owa' mil mola su'utip bu'wami, amama anona nemaf solam sokwahom mefe'ma nif.”

<sup>10</sup> Anan na'iam ea', esis hiesi sahali'ana sa'i, “Ape' nambimb monda' main?”

<sup>11</sup> Ea' Jon na'ipas na'ama na'i, “Emi epen siaogw biam atumi nese'anana anona enin siot a'ani, ea' emi gwa'aimi ma'omani inima nenda'am newalogam wapoti'.”

12 Ea' anom amam mofa' takisi mafi'mai Jon ma'li nupisi'am embel ea' mahali'ana ma'i, "Dembinai, nambimb afa' onda' main?"

13 Ea' anan na'ipam na'i, "Ipe' pefa' otamba mondahama si'i gavman na'ipipam. Ipe' ina pefa' anom wapoti', owa'."

14 Ea' anom soldia mafi'i mahali'ana ma'i, "Afa' nambimb onda' main?"

Anan nagwamam na'ipam na'i, "Ipe' ina pembaso'ma epes piumbelis penda'as umbamohas penda'mas basef pelela'epasa moni asasinai, owa'. Ea' opalef ipe'imi mope awanema otamba ipe'imi dondo'ma ikwaf amam dambami mandandepami."

15 Ea' dei' nomonas esis amam nematawai hiesi mohafel la'ifim, ea' ukup mandanda'ma Jon sa'i, "Jon anan Kraiss, ma'una God nandandepana nasapa'ana nafi'i?"

16 Ea' Jon nagwamasa basef na'ipas na'i, "Ae' apisi'ipa embel atom. Ea' anona aman nambimb niefi'i, anan la'ifinai nikila' ae'. Ae' ina aman bu'uwei ma eatagaha mandelefa su ananimi, owa'etin. Nambimb anan nese'epa Ambal Bu'unai Godi nope opalef ipe'imi nomon ea' nese'epa nif wapoti'. 17 Anan nahapila anona savol lagof ananimi ma niesimba wit si'i rais amama nisimba'am andeande'. Nefa' wit bu'unai nuwis nembe'am ipat ananinai. Ea' tukwawanimi awami nembefam nofam nif amama lu'wami fandom la'ela'ef mapani."

18 Ea' Jon nawalapa anom basef hiami wapoti' ma neafela ukup asasimi ma sonda' waf bu'unai. Ea' nawalipasa basef bu'wami Godi.

*Herot nanda' kalabusima Jon*

<sup>19</sup> Ea' Jon na'ipana basef la'ifimi aman anama Herot, gavman dembinai asasinai, ma waf aonai hianai anan nanda'anai. Anan nandalombana Herodias nemata'w sahalomana nase'akwi, ea' nanda' waf aonai hianai wapoti'. <sup>20</sup> Dei' nowatani anona waf aonai wapoti' ma nanda' Jon nanda' kalabus.

*Jon napisi' Jisas embel*  
(Mt 3:13-17; Mk 1:9-11)

<sup>21</sup> Jon napisi'a amam nematawa hiesi ma ea', napisi' Jisas wapoti'. Jisas nofa' baptais ea', anan ata' nanda' beten etin ea', heven uta nandausi'. <sup>22</sup> Ea' Ambal Bu'unai Godi nisila'i si'i amil mai'una nufia' nisilamanai. Ea' anona malogel na'i natagai heven ilif na'i anom basef na'i, "Ine' Nogalome ae'inai. Ae' okom nohafel nainailina endilisi. Okom ae'inai bo'ona ma ine'."

*Agofa epes hiesi bafapana Jisasi*  
(Mt 1:1-17)

<sup>23</sup> Nema'f anama Jisas nasefela opeh nanda'am, afagof ananimi mataga felefele'ma 30-peleim. Esis amam nematawa ukup mandanda' etin ma'i anan nogalomana Josepi. <sup>24</sup> Bafapana Jisasi agufuma amama. Josep, anan Heli nogalomana. Ea' Heli, Matat nogalomana. Ea' Matat, Livai nogalomana. Livai, Melki nogalomana. Melki, Janai nogalomana. Ea' Janai, Josep nogalomana. <sup>25</sup> Josep, Matatias nogalomana. Matatias, Emon nogalomana. Emon, Nahum nogalomana. Ea' Nahum, Esli nogalomana. Ea' Esli, Nagai nogalomana. <sup>26</sup> Nagai, Mat nogalomana. Mat, Matatias

nogalomana. Ea' Matatias, Semen nogalomana. Ea' Semen, Josek nogalomana. Josek, Joda nogalomana. <sup>27</sup> Joda, Joanan nogalomana. Joanan, Resa nogalomana. Resa, Serubabel nogalomana. Serubabel, Sealtiel nogalomana. Sealtiel, Neri nogalomana. <sup>28</sup> Neri, Melki nogalomana. Melki, Adi nogalomana. Adi, Kosam nogalomana. Kosam, Elmadam nogalomana. Elmadam, Er nogalomana. <sup>29</sup> Er, Josua nogalomana. Ea' Josua, Elieser nogalomana. Ea' Elieser, Jehoram nogalomana. Jehoram, Matat nogalomana. Ea' Matat, Livai nogalomana. <sup>30</sup> Livai, Simeon nogalomana. Ea' Simeon, Juda nogalomana. Juda, Josep nogalomana. Ea' Josep, Jonam nogalomana. Jonam, Eliakim nogalomana. <sup>31</sup> Eliakim, Melea nogalomana. Melea, Mena nogalomana. Mena, Matata nogalomana. Matata, Natan nogalomana. Natan, Devit nogalomana. <sup>32</sup> Devit, Jesi nogalomana. Jesi, Obet nogalomana. Obet, Boas nogalomana. Boas, Salmon nogalomana. Salmon, Nason nogalomana. <sup>33</sup> Nason, Aminadap nogalomana. Aminadap, anan Atmin nogalomana. Atmin, Arni nogalomana. Arni anan Hesron nogalomana. Hesron, Peres nogalomana. Peres, Juda nogalomana. <sup>34</sup> Ea' Juda anan Jekop nogalomana. Jekop anan Aisak nogalomana. Aisak, Abraham nogalomana. Abraham, Tera nogalomana. Tera, Nahor nogalomana. <sup>35</sup> Nahor, Seruk nogalomana. Seruk, Reu nogalomana. Reu, Pelek nogalomana. Pelek, Eber nogalomana. Eber anan Sela nogalomana. <sup>36</sup> Sela anan Kenan nogalomana. Kenan, Arpaksat nogalomana. Arpaksat, Siem

nogalomana. Siem, Noa nogalomana. Noa, Lamek nogalomana. <sup>37</sup> Lamek, Metusela nogalomana. Ea' Metusela, Enok nogalomana. Enok, Jaret nogalomana. Jaret, Mahalalel nogalomana. Mahalalel, Kenan nogalomana. <sup>38</sup> Kenan, Enos nogalomana. Enos, Set nogalomana. Set, Adam nogalomana. Adam, God nogalomana. Bafapana Jisasi ea' ma'um.

## 4

*Satan nagwamba Jisas anona etap wafiguma fatauguma epes a'agoma*

*(Mt 4:1-11; Mk 1:12-13)*

<sup>1</sup> Ambal Bu'unai Godi nape si'inama Jisas ea' nakwaha walemb anama Jordan nandegiai natanima nafe'. Ea' Ambal Bu'unai Godi nofa'ana nafe' anona etap wafiguma fatauguma epes a'agoma. <sup>2</sup> Jisas nape anama nimeguf hiami ea' Satan nafi'i nagwambana aon si'inai tu'waninai. Jisas ina na' gwa'aimi, owa'. Nolomahana.

<sup>3</sup> Ea' Satan na'ipana na'i, "Ine' na'i ine' Nogalomana Godi, dei' kipa owap anama na'oh etapi notaga si'i bret."

<sup>4</sup> Ea' Jisas nagwamana basef na'ipana na'i, "Baibel na'i bret atona ina nose'asa ambagof namumi epes, owa'."

<sup>5</sup> Ea' Satan nao'wana mafe' anona halaf launai endilisi nihi'ambana amamaga hiami bu'wami mape etap hiagoma maloma amam nematawa. Nihi'ambana la'ifina mehipe tin. <sup>6</sup> Ea' na'ipana na'i, "Amamaga hiami pepel amama amam king hi'alam mumafiami maloma epes hiesi agel

lu'unai, amamaga bu'wami hiahaom maim, amamaga amama hiami God nase'eami ae'ami. Ea' dei' i'i ese'anam enin epen, ae' ese'anam. <sup>7</sup> I'i ine' nindiwa nembawa netawa nenda' lotu ma ae', amamaga amama ine'imi atom."

<sup>8</sup> Ea' Jisas nagwamana basef na'ipana na'i, "Baibel na'iam na'ama na'i, 'Ipe' penda' lotuma Dembinai God ipe'inai atona, ea' penda' opeh ananiami atom.' "

<sup>9</sup> Ea' Satan nao'wana nondowasa' Jerusalem nahaponana naitu ipat Godi lu'unai sanda' lotuwanai ilif.

Ea' Satan na'ipana na'i, "Ine' na'i ine' Noga-lomana Godi, dei' netoma nukupa' newa etap. <sup>10-11</sup> Dei' main, anom basef Godi mail buk Baibeli ma'i na'ama ma'i, 'God ni'ipa amam ensel Ananiami mifi'i muhapilina lagof amamumi mumafina ma otamba ina moha bo'wagah ine'imi, owa'.' "

<sup>12</sup> Ea' Jisas nagwamana basef na'i, "Anom basef Godi wapoti' mape na'ama ma'i, 'Ipe' ina pegwamba Dembinai God ipe'inai nonda' waf aonai, owa'.' "

<sup>13</sup> Satan nagwambana ma ea', nakwaha Jisas nafe' nohafana ma anona nemaf nifi'i neagwambana wapoti'.

*Jisas nafela maol nanda'ana gani etap hiagoma Galili*

*(Mt 4:12-17; Mk 1:14-15)*

<sup>14</sup> Pepel Ambal Bu'unai Godi nape opaf Jisasi ea' natanima nafe' etap hiagoma Galili. Ea' same' basef gato mafe' anan mafe'agon hi'alagon

wambel hiagoma Galili. <sup>15</sup> Anan nawalipasa basef Godi ifagw esis Juda sa'i basef sapeimi. Ea' amam nematawa hiesi safela agel ananinai lu'una.

*Esis Nasaret sase'ana alafugaha Jisas  
(Mt 13:53-58; Mk 6:1-6)*

<sup>16</sup> Ea' Jisas nafe' Nasaret taun anama ofagama, fowa' anan ata' so'uso'win napoma.

Nape ea' nemaf anama Sabat esis Juda sapoma noma'wanai, nafe' nawis ipat esis Juda sa'i basef sapeinai si'i la'ela'ef nanda'am. Anan naitu natalifa basef Godi, ea' sase'ana anona pepa lounai. <sup>17</sup> Pepa anama anom basef Godi fowa' gani profet Aisaia nanda'am mailanai. Anan naofa pepa anama nati anom basef natalifam ma'i na'ama ma'i,

<sup>18</sup> “Ambal bu'unai Dembinai nape ae'. Ea' nandandepe ma eawalapa basef bu'wami ma epes isima kwahusi amamaga a'ami. Nasapa'e afi'i ma ewalapa basef na'ama i'i, 'Ipe' panda' kalabusi pekwaha kalabus pefe' wafifipa. Ipe' epes naep masi'ipei, ipe' piti andeande' wapoti'. Anan nasapa'e afi'i iegiangbama isima sofa' niman-imi seape andeande'. <sup>19</sup> Ea' il'ipasa basef hiesi ma nogota anama bu'unai ma Dembinai niti uwahipis nigiangbamas seape andeande'.”

<sup>20</sup> Ea' Jisas nambomefa pepa anama nase'anana anona aman numafi ipati ea' anan nape. Ea' amam nematawa hiesi sape nomoni sati anan atona. <sup>21</sup> Ea' na'ipas na'i, “Ipe' pame'



ae' atalifa basef Godi fowa'imi etin ea', dei mataga alihim endilisi mandawalapa ae'."

22 \*Ea' esis hiesi safela agel ananinai lu'una sa'i anan aman bu'unai ea' gegelalasisa basef bu'wami mataga malogel ananinai. Ea' esis sandahali'ma sa'i, "Aman anama Josep nogalomanana?"

23 \*Ea' Jisas na'ipas na'ama na'i, "Endilisi etis ipe' nambimb penda' basef amama womun etina ae' pi'i, 'Dokta, ine' nenda' alop ine'inai notaga bo'ona nili', ea' pi'i wapoti' pi'i waf anama nali' nanda'ana Kaperneam, anama ape' mame'ana ea'. Ine' dei' nenda'ana notaga na'ae wambel ofagama ine'ima.' "

24 \*Ea' anan na'iam na'ama wapoti' na'i, "Ae' a'ipipa endilisi! Anona profet epes ina sase'ana opalef same' basef ananiami wambel ofagama ananima, owa'. 25 \*Ae' a'ipipa endilisi. Nogota anama fowa' gani Elaija napenai owaf atona naluwi, asaf ina ata' nalai afagof wanom aomb wanemb wanemb, owa'etin. Ea' nolomahas lu'unai nataga ganima hiagoma. Nogota anama nematawa hiawai Israeliwai amam maga' mi-alifawa wapen. 26 \*Ea' God ina nasapa' Elaija nafe'ma anowa awamai, owa'etin. Anan nasapa'ana nafe'ma ano'w nemata'w kwape Serafat, wambel nape anona etap lu'wagoma Saidon. Ea' akwama ato'w. 27 \*Ea' nogota anama anona awes

---

\* 4:22: Lu 3:23; Jo 6:42    \* 4:23: Mt 4:13; Jo 2:12    \* 4:24: Jo 4:44  
 \* 4:25: 1 Kin 17:1,7; 1 Kin 18:1    \* 4:26: 1 Kin 17:8-16  
 \* 4:27: 2 Kin 5:1,14

aonai\* nataga nanda' alop esis amam nematawa Israeli alop pambo'. Ea' ina enin epen asasini nataga bo'wen, owa'etin. Anona aman Naman Siriainai ea' anan atona nataga bo'ona.”

<sup>28</sup> Ea' esis hiesi sape ipat anama same' basef amama, nomonas wandafum kwapete'a Jisas. <sup>29</sup> Ea' sohafel sagalo'mana nawisi taun ande'. Taun anama asasinai natoma halafuta ilif. Ea' sofa'ana safe' halafuta anama sa'i sogwale'ana nowala tata. <sup>30</sup> Ea' anan nisila' esis hiesi nafe'.

*Jisas natofa ambagof awami mape anona amani ambo'ona*  
(Mk 1:21-28)

<sup>31</sup> Ea' Jisas niliana Kaperneam anona taun nape etap hiagoma Galili. Anan nape ea' nemaf anama Juda sapoma noma'wanai sa'i Sabat, anan nawis nomon ipat esis Juda sa'i basef sapeinai nawali-pasa basef Godi. <sup>32</sup> Same'ana sa'i anan nofa' agel lu'unai dei' na'ipasa basef la'ifimi. Ea' sohafel gegelalasis kwapete'as endilisi. <sup>33</sup> Anona aman ambafuh manda'anai nape ipat anama, ambal aonai napaina. Anan na'i mehip endilisi na'iam na'i, <sup>34</sup> “E! Jisas ine' Nasaretinai, na'i nifi'i nenda' maina ape'? Ine' nafi'i ma nehambombagapa? Ae' egawa ine' nogalomana God bu'winai ande-ande'.”

<sup>35</sup> Ea' Jisas ninifalona na'ama na'i, “Ine' aonai awinai sopama malogel kwaha aman anama.”

---

\* 4:27: Awes anama Tok Pisin sa'i sik lepra, basef amama ina ma'i awes anama ape' ma'i awes lepai, owa'. Basef amama ofagema ma'i anona awes dei' alop nambo' hi'alana.

Ea' ambalip anama nakwahona nowa etap la'afena esis hiesi nawisi nafe', ina ata' nahambombagana wapoti', owa'etin.

<sup>36</sup> Esis hiesi gegelalasis sandakoto'ma sanda'ipama sa'i, "Amama maim basef? Anan natofa ambagof awami na'ipam si'i anona aman la'ifinai nofa' agel lu'unai. Ambagof awami mame' basefa anan, makwahona mafa' mafe'."

<sup>37</sup> Ea' basef amama nanda' amamaga amama la'ifimi mafe'agon hi'alagon wambel nape felefele'i.

*Jisas nanda' Saimon Pita nandagi'mokwi ambo'okw*

*(Mt 8:14-15; Mk 1:29-31)*

<sup>38</sup> Saimon nandagi'mokwi awesi'w alop ako'unai nifina kwapete'. Ea' Jisas nohafel nakwaha ipat anama sanda' kolasanai, nafe' nawis ipat Saimoni. Ea' sahali'ana ma niegiambama'w. <sup>39</sup> Ea' anan nafe' naitu felefele'ma akwa'w natofa awes anama nafe' nakwaha akwa'w. Ea' kohafel mehhip kwanda'masa gwa'aimi esis.

*Jisas nanda' amam nematawa hiesi sataga bo'wes*

*(Mt 8:16-17; Mk 1:32-34)*

<sup>40</sup> Aon newala naso', esis amam nematawa sofa'ai enis awes naninani nanda'asi sofa'as safi'mai Jisas. Ea' nasa lagofas atona etin nanda'as bo'wes hi'alas. <sup>41</sup> Ea' ambagof awami hiami makwaha esis hiesi mawisi mafe' ea'. Ambagof amama awami mofalana mehhip ma'i, "Ine' nogalomana Godi." Amam mogawa anan Kraais, God nandandepana nasapa'ana nafi'i. Ea' Jisas

ninifalom na'i ina ata' mi'i anom basef, owa'.  
Mosopama malogof.

*Jisas nawalapa basef Godi taun hianai*  
(Mk 1:35-39)

<sup>42</sup> Kuhimbita atona Jisas nakwaha wambel anama nafe' anagon wafiguma fetauguma epes a'agoma. Esis safe' sogolopana satolona safe'ma anan. Esis sa'i anan ina nokwaha esis nofe', owa'. Sa'i sembal'ana nope la'ela'ef nolomas. <sup>43</sup> Ea', na'ipas na'i, "Ae' a'i ewalapa basef bu'wami ma epes siowis wambota Godi numafias. A'i ewalapa basef amama anagon taun hianai wapoti'. Dei' main, God nasapa'e afi'i enda' maol anama atona." <sup>44</sup> Ea' nafe' nawalapa basef Godi ifagw esis Juda sai basef sapeimi nawalapak nafe' etap hiagoma Judia.

## 5

*Jisas na'ipa Saimon Pita, dei' nowafa agof hi-ami*  
(Mt 4:18-22; Mk 1:16-20)

<sup>1</sup> Anona nemaf Jisas naitu akata walemb batupa'manai lu'unai Genesaret naloma amam nematawa hiesi sala'ambemana sape same' basef Godi. <sup>2</sup> Ea' nati bogw sa'umi biam mala embel felefele'ma nimbap walemb batupa'manai. Ea' amam mowafa agufi mandani' mafe' masa'opa anemb amamumi. <sup>3</sup> Ea' Jisas nalata natoma bot Saimoni ea' na'ipana na'i, "Sapa' bot nokwaha bandagoma nefe' laogoma."

Ea' Jisas natoma bot nawalipasa basef esis  
 amam nematawa. <sup>4</sup> Anan na'ipas ea' na'ipa  
 Saimon na'i, "Ine' sapa' bot nofo'o walemb embel  
 laogoma ea' pekwaha anemb mowala pewafai  
 anom agof."

<sup>5</sup> Ea' Saimon nagwa basef na'i, "Dembina,  
 do'ok owamb laona afa' wanda' maol lu'unai ea'  
 ina wagi anom agof, owa'. Ea' na'ipa ae' na'ama,  
 dei' ekwaha anemb mowala."

<sup>6</sup> Ea' mokwaha anemb mowala mowafai agof  
 hiami. Ea' anemb ma'i pele'etama agof hiami  
 endilisi. <sup>7</sup> Ea' amam mofalai alupumi amamumi  
 mape anona boti mafi'i magiambama mowafai  
 agof malam bogw biam si'ima agof ma'i mowala.  
<sup>8</sup> Saimon Pita nati na'ama, ea' nindiwa nembawa  
 natawa felefele'ma bo'wagah Jisasi na'ipana na'i,  
 "Dembina, ine' kwaha ae', fo'o. Ae' aman aowei,  
 anda' waf aonai!"

<sup>9</sup> Dei' main, anan naloma amam malumanai  
 mati agof mowafami umbelimi endilisi.  
 Ea' amam gegelalasom nomonas matamea.  
<sup>10</sup> \*Batausana Sebedi biam Jems naloma Jon  
 maloma Pita mandau'umai wapoti' gegelalasma  
 agof amama.

Ea' Jisas na'ipa Saimon na'i, "Ina umbame-  
 hena, owa'. Dei' atef nesafela maolan nenda'ana  
 la'ela'ef ni'pa enis epes sila Ae'."

<sup>11</sup> \*Ea' amam manda' bogw mafe' bandagoma,  
 makwaha amamaga amamumi hi'alam ma'oh,  
 ea' mailana mafe'.

---

\* 5:10: Mt 13:47      \* 5:11: Mt 19:27

*Jisas nanda' anona aman awes aonai nanda' alop nambu'anai ambo'ona*  
(Mt 8:1-4; Mk 1:40-45)

<sup>12</sup> Nogota anama Jisas nape anona taun, anona aman awesinai\* alop nambu'anai nape. Anan nati Jisas nafi'i, nande' nembawa natawa etap na'ipana mehip na'i, "Dembina, i'i ine' ni'i awi, nenda' ae' etaga bo'owe."

<sup>13</sup> Ea' Jisas nasa lagel alop aman anamai na'ipana na'i, "Ae' a'i a'e ma ine' netaga bo'wena."

Ea' dei' atef awes anama aonai nakwahona ea' nataga bo'ona.

<sup>14</sup> Ea' Jisas na'ipana basef la'ifimi na'i, "Ina nefe' ni'ipa enin epen ni'i ae' anda'ena bo'wena, owa'. Ine' fo'o nihi'ambana alop ine'inai ma aman anama pris. Ea' nese'ana amamaga amama anan nondolalima God ea' ine' ninifelona ma nataga bo'wena si'i mi'uli ananinai fowa' gani Moses na'ipasanai na'i. Ama esis hiesi sogawa ine' ambo'wena."

<sup>15</sup> Owa'etin. Diga basefa amamaga amama Jisas nanda'manam aman anama gatom mafe' ganigani. Fowa' ina hiesi same' basef amama, owa'. Dei' hiesi endilisi. Amama atom dei' epes hiesi safi'i ma some' anona nonda eses awes nanda'as setaga bo'wes. <sup>16</sup> Ea' nimeguf hiami Jisas nafe' anama wafiguma epes a'agoma ma nape nanda' beten.

---

\* 5:12: Niti futnot Luk 4:27.

*Jisas nanda' anona aman lagof bo'wagah  
maga'anai ambo'ona*

*(Mt 9:1-8; Mk 2:1-12)*

<sup>17</sup> Anona nemaf Jisas nape nawalipa esis amam nematawa ea' anom Farisi maloma anom mawalipasa mi'uli Godi tol mape. Anom mafi'i wambel hianai etap lu'unai biefina Judia naloma Galili. Ea' anom mafi'i Jerusalem. Ea' pepel Dembinai Godi nape Jisas, ama nanda' epes awes nanda'asi sotaga bo'wes wapoti'. <sup>18</sup> Ea' anom amam mofa' anona aman lagof bo'wagah maga' mailanai, na'oh lehis mofa'ana mafi'i. Ea' ma'i mofa'ana mefe' muwis ipat mombel'ana fele-fele'ma Jisas. <sup>19</sup> Ea' si'igina amam nematawa hiesi. Amam ina mati anona eafa mofa' aman anama muwis nomon, owa'. Ea' malata ipat ilif mihianama bogwan ilif mala aman anama awes nanda'anai naloma lehis nowala nomon la'afena amam nematawa mambel'ana na'oh naep Jisasi.

<sup>20</sup> Nogota anama Jisas natolom nogawa amam mombale'efana la'ifinai ma niegiambama aman anama awes nanda'anai. Ea' na'ipa aman anama na'i, "Ine' epen ae'inai. Waf aonai ine' nanda'anai ae' akwahomenana ea'."

<sup>21</sup> Ea' amam mawalipasa mi'uli Godi maloma amam Farisi atom ukup atifim mandanda' ma'i, "Aman anama emi egafuna nanda' God findiwanai? Owa'etina anona aman la'ifinai ma nek-waha waf aonai. God atona nakwaha waf aonai."

<sup>22</sup> Jisas nogawa nomonas amamumi. Ea' na'ipam na'i, "Dei' maina ukup ipe'imi mape na'ama? <sup>23</sup> Dei' amamaga maim ipe' pa'i ahifima ae'? Ae' la'ifiwei ma i'ipa awes nanda'anai i'i, Ae' ekwahomena waf aonai ine' nanda'anai o i'ipana

i'i, fela lehis ine'imi nehafel nefe'. Basef amama ma nefela lehis ananimi, ipe' pa'i amama ahifima ae'. <sup>24</sup> Ea' ae' a'i ipe' pegawa ae' ataga epen endilisiwei, la'ifiwei ma ekwaha waf aonai hianai amam nematawa sape etapi sanda'anai. Ae' a'i ihil'ambepa ae' la'ifiwei ma enda' amamaga amama.”

Ea' anan na'ipa aman anama awes nanda'anai na'i, “Ae' a'ipina endilisi, ine' hafel fela lehis ine'imi fa'am nefe' ipat ine'inai.”

<sup>25</sup> Jisas na'ipana etin na'ama, nohafel naitu nafela lehis ananimi naep amam nematawa hiesi. Ea' ata' nafe' etin eaf, nandanifel nafela agel Godi lu'una nafe' ipat ananinai.

<sup>26</sup> Ea' amam nematawa isima hiesi gegelalasis kwapete'as umbamahas endilisi safela agel Godi lu'una sa'i, “Dei' ape' mati anona waf dambainai fowa' owa' meatolonai.”

*Jisas nofala anona aman Livai*

*(Mt 9:9-13; Mk 2:13-17)*

<sup>27</sup> Amama mataga ea', Jisas nohafel nafe' nati anona aman nofa' takisi tol nape ipat sofa' takisanai, agilinama Livai. Ea' Jisas na'ipana na'i, “Ine' fi'i nila ae'.”

<sup>28</sup> Ea' nohafel nailana nafe'. Amamaga hiami ananimi nakwahom ma'oh.

<sup>29</sup> Ea' Livai nanda' anom gwa'aimi lu'wami ipat ananinai nanifela Jisas. Ea' amam hiami manda' waf aonai mofa' takisi maloma anom amam wapoti' mape ma' gwa'aimi maloma amam biam. <sup>30</sup> Ea' anom Farisi maloma anom amam mawalipasa mi'uli Godi, amam Farisi, mape manda' megah maham ma amam



alupumi Jisasi ma'i, "Dei' maina ipe' pape pa' gwa'aimi paloma amam mofa' takisi maloma amam amama manda' waf aonai? Na'ama ina andeande', hapaimi."

<sup>31</sup> Ea' Jisas nagwamam na'ipam na'i, "Isima awes a'asi ina safe'ma dokta, owa'. Esis bu'wasi. Ea' isima awes nanda'asi etis safe'ma dokta. <sup>32</sup> Ae' ina afi'i ma efala epes sape andeande'i somboma opalef, owa'. Ae' afi'i ma efala epes sanda' waf aonai etis somboma opalef sokwaha waf aonai sefe'ma God."

*Waf sololama gwa'aimi*  
(Mt 9:14-17; Mk 2:18-22)

<sup>33</sup> Ea' enis epes sa'ipa Jisas na'ama sa'i, "Alupumi Joni maloma alupumi amam Farisi ukup mapoma basef Godi. Ea' anom nimeguf wikifah hiami amam mololama gwa'aimi monda' beten etin. Ea' alupumi ine'imi owa' monda' waf anama. Amam ma' gwa'aimi embel maim nimeguf hiami."

<sup>34</sup> Ea' nagwamas na'i basef womun etin na'i, "I'i enis sonda' anom gwa'aimi lu'wami ma enis aman nemata'w bias sondase'ama, ipe' ina la'ifipama penda' esis alupisi sondaiwa'ma gwa'aimi nemaf anama anan naso' nemata'wi nape nalomas, owa'etin. <sup>35</sup> Ea' nemaf anama anan naso' nemata'wi nokwaha esis nafe' anagon laogoma, esis sakwaha gwa'aimi."

<sup>36</sup> Ea' Jisas na'ipasa anom basef womun etina luwaguf na'i, "Ina andeande'ma petopa' lowaf namunai pesana neloma anona lowaf apinai, owa'. I'i enis sonda'am na'ama, lowaf ina

noloma apinai na'ama etin, owa'. Namunai pele'etana etin.

<sup>37</sup> Ea' ina enin epen nakolo'wa embel wainim dambaimi agwahup apinai mafinina, si'i botowagof, owa'. I'i enin nenda'am na'ama, wain netef hiana, nohape' agwahup anama pepe'etana ea' wain kolo'olana aona hi'ilana.

<sup>38</sup> Ea' wain dambainai sakolo'wana agwahup dambainai atona. <sup>39</sup> Ea' emi noga' wain apinai enin ina atuwasi okom ni'i wain dambainai, owa'. Enin na'i, 'Wain apinai bu'unai nikila' dambainai.' ”

## 6

*Jisas nape Dembinai ma nemaf anama Sabat esis Juda sapoma noma'wanai*

*(Mt 12:1-8; Mk 2:23-28)*

<sup>1</sup> Anona nemaf esis Juda sapoma noma'wanai Sabat, Jisas nafe' anagon ea' nataga anona aof sawa witanai nawis. Ea' alupumi ananiami mafe' malomana, ea' magi anom wit maufi moka'isam lagof amamumi magwa'am. <sup>2</sup> Ea' anom Farisi mahali'am ma'i, “Ina penda'am na'ama ma nemaf anae' Sabat mapoma noma'wanai, owa'. Dei' maina panda'am na'ama?”

<sup>3</sup> Ea' Jisas nagwamam na'ipam na'i, “Ipe' pegawa basef amama ma waf fowa' gani dembinai King Devit nanda'anai. Nemaf anama Devit naloma alupumi ananiami nolomaham <sup>4</sup> anan nawis ipat lu'unai Godi nomon na' bret anama amam pris mondolali maso' Godanai. Ea' na'ana

naso' alupumi ananiami wapoti' ma'ana etin. Ea' mi'uli ape'inai na'i amam pris atom mea'ana.”

<sup>5</sup> Ea' Jisas na'ipam wapoti' na'i, “Ae' ataga epen endilisiwei, ape Dembiwei ma nemaf anama Sabata i'ipipa maina maol andeande'ma pila basef penda'ana nemaf anama.”

*Nemaf anama Sabat esis Juda sapoma noma'wanai Jisas nanda' anona aman lagel aonainai bo'ona*

*(Mt 12:9-14; Mk 3:1-6)*

<sup>6</sup> Anona nemaf esis Juda sapoma noma'wanai Sabat nataga. Ea', Jisas nafe' nawis nomon ipat esis Juda sa'i basef sapeinai nape na'ipasa basef esis amam nematawa. Ea' anona aman nape nalomas, lagel da'isinai ananinai aona naga' nail.

<sup>7</sup> Amam mawalipasa mi'uli Godi maloma anom Farisi ma'i mogolopa anona eafa meambaso'ma Jisasa anom basef baso'maimi ma monda'mana basef. Ea' manda'ana naep di'inde'ana. Ma'i muti anan nonda' aman anama bo'ona nemaf anama Sabat o owa'? <sup>8</sup> Ea' Jisas nogawa nomonas amamumi, na'ipa aman anama lagel aonainai na'i, “Ine' hafel nitu naep hiesi la'afena esis seatilina.”

Ea' anan nohafel naitu.

<sup>9</sup> Ea' Jisas na'ipam na'i, “Ae' a'i ihali'ipa ma mi'uli ape'inai na'iam na'imama? Nemaf ana'e ape' monda' waf bu'unai o monda' waf aonai? Na'i ape' migiambama epes ambal namunai napeis o mohas sogal'?”

<sup>10</sup> Ea' natologon tulif amam nematawa hiesi, na'ipa aman anama na'i, “Dowa lagel ine'inai usi'ina.”

Ea' nando lagel nataga bo'ona wapoti'.

<sup>11</sup> Ea' amam Farisi maloma amam mawalipasa mi'uli Godi opalef wandafum kwapete' endilisi ma anan. Ea' manda'ipama ma'i, "Afa' nambimb onda' maina Jisas?"

*Jisas nandandepa alupumi ananimiti 12-peleim  
(Mt 10:1-4; Mk 3:13-19)*

<sup>12</sup> Anona nemaf Jisas nandowasa' nafe' halafu-tagw nanda' betena God. Ea' owamb anama laona anan nape nanda' beten nafe' ea' lala.

<sup>13</sup> \*Aon natefi, anan nofala alupumi ananimiti hiami mafi'i. Amam 12-peleim nandandepam Aposel. <sup>14</sup> Anona Saimon, ea' Jisas nanda'mana agel wa'ana Pita. Ea' Andru, owalomana Saimoni. Ea' Jems naloma Jon, Filip naloma Bartolomyu, <sup>15</sup> Matyu naloma Tomas ea' Jems nogalomana Alfusi. Ea' Saimon anan epes hiesi Seloti.\* <sup>16</sup> Ea' Judas nogalomana Jemsi, naloma Judas Kariotinai, aman anama nawalapa Jisasa naumbih ananimiti.

*Jisas nanda' amam nematawa hiesi awes  
nanda'asi sataga bo'wes  
(Mt 4:23-25)*

<sup>17</sup> Ea' Jisas niniala naloma alupumi ananimiti mafe' anagon bembe'agoma, do'ok esis alupisi hiesi ananisi safi'i sali' saituma. Ea' epes hiesi safi'i. Enis safi'i wambel hiagoma Judia ea' enis safi'i wambel biefina Tair naloma Saidon nape felefele'ma naoh, enis safi'i Jerusalem. <sup>18</sup> Esis safi'i ma some' basef ananimiti ma natofa awes

---

\* 6:13: Jo 6:70      \* 6:15: Niti futnot Matyu 10:4.

nanda'asi. Ea' esis amam nematawa ambagof awami mahambombagasi safi'i, Jisas nanda'as bo'wes wapoti'. <sup>19</sup> Pepel ananinai nafe' nanda' esis hiesi bo'wes. Ea' dei' esis hiesi sa'i sombale'efana.

*Jisas na'ipasa waf sealifanai ea' seandani-felonai*

*(Mt 5:1-12)*

<sup>20</sup> Jisas nati amam alupumi ananiami na'ipam na'i,

“Ipe' kwahupei otamba maim a'ipei, ipe' pawis ea' wambota Godi numafipa. Amama atom dei' ipe' pandanifel pape.

<sup>21</sup> \*Ipe' epes nolomahipei, dei' pandanifel pape andeande'. Dei' main, anona nemaf ipe' pea' gwa'aimi elhipa endilisi. Ipe' epes opalef nimanima palef, dei' pandanifel pape andeande'. Dei' main, anona nemaf ipe' pandanifel pinda'iaf.

<sup>22</sup> Ae' ataga epen endilisiwei. Nambimb enis epes siti ipe' pila ae', esis opalef aoma ipe' endilisi. Ea' sowa' alafugaha ipe' sese'epa agof awami endilisi si'i ipe' epes aopai sindaiwa'mepa sogalo'mepa.

<sup>23</sup> Nemaf anama esis sonda'epa na'ama, ipe' pandanifel pialemb etin. Dei' main, amamaga hiami bu'wami ipe'imi ma'oh heven ilif. Fowa' gani akupas bafapas asasisi sanda' amam profet aom na'ama etin.

---

\* **6:21:** Re 7:16,17; Sam 126:5-6; Ais 61:3

- 24 Ipe' otamba wiga maim hiamipei, ipe' pindumafuma ma amamaga awami nimanimi meatagamipei. Dei' main, ipe' dei' pefa'am ea' amamaga monda'epa pandan-ifelamami.
- 25 Ipe' dei' pa' gwa'aimi elihipei, pindumafuma ma amamaga awami nimanimi meatagamipei. Dei' main, anona nemaf ipe' nolomehepa. Ipe' dei' panda'iafi, ipe' pindumafuma ma amamaga awami nimanimi meatagamepa. Dei' main, anona nemaf ipe' pelefa penda'aga endilisi.
- 26 Ipe' dei' epes hiesi hi'alas safela agof ipe'mi sa'i ipe' bu'wipei, ipe' pindumafuma ma amamaga nimanimi lu'wami meatagamipei. Dei' main, fowa' akusas bafasas asasisi sa'ipam na'ama etina amam profet mambaso'mami ma'ipasa basef Godi. Sanda'mamam na'ama etin, safela agof amamumi.

*Anom basefa ukup mimila epes isima naumbih  
(Mt 5:38-48)*

27 Ea' ipe' pame' basef ae'ami, ipe' ukup mimila naumbih ipe'isi, penda'masa waf bu'unai isima opalef aoma ipe'i. 28 Ipe' pihali' Goda nonda'mas waf bu'unai ma epes isima sanda'mepa waf aonai. Ea' penda' betena epes isima sanda'epa aopei. 29 I'i emi egelin nehempa aomb wa'ol, pendamboma nehempa wa'ol wapoti'. I'i emi egelin nefa'epa saket ipe'inai, ina pinda'imana, owa'. Pese'ana wapoti'. 30 I'i emi egefin nefalepama anom amamaga, ipe' pese'anam. Ea' i'i emi

egefin nefa' amamaga ipe'imi, ipe' owa' pi'ipana mehpa negwamepam, owa'. <sup>31</sup> Maina waf ipe' pa'i esis sanda'mepana ipe'i, ipe' penda'masana na'ama etin.

<sup>32</sup> I'i ipe' ukup mimila epes isima ukup maimaila ipe' etipa, nambimb pefa' maim amamaga bu'wami ma waf anama? Owa'etin. Epes sanda' waf aonai esis sanda'ana na'ama etin. Ukup maimaila epes isima ukup maimailasi. <sup>33</sup> I'i ipe' penda' waf bu'unai ma isima sanda' waf bu'unai atona ma ipe'i, nambimb emi nefela agof ipe'imi? Owa'etin. Epes isima sanda' waf aonai esis wapoti' sanda' waf na'amainai. <sup>34</sup> I'i ipe' pese'asa anom amamaga epes isima ipe' pegawa esis nambimb seagwamepami, anona nemaf emi nefela agof ipe'imi? Owa'etin. Epes sanda' waf aonai wapoti' sase'asa anom amamaga enis sanda' waf aonai, ma esis seatan-ima seafa'am na'ama etin mondagwama si'i sali' sase'asam. <sup>35</sup> Ea' ipe' ukup mila naumbih ipe'isi, penda'mas waf bu'unai esis pese'asa amamaga. Ipe' ina ata' pi'i anona nemaf esis sogwamepam, owa'. Ipe' penda'as na'ama anona nemaf God la'ifinai nape ilifi nese'epa amamaga lu'wami bu'wami ma pepe awasi ananipei. Dei' main, anan na'i uwahipis esis isima owa' seanifelona saloma isima sanda' waf aonai. <sup>36</sup> Ahalomepa ipe'inai na'i uwahipis esis sanda' waf aonai. Ipe' penda'am na'ama etin si'i anan nati esis uwahipis.

*Waf mowaloga enis epes si'i anona jas dembinai*

*(Mt 7:1-5)*

<sup>37</sup> Ipe' ina pewaloga enis epes si'i anona jas dembinai nawaloga basef kot lu'unai, owa'. Ama anona nemaf God ina nowalogepe, owa'. Ipe' ina pembaso'ma enis epes, owa'. Ama anona nemaf God ina nombaso'ma ipe' wapoti', owa'. Ipe' pekwaha waf aonai enis sanda'ma ipe'anai. Ama anona nemaf God nogwam nokwaha waf aonai ipe'inai. <sup>38</sup> Ipe' pese'asa amamaga enis epesa God nose'epa amamaga ipe'. Anona nemaf anan nose'epa amamaga hiami si'im mosaminiala ma ipe'. Ikwaf ipe' pease'asana enis epesi, ikwaf anama atona God nese'epana ipe'." <sup>39</sup> Ea' Jisas na'ipasa anom basef womun etin wapoti' na'i, "A'i enin epen naep mase'ani la'ifinama nihi'ambaman eaf enin epen naep mase'ani? Owa'etin. Atuwasi esis bias sondakolas dogwas sefe' sowala etin kwambiwag. <sup>40</sup> Epes sanda' skul etini ina sape dambes sikila' tisa asasinai, owa'. Esis sanda' skul sambefan ea', sotaga na'ama etin si'i tisa asasinai. <sup>41</sup> Dei' maina ipe' pati usan sa'unai nape naep sahin owan ipe'isi, ea' ipe' owa' pegawa hapataf lu'unai nape naep ipe'imi? <sup>42</sup> Dei' maina ipe' ata' pa'ipa alupisi pa'i, 'Owalome, ae' a'i iwafamenana usan sa'unai nape naem ine'inai.' Ea' ine' hapataf lu'unai anama nape naep ine'imi. Ipe' malogof biamipei pambaso'mami. Ipe' ata' pili' pewafa hapataf lu'unai nape naep ipe'imi, ma piti andeande' pewafamenan usan sa'unai nape naep alupisi ipe'isi.



*Lawag aonai nola gwa'aimi awami  
(Mt 7:17-20; 12:33-35)*

<sup>43</sup> Lawag bu'unai ina nola gwa'aimi awami, owa'. Ea' na'ama etin lawag aonai ina nola gwa'aimi bu'wami, owa'. <sup>44</sup> Ape' mati gwa'aimi mailami, mogawa lawah bu'wami awami. Ape' ina mola su'utip fik si'i ahip anona mandof hi-gataunai, owa'. Ea' ina mola su'utip wainim anona mandof pipi'embin, amama wapoti' owa'. <sup>45</sup> Epes na'ama etin. Epes bu'wasi, esis ukup bu'wami mapeis ukup asasimi sawalapa waf bu'unai. Ea' epes awasi waf hianai aonai napeis ukup asasimi. Ea' sawalapa waf aonai atona. Dei' main, waf bu'unai aonai nape si'ina ukup asasimi, anama atona dei' malogof mawalapana nawisi ande'.

*Waf biefina sala' ifagw  
(Mt 7:24-27)*

<sup>46</sup> Dei' maina ipe' pa'i ae' Dembiwei, Dembiwei, ea' ipe' owa' pila malogel ae'anai? <sup>47</sup> Emi egafis sifi'mai ae' sieila malogel ae'anai, dei' ae' indila'wifa waf ananinai ma ipe' pegawana. <sup>48</sup> Epen inima si'i anona aman nala' ipati. Anan nandoma olalef mowala gani etap owin otamba ma'oma. Ea' nala' ipat netawa etap anama otambaiguma la'ifiguma. Ea' asaf lu'unai nalai, walemb nawisi lu'una embel kolo'walami mafe', ipat ina nandagwamba, owa'. Dei' main? Aman anama nanda'ana la'ifina. <sup>49</sup> Ea' emi egefin name' basef ae'ami owa' nilam, inima si'i anona aman nala' ipat falafunai. Anan nanda'ana nala'ana etin natoma etap atona ilif. Ea' anom

nimeguf mafe' ea' walembekh mawisi embel mag-wale'ana nowa aona hi'alana.”

## 7

*Jisas nanda' aman nanda'mana maol dembinai numafi amam soldiai bo'ona*

*(Mt 8:5-13)*

<sup>1</sup> Jisas na'ipasa basef amama laumi esis amam nematawa seme'am ma hi'alam, ea' nafe' nataga anona wambel Kaperneam. <sup>2</sup> Anona aman dembinai nape. Anan kepten numafi soldia hi-ami 100-peleim. Anona nanda' maola anani awes nanda'ana felefele'ma neaga'. Ea' kepten okom nainailana. <sup>3</sup> Ea' name' basefa Jisas nasapa' anom agufumi Judai mafe' mofala Jisasa nifi'i nonda' aman anama bo'ona. <sup>4</sup> Ea' mafe' matagama Jisas ma'ipana mehipe ma'i, “Kepten anama aman bu'unai, andeande'ma ine' ni-giambamana nenda' aman nanda' maolanana bo'ona. <sup>5</sup> Dei' main, anan okom nainaila ape' Juda nala' ipat ape' ma'i basef mapeinai.”

<sup>6</sup> Ea' Jisas nafe' nalomam nafe' nataga felefele'ma ipat ea', Kepten anama nasapa' anom alupumi mofa'ai basef ananiami mafi'i ma'ipa Jisas na'ama ma'i, “Dembinai, ine' nefo'o owa', hapaimi. Ae' ina aman bu'uwei ma ine' nefo'o niwis ipat ae'anai, owa'. <sup>7-8</sup> Amama atom ae' wapoti' ina bo'owe ma efe'mago ine', owa'. Ine' ni'i etin, atuwasi anan bo'ona. Dei' main, ae' ape owina anom soldia dambami mumafi mase'e maol. Ea' ape ilifa anom soldia ae'ami imafiam. I'ipa anona i'i, 'Ine' fo'o', name'e nafe'. Ea' i'ipa anona i'i, 'Ine' fi'i', neme'e nafi'i. Ea' i'ipa anama

agel a'anai nanda'me maoli i'i, 'Ine' da'a maol anama', anan name'e nanda'ana. Ine' dembinai. Ea' awes anama atuwasi neme' basef ine'imi nefe'. Dei' ine' ni'i etin, ea' anan ambo'ona wapoti'."

<sup>9</sup> Jisas name' basef ananiami okom natanea ea' nandamboma na'ipa amam nematawa hiesi sagi'ma anani na'i, "Ae' a'ipipa, soldia dembinai anama anan ina ipe' Israelinai. Ea' dei' nembale'efa ae'. Ina anona aman Israelinai nembale'ef na'ama, owa'etin. Anan nikila' ipe' Israela nembale'efa ae' la'ifina."

<sup>10</sup> Ea' amam amama kepten nasapa'am mafi'i motanima mafe' ipat mati aman anama nanda' maola kepteni ambo'ona.

*Jisas nafela enin so'uso'win nataga bo'wen wapoti'*

<sup>11</sup> Anom nimeguf mafe' ea', Jisas nafe' anona wambel Nain. Alupumi ananiami maloma enis amam nematawa hiesi safe' salomana. <sup>12</sup> Anan nafe' felefele'ma uta sawis wambel anama, ea' nati enis sofa' enin so'uso'win naga'i safi'i sa'i sowan. So'uso'win inima mama'wan alifi'wi. Akwa'w kola enin etin, waulunama'w a' naga'. Ea' esis amam nematawa hiesi sape wambel anama safi'i salomai akwa'w. <sup>13</sup> Dembinai nati akwa'w, okom ananinai na'i uwahipi'w ea' na'ipakw na'i, "Ine' nelef owa'."

<sup>14</sup> Ea' anan nafe' felefele' nasa lagela bokis salanami. Ea' amam mofa'ai bokis amama maitu.

Ea' Jisas na'i, "Souso'win, ine' neme'! Ae' a'ipina, ine' hafel."

15-16 So'uso'win inima naga' ea'i nehafel nape na'i. Ea' Jisas naso'akwan mama'wan anani'wi. Na'ama esis umbamahas endilisi safela agel Godi sa'i, "Anona aman profet dembinai nataga ea' la'afena ape'. God nafi'i ma nigiambama ape' amam nematawa ananipai."

17 Ea' basef amama ma maol Jisasi mafe'agen hi'alagon anama etap hiagoma Judia ea' anama hiagoma wapoti'.

*Jon nasapa' alupumi biam mafe'ma Jisas  
(Mt 11:2-19)*

18 Alupumi Joni ma'ipana amamaga amama pepel anama Jisas nanda'anai. Ea' Jon nofala alupumi biam ananiami 19 nasapa'am mafe' mahali' Dembinai Jisas ma'i, "Ine' aman ma'wina nafi'i o ata' mope mohafa anona?"

20 Amam matagama Jisas ea' ma'i, "Jon napisi'as embeli nasapa' afa' biafa wafi'mai ine', anan na'i nogawa, 'Ine' aman ma'wina nafi'i o ata' mope mohafa anona?' "

21 Nema'f anama atona Jisas nanda' amam nematawa awes naninani nanda'asi sataga bo'wes. Anan natofamasa ambagof awami mapeisi. Hiesi naep mase'asi nanda'masam mati andeande'.

22 Ea' Jisas nagwamama basef na'i, "Ipe' pitanima pefe' pi'ipa Jona amamaga amama dei' patolomi pami'ami. Isima naep mase'asi sati wapoti', bo'wagah awamisi safe' andeande'. Isima awes aonai nanda' alop asainai nambu'wi ambo'wes, aligah mase'asi same' basef andeande', saga'i sotanima sohafel wapoti' ea' kwahusi same' basef bu'wami Godi. 23 Emi

egafis ukup etifim sombale'efa ae', isima sondanifel endilisi.”

<sup>24</sup> Amam biam mofa'ai basef Joni motanima mafe'. Ea' Jisas na'ipa esis amam nematawa ma Jon na'i, “Fowa' ipe' pafe' anona etap fatauguma wafiguma epes a'agoma pafe' pati main? Pafe'ma pati anona aman ina nembale'ef ande-ande' si'i anona elifita uf nefa'ana nanda' felifal? Owa'etin. <sup>25</sup> Ea' pafe' pati main? Pafe' pati anona aman nala luwaguf bu'wami atumi? Owa'etin. Epes isima sotala amamaga bu'wami atumi ma moni hianai sala luwguf bu'wami atumi, epes isima sape ifagw bu'wami king dambami atom mapeimi. <sup>26</sup> Dei' ipe' pafe' pati main? Pafe' pati anona aman profet? Endilisi ae' a'ipipa, anan profet dembinai nikila' profet hiami hi'alam. <sup>27</sup> Aman anama ea' ma'una anan atona si'i basef mape Baibeli na'iam God fowa' gani na'iam na'i, 'Ine' neme', anona nemaf ae' esapa' aman nofa' basef Ae'ami nili' nefe' nendondombamena eaf ine'inai.’

<sup>28</sup> Ae' a'ipipa endilisi. Jon dembinai nikila' amam hiami ma etap anae'. Ea' emi egafis dei' siowis wambota Godi numafias, isima dembesi sikila' Jon. Ea' emi egafis agof a'asi ma wambota Godi, esis wapoti' dei' sape dembesi sikila'ana.”

<sup>29</sup> Ea' amam mofa' takisi maloma epes hiesi same' basef Jisasi esis sa'i, “A'e, waf Godi ande-ande'.”

Dei' main, Jon atona napisi'asi. <sup>30</sup> Ea' amam Farisi maloma amam mawalipasa mi'uli Godi ina mofa' baptaisa Jon, owa'. Amam manda'am

na'ama dei' mandamboma mowa' alafugaha eaf bu'unai God nihi'ambamanai.

<sup>31</sup> Ea' Jisas na'i, "Dei' ae' indili'wifa ipe' amam nematawa dei' pape etap anae'i i'imama? Ae' i'ipipa maim basef womun etina pegawa waf ipe'inai?" <sup>32</sup> Ipe' pape si'i enis awasi sandakolas sapoma sofala enis awasi sa'i,

'Ape' mandanifel mufapula batagwa ipe', ea' ipe' ina palemb. Ape' manda' awalef malef matamea, ea' ipe' ina palef.'

<sup>33</sup> Aman anama Jon napisi'as embeli nafi'i, ina na' gwa'aimi embel wainim, owa'. Ea' pa'i ambal aonai napaina. <sup>34</sup> Dei' ae' ataga epen endilisiwei afi'i a' gwa'aimi maloma embel wain, ea' patolowe pa'i, 'Piti anan aman na' gwa'aimi hiami, na' embel wain hianai endilisi. Anan alupunai ma amam mefa' takisi maloma amam manda' waf aonai!' <sup>35</sup> Ea' emi egafis sila gawa bu'unai Godi, esis isima sihi'ambapa gawa anama Godi bu'unai endilisi ma sombale'efana!"

*Ano'w nemata'w kwanda' waf aonai kwakolo' sanda bo'wagah Jisasi*

<sup>36</sup> Anona aman Farisi nahali' Jisasa nifi'i nea' gwa'aimi nolomana. Ea' nafe' ipat anama Farisi nalomana ma' gwa'aimi. <sup>37</sup> Ea' ano'w nemata'w kwape taun anama kwanda' waf aonai. Akwa'w kwame' basefa Jisas na' gwa'aimi ipat anama. Ea' kofa' anona botol bu'unai si'i owap embel sanda alogw bu'wami ma'anai kwafi'i. <sup>38</sup> Ea' kwawis kwafe' kwaitu alafuga Jisasi felefele'ma bo'wagah ananiami kwalef. Ea' embif akwa'umi maluwi mowala bo'wagah Jisasi ea' kwanda'

auf balagaimi kopati' embif akwa'umi, kwape kwasisi' bo'wagah ananiami kwanda' lotumana. Ea' kwakolo' sanda anama bo'wagah ananiami.

<sup>39</sup> Ea' Farisi anama nahali' Jisas nafi'i nati amama, nomonas ananiami matamea na'i, "I'i aman anama endilisi anan profet, anan nogawa nemata'w akwama kwahapila anani, nogawa waf akwa'unai. Dei' main? Akwa'w kwanda' waf aonai."

<sup>40</sup> Ea' Jisas nagwamana nomonas amama Farisi anama na'ipana na'i, "Saimon, ae' a'i i'ipina anom basef."

Ea' Saimon na'i, "Tisa, ine' walapa basef ine'imi."

<sup>41</sup> Ea' Jisas na'i, "Amam biam anona wiaf napoma amoma anona aman otamba hiamunai. Anona nowaola wiafa 100 kina ea' anona 10 kina atona. <sup>42</sup> Amam biam ina la'ifima meagwa wiaf anama, owa'. Ea' dei' aman anama nakwahomoma wiaf anama amam biam. Ea' amam biam nambimb emi okom ninila anan endilisi nikila' anona?"

<sup>43</sup> Ea' Saimon nagwa basef na'ama na'i, "Ae' a'i aman anama nase'ana wiaf lu'unai 100 kinai."

Ea' Jisas na'i, "Ine' nawalogam andeande'."

<sup>44</sup> Ea' nandamboma nati nemata'w akwama na'ipa Saimon na'i, "Ine' niti nemata'w akwama? Ae' afi'i awis ipat ine'inai. Ine' owa' nase'e embel esa'opa bo'wagah ae'ami, owa'etin. Ea' nemata'w akwama kwasa'opa bo'wagah ae'ami ma embif maluwi naep akwa'umi. Ea' kopati'am balaga akwa'unai. <sup>45</sup> Ine' owa' niesisi' ae'. Ea' do'ok ae' afi'i awis etin, akwa'w kwape kwasisi' bo'wagah ae'ami la'ela'ef kwape kwafi'i kwataga

dei'. <sup>46</sup> Ine' owa' neanda' wel nekolo'am ma bal-aga ae'anai. Ea' akwa'w kwakolo'am bo'wagah ae'ami embel sanda bu'unai. <sup>47</sup> Na'ama dei' ae' a'ipina. Akwa'w okom nainaila ae' endilisi. Waf anama okom nainaila ae'anai nihi'ambapa waf aonai akwa'unai hianai ae' akwahomakwana hi'alana. Emi epen God nokwahoman waf aonai ananinai kwasala'una, epen inima enin nambimb ina okom ninila God endilisi."

<sup>48</sup> Ea' Jisas na'ipakw na'i, "Ae' akwahomena waf aonai ine'inai."

<sup>49</sup> Ea' amam mape ma' gwa'aimi malumanai mape ukup matamea manda'ipama ma'i, "Aman anama emi egafuna na'i la'ifina ma nokwaha waf aonai?"

<sup>50</sup> Ea' Jisas na'ipa nemata'w akwama na'i, "Ine' nembale'efa ae' la'ifiwei. Amama atom God nakwahomena waf aonai ine'inai nofa'ena netanimani. Ine' fo'o, ea' opaf ine'inai nope awanena."

## 8

### *Anowa nematawa wafe' waila Jisas*

<sup>1</sup> Anom nimeguf mafe' ea', Jisas nafe' wambel hiagoma na'ipasa basef bu'wami amam nematawa sape taun anama wambel hiagomai. Na'ipasa basef amama bu'wami ma nambimb siowis wambota Godi numafias. Alupumi ananimi 12-peleim maloma <sup>2</sup> anowa nematawa safe' salomana. Nematawa awama fowa' awes nanda'awa Jisas natofamawa ambagof awami nanda'awa bo'owa. Ano'w Maria sofala'w sa'i Makdalai'wi, fowa' natofama'wa ambagof awami 7-peleim mapai'wi. <sup>3</sup> Ea' ano'w Joana



nemata'w anona aman numafi ipat Heroti, agel ananinai Susa. Ea' ano'w Susana kwaloma anowa nematawa hiawai wapoti' wafe' walo-mana. Awo wagiambama anan naloma alupumi ananimi ma otamba gwa'aimi maim awaumi.

*Aman nowaha nalelef gwa'aimi aof*  
(Mt 13:1-9; Mk 4:1-9)

<sup>4</sup> Esis amam nematawa hiesi sape safi'i taun hi-agoma, safi'i sandakolas safi'mai Jisas. Ea' anan nase'asa basef hiami womun etin na'ama na'i, <sup>5</sup> “Anona aman nafe' nowaha olelemb witimi si'i rais anona aof. Nowahom nafe', anom mowa eaf safe'ma. Enis epes safe' safofola'som ea' amiguf mufia' mafi'i ma'am. <sup>6</sup> Ea' anom mowa anagon otambaiguma. Ea' mataga ea' etap owa' embelina. Masilimb ina mowala ea' alim. <sup>7</sup> Anom mowala la'afena mandelef wandafumi mataga malomam maofenia wit, ea' amam ina mail mola gwa'aimi, owa'. <sup>8</sup> Ea' anom mowa mafe' etap bu'unai ea' mataga malo mail mola gwa'aimi. Anom mataga malo mail mola gwa'aimi hiami 100-peleim.”

Jisas na'iam na'ama ma ea', na'ipas mehip na'i, “Ipe' aligah magalipei, peme'am andeande' ukup mopomam.”

*Jisas na'ipasa basef amama ofagema*  
*na'ipasam womun etin*  
(Mt 13:10-17; Mk 4:10-12)

<sup>9</sup> Ea' amam alupumi Jisasi mahali'anama basef ofagema womun etini. <sup>10</sup> Ea' nagwamama basef na'i,

“God nihi'ambepa basef ofagema mape mandambahi'i ma ipe' piowis wambota Ananinai numafipa. Ea' enis epes owa'. God ina nihi'ambas basef amama ofagema, owa'. Ama esis 'ina some' basef amama alihim, owa'. Some' basef womun etin nambimb sotologon, ea' ina siti anom amamaga, owa'. Esis some' basef, ea' ina sogawa ofagema, owa'.”

*Basef ofagema ma olelemb gwa'aimi  
(Mt 13:18-23; Mk 4:13-20)*

<sup>11</sup> Basef womun etini ofagema na'ama. Olelemb amama si'i basef Godi. <sup>12</sup> Anom mowa eafi amama si'i epes isima same' basef, ea' Satan nafi'i nofa' basef amama God nase'esam mape opalef asasimi ma esis ina sembale'efa God nofa'as seatanimani, owa'. <sup>13</sup> Anom mowa mafe' anagon otambaiguma, amama si'i enis epes same' basef Godi ea' sofa'am mehipe sandanifelamam. Ea' isima si'i masilimb ina mondala mowala etap owini. Esis sembale'am nogota bandana etin ea', Satan nagwambas sanda' waf aonai ea' satanima sakwaha sembale'efa God. <sup>14</sup> Anom mowala mandelef wandafumi la'afen, amama si'i epes isima same' basef sailif safe' ea', anom nimanimi mamumami maloma moni main naloma anom danifel maim etapami, amamaga amama mase'ala esis. Ea' ina sembale'efa God sanda' waf bu'unai la'ifis, owa'. <sup>15</sup> Ea' anom mowa etap bu'unai, si'i enis same' basef bu'wami sembale'am la'ifis. Opalef asasimi bo'om same' basef Godi sailam. Esis sape la'ifis sanda' waf bu'unai la'ela'ef, isima sape

si'i olelemb mataga malo mail mola gwa'aimi andeande'i.

*Nogwahis mafifili sasapa'am sambahe'am nomon ifagw*

*(Mk 4:21-25)*

<sup>16</sup> Epes ina sakata lamifah sopalo'am ma'oh owina baket o balata owina, owa'. Esis sawamonam balatagw ilifa epes isima suwisi siti howalagon. <sup>17</sup> Amamaga hiami hi'alam mape mandambahi'i anona nemaf motaga alihiguma hiesi sotolom sogawam. Ea' amamaga hiami ata' sambaho'am ma'ihhi, anona nemaf motaga mondawalap, hiesi sogawam. <sup>18</sup> Ea' ipe' pindumafuma peme' basef andeande'. Emi egafis sembale'efa basef Godi, nambimb God nowatanimasam wapoti'. Ea' isima owa' sembale'ami, anona nemaf basef kwawie'im amama esis sombale'am, God nondalombasam esis sopen etin.”

*Jisas mama'wana kwaloma owapana ananiami*  
*(Mt 12:46-50; Mk 3:31-35)*

<sup>19</sup> Nemaf anama mama'wana Jisasi kwao'wa owapana safi'mai anan. Amam nematawa hiesi sandakolasi sili'akwana ea' esis ina safe' felefele'ma anan, owa'. <sup>20</sup> Ea' enis epes sape salomanai sa'ipana sa'i, “Ine' neme', mama'wana ine'ikwi kwaloma owapena ine'imi safi'i saituan de', sa'i solomena si'i.”

<sup>21</sup> Ea' nagwamasa basef isima hiesi na'ipas na'i, “Esis amam nematawa isima some' basef Godi sailam, isima mama'we sahin owan ae'asi.”

*Jisas na'ipa uf lu'unai faso'mana*  
*(Mt 8:23-27; Mk 4:35-41)*

<sup>22</sup> Anona nemaf Jisas nao'wa alupumi ananiami malata anona bot. Ea' anan na'ipam na'i, "Afa' ofe' anama walemb batupa'manai gani fisana." Ea' amam malata bot mafe'. <sup>23</sup> Bot anama nafe' etin, Jisas ambekh mahana na'oh nolola.

Ea' anona uf lu'unai naluwi walemb batupa'manai anama, embel kolo'walam mawis bot nomon na'i si'inama embel felefele'ma mowala.

<sup>24</sup> Ea' mafe' minimbalana ma'ipana ma'i, "Dembinai, afa' wa'i ahgililafa."

Ea' anan nohafel ninifala ufi embel. Ea' uf faso'mana, embel ina ata' manda' fepo, owa'. Tol motah.

<sup>25</sup> Ea' Jisas na'ipam na'i, "Bale'ef ipe'inai nape eti?"

Amam umbamaham ukup matamea. Ea' manda'ipama ma'i, "Anan emi egafuna? Na'ipa uf naloma embel mame'ana mowala."

*Jisas nanda' anona aman ambagof awami mapeinai bo'ona*

*(Mt 8:28-34; Mk 5:1-20)*

<sup>26</sup> Ea' Jisas naloma alupumi mafe' mataga anagon esis Gerasa sapoma, anama nape wa'ol walemb batupa'manai fisana etap hiagoma Galili. <sup>27</sup> Ea' Jisas nakwaha bot nisila' nafe' akata, anona aman nape taun anamai nafi'mai anan. Anom ambagof awami mapeinai. Anan ina nowaho' anona lowaf nape andeande' anona ipat, owa'etin. Fowa' anan aona nape la'ela'ef nafi'i nafi'i nataga dei'. Nape nafe' hi'agilif atom. <sup>28-29</sup> Anona ambal aonai nahapilana tatala'ina. Esis sombalo'ana sumafiana nimeguf hiami

sanda' seni hankap sowa'ana lagof bo'wagah, owa'. Nahape'am etin. Ea' ambal anama aonai nofa'ana nafe' anama epes a'agoma.

Aman anama nafi'i nati Jisas, nindiwa nem-bawa notawa felefele'ma bo'wagah ananiami. Ea' Jisas na'ipana mehip na'i, "Ine' ambal aonai, nekwaha aman anama ine' fo'o."

Ea' nofalana mehip endilisi na'i, "Jisas, ine' Nogalomana dembinai God nape ilif endilisi, ine' na'i nenda' maina ae'? Ae' a'ipina mehip, ine' owa' nese'e nimaniami ae'."

<sup>30</sup> Ea', Jisas nahali'ana na'i, "Agel ine'inai emi?" Ea' anan na'i, "Agel ae'inai ambagof hiami."

Dei' main, ambagof awami hiami mafe' mawisana.

<sup>31</sup> Ea' ambagof amama mofala Jisas mehip timbitambel ma'i, "Ina netofafa ofe' owala hul launai owa' nowala neatambili, owa'."

<sup>32</sup> Ea' anom bogof hiami maitu ma' gwa'aimi anona domota felefele'. Ea' ambagof awami ma'ipa Jisas mehip ma'i, "Ine' ni'i a'e ma afa' ofe' uwis bogof mamuma."

Ea' na'i aho'mam. <sup>33</sup> Ambagof awami amama makwaha aman anama mawisi mafe' mawisa bogof. Ea' bogof mamuma hiami masagih mafe' mehip mowala awagoma tata, mowala embel walemb batupa'manai afum hi'alam.

<sup>34</sup> Ea' amam mumafi bogofi mati amamaga matagama bogof, masagih mafe' ma'ipasa amamaga amama amam matulumi amam nematawa sape tauni saloma sail aof felefele'i wapoti'. <sup>35</sup> Ea' esis safe'ma sieti amamaga amama. Safi'mai Jisas sati aman anama fowa' ambagof awami

mapeinai dei' makwahona ea' ambo'ona okom bu'unai napaina andeande' nowaho' lowaf tol nape felefele'ma bo'wagah Jisasi. Amam nematawa hiesi satolona ea' esis umbamahas. <sup>36</sup> Ea' epes isima sati amamaga amama, sa'ipas sa'i waf Jisas nanda'ana aman anama fowa' ambagof awami mapeinai dei' ambo'ona wapoti'. <sup>37</sup> Ea' epes hiesi sape anama Gerasai hiesi umbamahas endilisi. Ea' sa'ipa Jisas sa'i, "Ine' nekwaha ape' fo'o."

Ea' Jisas nalata bot anama notanima nafe'.

<sup>38</sup> Aman anama fowa' ambagof awami mapeinai nahali'ana mehip na'i, "Ae' a'i efe' elomena."

Ea' Jisas nasapa'ana na'i, <sup>39</sup> "Ine' tanima fo'o wambel ine'inai, ni'ipasa amamaga hiami God nanda' maina ine'ami."

Ea' aman anama nafe' nawalapa basefa amamaga amama ma amam nematawa hiesi sape taun anamai amamaga Jisas nanda'manam anani.

*Jisas nanda' Jairus nogamana kwaga'i kohafel wapoti' ea' nanda' ano'w nemata' awes lu'unai nanda'akwi ambo'okw*

*(Mt 9:18-26; Mk 5:21-43)*

<sup>40</sup> Jisas notanima nafi'i, enis amam nematawa hiesi sape sohafana. Ea' sanda'mana nemaf bu'unai sandanifela ma nafi'i. <sup>41-42</sup> Ea' anona aman nataga agilinama Jairus. Anan numafi ipat esis Juda sa'i basef sapeinai. Nogamana nemata'w atoto'w afagof akwa'umi 12-peleim felefele' kwa'i koga'. Ea' nindiwa nembawa notawa felefele'ma bo'wagah Jisasi, nahali'ana mehip na'i, "Ine' nifi'i ipat ae'anai."

Ea' Jisas nafe' esis amam nematawa hiesi safe' sanda' gwagwasi'ma etin saitu sindiwapana. <sup>43</sup> Anan ata' nafe' etin, ano'w nemata'w kwafi'mai anan. Awes lu'unai nanda'akwi kwape gamba afagof 12-peleim. Otamba akwa'uimi hi'lalama kwatal dokta hiami. Owa' anom la'ifima monda'akw kotaga bo'okwe, owa'etin. <sup>44</sup> Ea' kwafe' felefele'ma alafuga ananinai, kwasa lagela saket Jisasi da'malifinama. Kwanda'am na'ama, mehipe etin esimbel pele'atam, ea' ina ata' maluwi wapoti', owa'etin.

<sup>45</sup> Ea' Jisas nahali'as na'i, "Emi nasa lagela ae'?"

Ea' esis hiesi sa'i etin etin sa'i, "Ae' owa'."

Ea' Pita na'i, "Dembinai, amam nematawa isima hiesi saitua sanda' gwagwasi'ma etin salomafa." <sup>46</sup> Ea' Jisas na'ipas na'i, "Ae' ame' pepel ae'anai nakwahowe nafe'ma nonda' enin epen bo'wen. Ae' egawa enin epen nasa lagel alop ae'anai."

<sup>47</sup> Ea' nemata'w akwama kogawa akwa'w ina atuwasi kondambaho'w ma anan, owa'. Na'ama akwa'w umbamaha'w kwafi'i kwindiwa nembawa kotawa etap felefele'ma naep amam nematawa hiesi. Ea' kwawalapa basef ofagema akwa'umi ma dei' kwasa lagela anan ea' ambo'okw. Ea' kwa'i, "Awes ae'anai ahi'alana owa'etin."

<sup>48</sup> Ea' Jisas na'ipakw na'i, "Nogame, dei' ine' nembale'efa ae' la'ifiwei. Amama atom dei' anda'ena bo'wena. Ine' fo'o opaf ine'inai nope awanena."

<sup>49</sup> Anan ata' na'i etin, anona aman nakwaha ipat Jairusi nafi'i na'ipa Jairus na'ama na'i,

“Nogamena ine'ikwi kwaga' ea'. Amama atom dei' ina nenda' Dembinai Tisa nofo'o ekep pehana, owa', hapainai.” <sup>50</sup> Ea' Jisas name'as na'ipa Jairus na'i, “Ina umbamohena, owa'. Nem-bale'efa ae' la'ifiwei, ama atuwasi nogamena ine'ikwi kohafel wapoti'.”

<sup>51-52</sup> Ea' Jisas nafe' nataga ipat Jairusi ea' ina na'i a'e ma amam nematawa hiesi suwis ipat anama, owa'. Nao'wa Pita naloma Jon Jems atom maloma mama'wakw ahaloma'w etis safe' sawis salomana. Esis amam nematawa hiesi sape ande' salef mehip sa'i sapoma'w.

Ea' Jisas na'ipas na'i, “Ipe' ina pelef, owa'. Tol pepe. Akwa'w ina kwaga' endilisi, owa'. Kwa'oh etin.”

<sup>53</sup> Ea' esis sanda'iafana kwapete'. Esis sogawa akwa'w kwaga' endilisi.

<sup>54</sup> Ea' Jisas nahapila lagel akwa'unai nofala'w na'i, “Sa'ukwi, ine' hafel.”

<sup>55</sup> Ea' ambal akwa'unai notanima nafi'i naw-isa'w wapoti' kohafel mehip. Ea' Jisas na'ipa esis mamasa'w na'i, “Ipe' so'akwa anom gwa'aimi.”

<sup>56</sup> Ea' sati amama, gegelalasis endilisi nomonas matamea.

Ea' Jisas na'ipas mehupa siela basef anan-imi na'i, “Ipe' ina pi'ipa enin epena amamaga amama, owa'.”

## 9

*Jisas nase'ama maol alupumi ananiami 12-peleim nasapa'am mafe'  
(Mt 10:5-15; Mk 6:7-13)*



1 Nemaŋ anama Jisas nofalai alupumi 12-peleim ananiami mandakolas mafi'i nase'am agof lu'wami nanda'am la'ifima meatofa ambagof hi-ami awami ea' monda' hiesi awes hianai nani-nani nanda'asi sataga bo'wes. <sup>2</sup> Ea' nasapa'am mafe' ma'ipasa basefa epes siowis wambota Godi numafias ea' manda' epes awes nanda'asi sataga bo'wes.

<sup>3</sup> Ea' anan na'ipam na'i, "Ipe' ina pefa' anom amamaga bandefah isalef gwa'aimi moni, owa', hapaimi. Ipe' ina pefa' siogw biagw atogw, owa'. Pefa' atona etin mondandaepa. <sup>4</sup> I'i pefe' piowis anona ipat, ipe' pepe ipat anama atona. Ea' pekwaha wambel anama pefe'. <sup>5</sup> I'i esis owa' sofa'epa pefe' ifagw asasimi, ipe' pekwaha wambel anama pindila'ma usas etap mail bo'wagah ipe'imi ma esis sitilipa sogawa waf aonai esis sanda'anai ofagena asasinai atona."

<sup>6</sup> Ea' alupumi Jisasi makwaha anama mapoma mafe' wambel anama hiagoma ma'ipasa basef bu'wami Godi. Ea' magiambama epes awes nanda'asi sape wambel hiagomai manda'as bo'wes wapoti'.

*Herot name' basefa Jisas*

*(Mt 14:1-2; Mk 6:14-16)*

<sup>7</sup> Gavman dembinai king Herot numafi etap hiagoma Galili name' basefa amamaga amama hiami mataga, ea' ina nogawam andeande' ea' nomonas matamea mafe'. Dei' main, enis epes sa'i, "Jon notanima nohafel hi'agif wapoti'."

<sup>8</sup> Ea' enis sa'i anom basefa Elaija profet fowa'inai sa'i, "Anan nohafel wapoti'."

Ea' enis sa'i, "Anona aman profet fowa'inai notanima nohafel wapoti'."

<sup>9</sup> Ea' Herot na'i, "Jon ae' atopa'mana. Ea' aman anama ame' basefanai, anan emi egafuna?"

Ea' nape la'ela'ef na'i niti Jisas.

*Jisas nase'asa gwa'aimi epes hiesi 5,000-peleis  
(Mt 14:13-21; Mk 6:30-44; Jo 6:1-13)*

<sup>10</sup> Aposel alupumi Jisasi motanima mafi'i ma'ipa Jisasa amamaga maol amam manda'ana. Ea' anan nao'wam makwaha enis epes, amam atom mafe' anona taun Betsaida. <sup>11</sup> Ea', esis amam nematawa hiesi sogawa anama napoma sagi'mana safe'. Safi'mai anan, nanda'mas nemaf bu'unai nandanifel ma esis safi'i. Ea' nawali-pasa basefa epes siowis wambota Godi numafias. Ea' nanda' epes awes nanda'asi sataga bo'wes.

<sup>12</sup> Wambomota felefele'ma owamb alupumi ananiami 12-peleim mafi'i ma'ipana ma'i, "Ine' nesapa'as sofo'o wambel aof sape felefele'i ma sogolopa gwa'aimi sogolopa sea'oma. Dei' main, anae' afa' wapoma wafiguma epes a'agoma."

<sup>13</sup> Ea' Jisas nagwamam na'ipam na'i, "Ipe' etipa pese'as gwa'aimi."

Ea' amam ma'i, "Afa' gwa'aimi owa' hiame. Bret lagel wa'ana atona maloma agof biam ea' amama atom ma'oh. Ea' ine' na'i afa' ofe' utalai gwa'aimi ma amam nematawa isima hiesi?"

<sup>14</sup> Amam atom hiami 5,000-peleim mape.

Ea' Jisas na'ipa alupumi ananiami na'i, "Ipe' pi'ipa esis amam nematawa sope sefe' oto otowa sotagama wambotagw 50-peleis etis."

15 Ea' manda' amam nematawa hiesi sape.  
 16 Ea' Jisas nafela bret anama lagel wa'ana atona naloma agof biam, naniga nati heven ilif nanifela God. Ea' nawalana naso' alupumi ananiami maso' esis amam nematawa hiesi hi'alas. 17 Sa'am elihis dondo', alupumi ananiami matatama tukwakwanimi ma'ihi maolo'wam holalef lu'wami 12-peleim si'im endilisi.

*Pita nawalapa basefa Jisas na'i anan Dembinai Krai, God nandandepana nasapa'ana nafi'i*

*(Mt 16:13-19; Mk 8:27-29)*

18 Anona nemaf Jisas atotona nanda' beten, alupumi ananiami mape malomana nahali'am na'i, "Esis amam nematawa sa'i ae' aman emi egafuwi?"

19 Ea' amam magwa basef na'ama ma'i, "Enis sa'i ine' Jon aman napisi'as embeli. Ea' enis sa'i ine' anona profet fowa'inai netanima nehafel wapoti', ea' enis sa'i ine' Elaija."

20 Ea' nahali'am na'i, "Dei' ipe' pa'i Ae' emi egafuwi?"

Ea' Pita nagwa basef na'i, "Ine' Krai, God nandandepena nasapa'ena nafi'i."

*Jisas na'i anan nambimb noga' notanima nohafel wapoti'*

*(Mt 16:20-28; Mk 8:30-9:1)*

21 Ea' Jisas na'ipam mehip na'i amam ina mi'ipasa basef amama enis epes mi'i anan Krai, owa'. 22 Ea' na'i, "Ae' ataga epen endilisiwei nambimb efa' nimanimi lu'wami ma anom agufumi dambami moloma anom dambami pris maloma anom mawalipasa mi'uli Godi nambimb mowa'

alafugaha ae', mohe ega'. Ama nimeguf biam hi'ilama anona neafe'ma wanomi, God nefele etanima ehafel wapoti'."

<sup>23</sup> Ea' na'ipa alupumi ananiami na'i, "Ae' efa' nimaniami anda' maol Godi sehe ega' lawag usi'inai tu'wanainai. Emi egafis si'i sila Ae', esis senda'am na'ama etin si'i Ae' la'ela'ef nimeguf danda ma sieili. Ea' sesambala ukup asasimi ma maina maol esis sa'i seanda'anai. <sup>24</sup> Dei' main, emi egafis ukup mopoma ambagof asasimi atom, si'i sihapilam tatala'im, anona nemaf ambagof asasimi higililam. Ea' emi egafis ukup mopoma Ae' ma sesambala ambagof asasimi etap anae', anona nemaf ambagof asasimi God nofa'ami sotaniamani sope andeande' la'ela'ef hihif. <sup>25</sup> I'i emi egefis senda' maol naninani ma sefa' gwa'aimi hiahaom amamaga hiami etapami atom higililalami, esis wapoti' awes higililas selomam. Dei' amamaga amama nambimb mi'giambamas mi'imama? Owa'etin. <sup>26</sup> Ae' ataga epen endilisiwei. I'i emi egafis ambagof aoma Ae' sondafa'me eloma basef Ae'ami, Ae' wapoti' ambal aona epes isima endafa'mas nemaf anama Ae' ifi'i eloma amamaga bu'wami mafifili Ae'ami, elomai mafifili howalagon Godi maloma amam ensel Godi wapoti'. <sup>27</sup> Ae' a'ipipa endilisi, enipa paitu na'ae nambimb ina pega' ulal, ata' owa'. Enipa nambimb piti epes siowis wambota Godi numafias."

*Alop Jisasi nataga naloma howalagon lu'unai  
nandati na'ana  
(Mt 17:1-13; Mk 9:2-13)*

<sup>28</sup> Jisas na'ipasa basef amama ma ea', nimeguf amama 8-peleim mafe'ma ea', anan nao'wa Pita naloma Jems naloma Jon, nao'wam mondowasa' anona halaf launai ma nonda' beten. <sup>29</sup> Anan nape nanda' beten etin, amaga ananinai nataga nandati na'ana, ea' luwaguf nalami mataga afitim endilisi howalagon. <sup>30-31</sup> Ea' amam biam fowa'imi Moses naloma Elaija mataga maloma nafifili pepel ilifanai ea' maitu ma'i malomana. Amam ma'i ma nambimb Jisas nila okom Godi ma nokwaha etap anae' noga' gani Jerusalem. <sup>32</sup> Pita naloma alupumi biam ananimi amam naep nimanim endilisi ma'i mo'oh etin. Ea' mohafel mati nafifili Jisasi maloma amam amama biam maitu malomana.

<sup>33</sup> Amam biam ma'i mokwaha Jisas mefe', ea' Pita na'ipana na'i, "Dembina, afa' wape na'ae fafas. Afa' ola' anom aolah wanom mondan-daepa. Ine' anona, Moses anona, Elaija anona."

Pita ina nogawa andeande'ma na'i basef amama, owa'. <sup>34</sup> Anan ata' na'i basef etin, anom ilagw maofenia amam ea' umbamaham.

<sup>35</sup> Ea' anona malogel na'i natagai ilagw nomon na'i, "Anama anan Nogalome ae'anai. Ae' andan-depana ea'. Ipe' peme' basef ananimi."

<sup>36</sup> Malogel anama na'i ea', amam mati Jisas atona naitu nalomam. Ea' amam malogof maso', ina ma'ipa enis epesa amamaga amama matulumi, owa'.

*Jisas natofa ambal aonai nape anona aman sa'unai ambo'ona  
(Mt 17:14-21; Mk 9:14-29)*

<sup>37</sup> Naman weflu amam makwaha halaf anama makini', ea' enis amam nematawa hiesi safi'mai Jisas eaf. <sup>38</sup> Anona aman naitu la'afena esis na'i, "Dembina, ae' ahali'ina mehipe a'i, ine' niti nogalome ae'anai uwahipina. Ea' anan atotona. <sup>39</sup> Anona ambal aonai nahapilana la'ifina ea' na'i mehipe endilisi. Ea' naolana kwapete' endilisi, ifat nataga sisih malogel ananinai. Ambal anama nahambombaga alop ananinai endilisi, ea' ina nakwahona, owa'. Napaina la'ela'ef. <sup>40</sup> Ea' ae' dei' ahali' alupumi ine'imi ma motofa ambal anama aonai nefe'. Ea' amam ina la'ifim."

<sup>41</sup> Ea' Jisas nagwamama basef na'ama na'i, "Ipe' amam nematawa owa' pembale'efa Ae'. Ea' opalef ipe'imi owa' mope andeande'. Nimeguf ma'um ae' ata' epe elomepa wapoti' ma efa' nimanimi ipe'imi? Ipe' fa'an pifi'mai Ae'."

<sup>42</sup> Nogalomana ata' nafi'i etin, ambal anama aonai naolana nafe' nowa etap nakoto'ana kwapete' endilisi. Ea' Jisas ninifala ambal aonai nanda' aman anama so'uso'win bo'ona ea' nase'anan notanima nafe'ma ahalomana ananinai. <sup>43</sup> Amama atom dei' amam nematawa hiesi sati pepel lu'unai Godi gegelalasis kwapete' endilisi.

*Jisas na'iam bifa nambimb sahana noga'  
(Mt 17:22-23; Mk 9:30-32)*

Esis ata' nomonas matamea mafe'ma etina amamaga amama Jisas nanda'ami. Ea' na'ipa alupumi ananimi na'ama na'i, <sup>44</sup> "Ipe' pembe' aligah andeande'ma basef dei' ae' a'ipipami. Ae' ataga epen endilisiwei nambimb felefele' anona

aman nose'asa ae' efe'ma lagof amam naumbih ae'ami.”

<sup>45</sup> Alupumi Ananimiti mame' basef amama ea' ina mogawa ofagema, owa'. Dei' main, mandambaho'ma amam. Ea' amam umbamahama meahali'ana ma basef amama ofagema.

*Emi nape dembinai?*

*(Mt 18:1-5; Mk 9:33-37)*

<sup>46</sup> Ea' alupumi Jisasi mandahihianamam ma'i emi nepe dembinai amamunai. <sup>47</sup> Ea' Jisas nogawa nomonas amama mape opalef amamumi, ea' nasa'mai enin sa'usaw'in nafi'i naitu nalomana. <sup>48</sup> Ea' na'ipam na'i, “Emi egafis sese' opalefa sigiambama enin sa'usa'win si'i ini'i ma ukup asasimi mopoma Ae', esis sase'e opalef Ae' wapoti' sagiambame. Ea' emi egafis sagiambama Ae'i, esis saso' opalef Anan nasapa'e afi'i wapoti'. Dei' main? Emi egafis sepe agof a'asi la'afena ipe' hipei, esis sape dembesi sali'ma ipe'.”

*Epen owa' nofala ipe' naumbih, enin alupunai ipe'inai*

*(Mk 9:38-40)*

<sup>49</sup> Ea' Jon nagwamana basef na'ama na'i, “Dembinai, afa' wati anona aman natofa ambagof awami ma agel ine'inai. Anan ina nagi'mafa. Ea' dei' wati watalagamana.”

<sup>50</sup> Ea' Jisas na'ipana na'i, “Ipe' ina petalagamana, owa'. Dei' main? Emi egafin ina naumbih ipe'ini, inima alupunai ipe'inai.”

*Enis Samaria sili'akwa wambel sandaiwa'ma Jisas*

51 \*Nogota God na'i nofa' Jisas nolata heven nafi'i felefele', ea' Jisas okom la'ifim na'i nefe' Jerusalem. 52 Ea' nasapa' anom amam mali' mofa' basef ananimi mafe'. Mafe' mawis anona wambel esis Samariai ma meandondomba amamaga ananimi. 53 \*Ea', esis wambel anama sowa' alafugaha Jisas sandaiwa'ma\* sofa'ana sofe' ipat asasinai. Dei' main? Esis sogawa anan na'i nefe' Jerusalem. 54 \*Ea' alupumi amama biam ananimi Jems naloma Jon mati waf anama ma'ipana ma'i, "Dembina, ine' na'i afa' ofalai nif fandumi misila'i hevena fendo epes isima?"

55 Ea' Jisas nandamboma ninifala amam biam.

56 Ea' mafe' anona wambel.

### *Epen na'i nila Jisas*

*(Mt 8:19-22)*

57 Amam ata' mafe' eaf etin, anona aman na'ipana na'i, "Ae' a'i efe' elomena. Ea' ofe' etin anama hiagoma ine' na'i neafe'ma."

58 Ea' Jisas nagwamana na'ipana na'i, "Nom-bagw aolopumi ma'oh mala etap wambel amamunai. Amiguf wapoti' mufia' mafe' ilifi mala' alegah mapeih gani ilif, ea' ae' owa'etin. Ae' ataga epen endilisiwei wambel a'e ma a'oh alo balaga ae'anai."

59 Ea' na'ipa anona aman na'i, "Ine' nifi'i nila ae'."

---

\* 9:51: Mk 10:32      \* 9:53: Jo 4:9      \* 9:53: Esis Sameria sandakolas la'ela'ef gani halafuta Gerisima sanda' lotuma God. Ea' esis Juda sanda' lotu ma God Jerusalem atogon. Ea' esis isima Sameria sandaiwa'ma siegiambama Jisas nefe' Jerusalem, owa'.

\* 9:54: 2 Kin 1:9,16



Ea' anan na'i, "Ae' a'i ata' epe imafi ahalome, ata' igiambamana ma noga' ewana ma nope ea' ifi'i ilina."

<sup>60</sup> Ea' Jisas na'ipana na'i, "Hapainai, sowago esis etis isima saga'i. Ea' ine' fo'lo newalapa basefa epes siowis wambota Godi numafias."

<sup>61</sup> \*Ea' anona aman na'ipana na'i, "Dembinai, ae' a'i ilina. Ea' ine' ata' ni'i a'e ma ae' efe'ma esis wambota ae'anai inifelis i'i nemaf bu'unai ma esis sili'?"

<sup>62</sup> Ea' Jisas na'ipana na'i, "Emi egafin nehafel nili' nenda' maol aofi ma nendamboma niti alafuga ma neakwaha maol ananinai, enin ina la'ifina nenda' maola ni'ipas siowisa wambota Godi numafias, owa'."

## 10

### *Jisas nasapa' alupumi ananimiti 72-peleim mafe'*

<sup>1</sup> Dembinai nandandepa anom alupumi ananimiti 72-peleim nasapa'am mafe' biam atom mali'ana mafe'. Anan nasapa'am mafe' taun wambel hiagoma anan na'i neafe'agoma. <sup>2</sup> Ea' na'ipam na'i, "Ipe' piti aof hianai gwa'aimi hiami maof ea'. Ea' epes sanda' maoli owa' hiase, kwawie'is. Ea' ipe' penda' beten pihali' Dembinai ofagonama aofi. Pihali'ana ma nosapa' epes hiesi sefe' sonda' maola sola gwa'aimi ananimiti sembe'am etifigin. <sup>3</sup> Ipe' fo'lo. Peme', ae' esapa'epa pefe' si'i sipsip nogami la'afena nombagw wandafumi aolopumi. <sup>4</sup> Ipe' ina pefa' paos manisi soloma brasbeli su, owa'. Ipe'

---

\* 9:61: 1 Kin 19:20

ina penda'masa nemaf bu'unai enis amam nematawa eaf, owa'. Pefe' mehip. <sup>5</sup> I'i ipe' pefe' piwis anona ipat, ata' pili' pi'i na'ama pi'i, afa' wa'i God nonda' opalef ipe' hipei pape ipat anae' mope awanem. <sup>6</sup> I'i enin epen opaf awanena nepe ipat anama, ea' basef bu'wami ipe'imi mopoma epen inima. I'i owa', hapaimi, basef amama bu'wami motanimani mopomepa la'ela'ef. <sup>7</sup> Ipe' peape ipat anama atona. Ina pepe pefe' ifagw mamumami, owa'. Pepe ipat anama atona pea' gwa'aimi embel esis sasi'ipami. Dei' main, epes sanda' maoli andeande'ma mofa' otamba ma maol amam manda'anai.

<sup>8</sup> I'i ipe' pefe' piwis anona taun ama esis sofa'epa pefe' ifagw asasimi, ipe' pefa' gwa'aimi esis sase' ipe'ami. <sup>9</sup> Ea' penda' isima awes nanda'asi bo'wes wambel anama. Ea' pi'ipa esis pi'i, 'Nemaf anama felefele'ma neataga ma ipe' piowis wambota Godi numafipa.' <sup>10</sup> Ea' ipe' i'i pefe' piwis anona taun ama esis owa' seafa'epa pefe' ifagw asasimi, ipe' pefe' pitu eaf taun anama pi'i, <sup>11</sup> 'Etap ma taun anama ipe'inai maila bo'wagah afa'imi, ea' afa' upati'am motanima mefe'mago ipe'. Ama ipe' ukup mondanda' pegawa basef amama andeande'. Nemaf nataga felefele'ma epes siowis wambota Godi. Ea' ipe' pandaiwa'.' <sup>12</sup> Dei' ae' a'ipipa, nemaf anama lu'unai God nowaloga epesanai anan anona nemaf niti esis fowa' gani sape Sodomu uwahipis andeande'. Ea' epes isima wambel anama anan ina niti uwahipis, owa'. Nimanimi lu'wami endilisi anona nemaf motagamas."

*Wambel bieffina uwahipis esis owa' somboma  
opalef sombale'efanae  
(Mt 11:20-24)*

<sup>13</sup> “Ae' ati ipe' Korasinipei paloma Betsaidaipei uwahipipa endilisi! Nimanimi lu'wami anona nemaf meatagamepa. Epes isima fowa' gani sanda' waf aonai sape wambel bieffina Tair naloma Saidoni, esis ina sati ikwaf la'ifinai naninani si'i dei' anda'ana wambel ipe'inai, owa'. I'i esis siti pepel anama, esis sowaho'am begah pepe'atami si'i luwaguf tol sope nif agambeh. Ama sihi'amba enis epes esis samboma opalef endilisi safe'ma God. Owa'etin. <sup>14</sup> Anona nemaf God nowaloga esis amam nematawa hiesi, niti esis fowa' gani sape Tair naloma Saidoni uwahipis andeande'. Ea' ipe' owa'. Anona nemaf pefa' nimanimi awami endilisi. <sup>15</sup> Ea' ipe' Kaperneam, anona nemaf esis sefela agof ipe'imi molata ilif? Owa'etin. Anona nemaf God nokwahipa pefe' pewala wambel aonai hel.”

<sup>16</sup> “Emi egafis seme' malogof ipe'imi, esis same' malogel Ae'anai wapoti'. Ea' emi egafis sese'epa alafugah ipe', esis saso' alafugah ma Ae' ea' sase'ana alafugah Anan nasapa'e afi'i wapoti'.”

*Alupumi Jisasi mafe' manda' maoli 72-peleim  
motanima mafi'i*

<sup>17</sup> Ea' amam amama mafe' manda' maoli 72-peleim motanima mafi'i mandanifel endilisi ma'i, “Dembinai, afa' wahapila agel ine'inai, ambagof awami mame' basef afa'imi.”

18-19 Ea' anan na'ipam na'i, "Ae' ati Satan nowai heven si'i otaga holala ma dililimbugwalag. Peme', ae' ase'epa pepel ipe' ma nambimb la'ifipa pefa'asa iguf awami wandafumi moloma awisiguf. Ama la'ifipa pili'amona epen aonai Satan naloma pepel hianai ananinai. Ea' ina nambimb anom amamaga mohambombagepa, owa'.<sup>20</sup> Ea' ipe' ina pendanifel ma ambagof awami mame' basef ipe'imi, owa'. Ipe' pendanifel ma God nanda' agof ipe'imi mail buk ananinai gani heven ilif."

*Jisas nanifela Ahalomana God*

*(Mt 11:25-27; 13:16-17)*

<sup>21</sup> Nogota anama atona Ambal Bu'unai Godi nawalapa danifela opaf Jisasi ea' Jisas na'i, "Ahalome, ine' Dembinai ma ilif etapi. Ae' afela agel ine'inai anifelina. Dei' main? Ine' nambaho' amamaga amama ma esis epes gawaisi sofa' gawa lu'unai, ea' nambomam nihi' ambasam epes isima gawa a'asi falafisi isima sape si'i awasi. Ahalome, okom ine'inai na'i, ea' amama atom.

<sup>22</sup> Ahalome ae'anai nanda' amamaga hiami hi'alam mape lagel ae'anai. Ina enin epen negawa ae' Nogalomana Godi, owa'etin. Anan atona nogawe. Ea' owa' enin epen negawa Ahalome, owa'. Ae' Nogalomana ananiwei atowe egawana. Ea' emi egafis ihi'ambasa Ahalomei, isima wapoti' esis etis sogawana."

<sup>23</sup> Ea' anan nandamboma nati alupumi anan-imi atom mape malomana na'ipam na'i, "Epes sati amamaga ipe' patulumi esis sandanifel.

24 Dei' main? Fowa' gani amam king dambami hiami maloma amam profet hiami ma'i miti amamaga amama dei' ipe' patulumi. Owa'. Ukup amamumi maimailam endilisi ma mame' basef amama ipe' pame'ami, owa'. Amam ina mame'am."

*Aman Samariainai nati naumbihinai uwahip-ina*

25 Anona aman gawainai nawalipasa mi'uli Godi nohafel na'i nogwamba Jisas nememe'mana. Ea' na'ipana na'i, "Dembina, ae' enda' maina nambimb efa' ambal namunai eape andeande' la'ela'ef?"

26 Ea' Jisas na'ipana na'i, "Maim basef mapoma mi'uli Godi? Ine' natalifam na'imama?"

27 Ea' anan nagwamana basef na'i, "Ukup ipe'imi mohafela Dembinai God ipe'inai mimi-lana na'ama. Ukup ipe'imi mimilana hi'ilam, pese'ana ambagof opalef moloma pepel ipe'inai pese'anam hi'ilama Dembinai God atona. Ea' ukup mimila enis epes sape felefele'ma ipe'i si'i ukup maimaila ipe' etipa."

28 Ea' Jisas na'ipana na'i, "Amama ine' nagwa basef andeande'. Ine' nenda'am na'ama ma nambimb neape ambal namunai la'ela'ef."

29 Aman anama na'i nondanda' agel ananinai atona nope bo'ona. Ea' na'ipa Jisas na'i, "Epes sape felefele'ma ae'i, esis emi egafis?"

30 Ea' Jisas nagwamana anom basef na'i, "Anona aman nakwaha Jerusalem nafe' nakini' Jeriko. Ea' anom manda' wali matolona eaf, mahana kwapete'ana mola'ipana amamaga hi-ami luwaguf maim ananimi. Amam manda'am

na'ama makwahona mafe'. Anan nataga si'i naga'i.” <sup>31</sup> Nemaŋ anama anona aman pris naila eaf anama nafe'. Ea' nati aman anama, nisila'ana naila eaf wa'ol atogon nafe'. <sup>32</sup> Ea' anona aman wambota Livai naila eaf anama nafi'i wapoti'. Nafi'i nati aman anama nisila'ana naila eaf wa'ol atogon nafe'. <sup>33</sup> Ea' anona aman Samariainai\* naila eaf anama nafi'i natagama aman anama. Anan natolona nati owahipina endilisi. <sup>34</sup> Ea' nafe' felefele'ma anan nakolo'wa wel marasin naloma embel waina melegw ananimi, ea' nowa'manam. Ea' nafelana nawamonana natoma donki ananinai nofa'ana nafe' nahaponana nape ipat esis fi'ife' sapeinai ea' na'ipa aman numafi ipati ma numafiana andeande'. <sup>35</sup> Ama wafilu anan nase'ana otamba siliwa biam aman numafi ipat anamai na'ipana na'i, 'Ine' nimafi aman anama andeande'. Ama i'i enin moni ine'inai nese'anana, nambimb itanimai egwamenana.’ ”

<sup>36</sup> Jisas na'ipana basef amama ea' nahali'ana na'i, “Dei' ine' okom nape na'imama? Amam wanom maila eaf mafi'i, emi nanda'am si'i aman nape felefele'ma aman anama amam awami mahana?”

<sup>37</sup> Ea' nagwamana na'ipana na'i, “Aman anama Samariainai nati anan uwahipina nagiamamana.”

Ea' Jisas na'ipana na'i, “Ine' fo'lo nenda'am na'ama etin.”

### *Marta kwaloma Maria*

\* **10:33:** Esis Sameria naumbih esis Judai. Basef amama Jisas nihi'ambapa ma ape' ina ukup mila esis alupisi etis, owa'. Ukup mila naumbih wapoti'.

<sup>38</sup> Jisas naloma alupumi ananiami mafe' eaf, ea' nataga anona wambel nafe' nawis. Ano'w nemata'w agili'wa Marta kofa'ana kwafe' ipat akwa'unai. <sup>39</sup> \*Owama'w akwa'ukwi agili'wa Maria. Maria kwafi'i kwape felefele'ma bo'wagah Dembinai, kwame' basef ananiami. <sup>40</sup> Ea' Marta kwanda' maol hianai ma kwandondomba gwa'aimi. Okom natanea ma amamaga mamumami. Ea' kwafe'ma Jisas kwa'ipana kwa'i, "Dembinai, ine' niti uwahipiwi. Owame ae'akwi kwa'waha ae' atowe anda' maola andondomba gwa'aimi. Ine' kipa'w kufi'i kwi giambame."

<sup>41</sup> Ea' Dembinai nagwama'wa basef na'i, "Marta, Marta, okom ine'inai napoma amamaga mamumami ma opaf ine'inai nafe' aona ma amamaga hiami. <sup>42</sup> Ea' waf bu'unai atotona ine' a'ena. Maria kwa'i kofa' amamaga amama bu'wami mikila' anom. Ina enin epen la'ifinama nili'amona amamaga amama bu'wami ma akwa'w, owa'."

## 11

### *Jisas nawalipapa ma waf meanda' betenanai* (Mt 6:9-15; 7:7-11)

<sup>1</sup> Anona nemaf Jisas nanda' beten nape anagon. Nanda' betena hi'alan, anona alupunai ananinai na'ipana na'i, "Dembinai, ine' nihi'ambafa onda' beten si'i fowa' Jon nihi'amba alupumi ananiami."

<sup>2</sup> Ea' na'ipam na'i, "Nemaf anama ipe' pi'i penda' beten, ipe' pi'iam na'ama pi'i,

---

\* 10:39: Jo 11:1; 12:2,3

‘Ahalomapa, ape' ma'i agel ine'inai nope bo'ona ma hiesi sefela agel ine'inai lu'una. Ape' ma'i nemaf anama bu'unai nifi'i ma epes hiesi siowis wambota ine'inai numafias.

<sup>3</sup> Dei' ine' nese'apa gwa'aimi mondahama nemaf anae'.

<sup>4</sup> Ine' nekwahomapa waf aonai ape' manda'anai. Dei' main? Ape' wapoti' makwahomasa waf aonai enis sanda'mapanai. Ine' owa' nili'apa mefe'ma amamaga ahifimi meag-wamba ape'i.' ”

<sup>5</sup> Ea' na'ipam anom basef womun etin na'i, “I'i anona aman alupunai ipe'inai nefe' nie'ipa alupunai ananinai owamb amaneta ni'i, ‘Alupinai, ine' se'e bret wanifina <sup>6</sup> ma imafi alupunai ae'anai nafi'i natagama ae', ea' ae' gwa'aimi a'e ma imafiana.’

<sup>7</sup> Ea', aman anama napani ipat nomon nagwa basef na'ipana na'i, 'Ae' andaiwa'ma nese'e noma'w ae', owa'. Ae' awasi sa'oh ea' ao'was ma'oh lehis. Ae' ina la'ifiwi ma esafel ease'ena gwa'aimi, owa'.’ <sup>8</sup> Ae' a'ipipa, aman ahalomai ipat ina okom napomana na'i aman anama alupunai ananinai ma nohafel nease'ana gwa'aimi, owa'. Anan okom aona ma name' aman anama falafala la'ela'ef napomana. Amama atom dei' nohafel nase'ana amamaga hiami anan nahali'anami.

<sup>9</sup> Dei' ae' a'ipipa, ipe' pihali' God, nese'epa amamaga. Amama ipe' peagolopami, nambimb pitolom. Ipe' peha uta, nambimb God nusi'amepana. <sup>10</sup> Dei' main, emi egafis sohali'



Godi, sofa' amamaga. Emi egafis sogolopa amamaga, nambimb sotolom. Ea' emi egafis seha utai, nambimb God nuwisi'amasana esis.

<sup>11</sup> I'i enin so'uso'win nehali' ahalomana ma anona aol, anan ina nambimb nose'an anona yul aonai, owa'. <sup>12</sup> I'i so'uso'win nihali' ahalomana ma anona kofemb, nambimb nose'ana anona aunil aonai? Amama wapoti', owa'. <sup>13</sup> Ea' ipe' amam nematawa aopei pase'asa amamaga bu'wami atoma awasi ipe'isi, ahalomepa ipe'inai nape heven ilifi anan wapoti' nambimb nose'asa Ambal Bu'unai Ananinai esis sahali'anai.”

*Esis sa'i Jisas nanda' maol naloma ambagof hi-ami awami dembinai amamunai agilinama Belsebul*

*(Mt 12:22-30; Mk 3:20-27)*

<sup>14</sup> Ea' Jisas nogalo'mana ambal aonai nape nasopama malogel anona amani. Nafa' nafe', ea' aman anama ambo'ona noga na'i. Ea' esis amam nematawa hiesi ukup matamea ma aman anama nataga bo'ona. <sup>15</sup> Ea' enis epes sa'i, “Anan natofa ambagof awami ma pepel anan dembinai ma ambagof awami agilinama Belsebul.”

<sup>16</sup> Ea' enis epes sa'i sogwambana sofalana sa'i anan ata' nonda' anona ikwaf la'ifinai nafi'i heveni ma sotolona sogawa endilisi God nagiamamana. <sup>17</sup> Ea' anan nogawa ukup asasimi na'ipas na'i, “I'i enis epes hiesi sape etap hi-agoma sondawaloga biefis sopa', ina nambimb la'ifis, owa'. I'i enis epes wambota atona sondawaloga biefis sopa, esis ina nambimb la'ifis sopa', owa'. <sup>18</sup> I'i wambota Satani sondawal biefis sopa', nambimb wambota anama la'ifis sopa'

si'imama? Owa'etin. Ipe' pa'i ae' atofa ambagof awami ma pepel ambal aonai Belsebul. Na'ama ae' dei' a'lipa basef amama. <sup>19</sup> I'i endilisi ae' atofa ambagof awami ma pepel Belsebuli, dei' emi nigiangbama epes ipe'isi satofam? Owa'. Dei' epes isima sihi'ambepa basef amama ipe'imi owa' endilisimi. <sup>20</sup> Pepel Godi atona nagiangbama ae' atofa ambagof awami. Na'ama dei' ipe' pegawa nemaf anama epes siowis wambota Godi numafias nataga ma ipe' ea'."

<sup>21</sup> "I'i anona aman la'ifinai nohapila wambawa maim nopoma ipat ananinai andeande', amamaga ananiami hiami mopen andeande'. <sup>22</sup> Ea' i'i anona aman la'ifinai endilisi nikila' aman anama ma anan notaga la'ifina nifi'i nonda' wandaf nolomana nikila'ana wambawa maim aman anama nawamona okomami, nofa' amamaga ananiami nowalogam mefe'ma anom amam.

<sup>23</sup> Emi egafis owa' alupisi ae'asi owa' sepe la'ela'ef neloma ae'i, esis naumbih ae'asi. Ea' emi egafis owa' sekolasa sipsip moloma ae'asi, esis satofa sipsip mafa' mefe' atona etin.

*Ambal aonai anotanima nafi'i nawis epen in-ima*

*(Mt 12:43-45)*

<sup>24</sup> Nemaf anama anona ambal aonai nakwaha enin epen nawisi nafi'i, anan nafe' anama fatauguma nogolopa anagon na'i neapoma noma'w. Nagolopagon owa' niti anagone ea' ni'i, 'Ae' etanima efe' ipat fowa' apeinai.' <sup>25</sup> Ea' nafi'i nati ipat anama sambefana andeande' sofalo'mana nape. <sup>26</sup> Ea' notanima nafe' nao'wai anom ambagof awami 7-peleim wapoti' mafi'i mawis

mape ipat anama. Ambagof amama awami endilisi manda' waf aonai nikila' waf aonai fowa' nali' nanda'anai. Fowa' epen inima nape awen, ea' dei' nape awen endilisi nikila' pe fowa' nali' napeinai.”

*Waf esis sofa' danifel endilisinai*

<sup>27</sup> Jisas ata' na'i basef amama etin, enis epes hiesi safi'i salipana. Ea' ano'w nemata'w kwape la'afena esis kwa'i na'ama kwa'i, “Nemata'w akwama fowa' kolaena ma kwase'ena nomambeh ine'i, akwa'w kwandanifel.”

<sup>28</sup> Ea' Jisas na'i, “Owa'etin. Ipe' amam nematawa pame' basef Godi ma pagi'mami, ipe' pandanifel ea'.”

*Enis sa'i siti ikwaf la'ifinai si'i God nanda'anai  
(Mt 12:38-42; Mk 8:12)*

<sup>29</sup> Amam nematawa hiesi safi'i sandakolas sape, Jisas na'ipas na'i, “Ipe' amam nematawa dei' pape etap anae', ipe' epes aopei. Dei' pa'i piti anona ikwaf la'ifinai. Ae' owa' enda'ana. Ikwaf anama fowa' gani God nihi'amba profet Jonai atona anona nemaf ihi'ambepana ipe'. <sup>30</sup> Anona profet Jona nataga si'i anona ikwaf nihi'amba esis amam nematawa Ninivaisi. Ea' na'ama etina ae' ataga epen endilisiwei ataga ape si'i anona ikwaf Godi ma ipe' amam nematawa pape nogota anae'. <sup>31</sup> Anona nemaf God nowaloga epes, nemaf anama ano'w nemata'w kwin dembe'wi kwapani gani wa'ol aon nowalama lambihili-finama kohafel koloma ipe' pape na'ae kogwamepa basef motanima milipa kwi'i ipe' epes aopei. Dei' main, kwin akwama kwapani gani etap nafe' netambela, ea' kwafi'i kwame' basefa

gawa lu'unai dembinai king Solomon nawali-pasanai. Ea' dei' anona nikila' Solomon nape na'ae. <sup>32</sup> Nema'f anama God nowaloga esis amam nematawa esis epes Ninivaisi sohafel sola' basef motanima milipa ma waf aonai ipe' panda'anai. Dei' main? Esis Ninive same' basef Godi Jona na'ipasami, ea' samboma opalef sakwaha waf aonai safe'ma God. Ea' dei' anona aman nikila' Jona nape na'ae.

*Lam nanda' alop si'ina howalana*

*(Mt 5:15; 6:22-23)*

<sup>33</sup> Epes ina sokata lamifah nomon ifagw sosapa'am sombaho'am mafe' owina maloh, owa'etin. Esis sawamonam matoma balatagw ilifa sawis sati howalagon. <sup>34</sup> Naep nomon ukup ipe'imi si'i lama alop si'ina ipe'inai. I'i ukup ipe'imi bo'om mupe, alop si'ina ipe'inai nififil hi'ilana. Ea' i'i ukup ipe'imi aom, nambimb alop ipe'inai hi'ilana akutina. <sup>35</sup> Dei' ipe' pinduma-fuma andeande'. Na'ama nafifili nape nomona ipe'i akotina. <sup>36</sup> I'i alop ipe'inai nififil hi'ilana, ina anagon kwaie'ugun akotigin, owa'. Ea' nambimb alop ipe'inai howalana hi'ilana endilisi si'i lamifah matoma mafifil mafifimipa.”

*Jisas na'i basef maila amam Farisi maloma amam mawalipasa mi'uli Godi ma waf aonai amam manda'anai*

*(Mt 23:1-36; Mk 12:38-40; Lu 20:45-47)*

<sup>37</sup> Jisas nanda' basef amama hi'alam, anona aman Farisi nofalana na'i nifi'i nea' gwa'aimi nolomana. Ea' Jisas nafe' nawis nomon ipat natoma tebol. <sup>38</sup> Ea' Farisi anama nati anan nafe'

nape na' gwa'aimi owa' nesa'opa lagof muli' si'i waf amam Farisi mailanai. Ea' anan okom natanea ma waf anama.

<sup>39</sup> Ea' Dembinai na'ipana na'i, "Ipe' Farisi, ipe' pandombasa kapi plet ande'am atom andeande'. Ea' nomon owa'. Ipe' opalef nomon si'ipama waf walana' naloma anona waf aonai wapoti'. <sup>40</sup> Ipe' epes ukup mahipei. Ae' a'ipipa endilisi, God nanda' amamaga ande'am, nomonam wapoti'. <sup>41</sup> Ea' amamaga mala nomon kahi plegw ipe'imi, amama ipe' penda'am pese' epes kwahusi pi-giambamas. I'i ipe' penda'am na'ama, nambimb amamaga hiami ambo'om andeande'.

<sup>42</sup> Ipe' Farisi uwahipipa ma nimanimi lu'wami nambimb meatagamipei. Ipe' pawaloga nambawa lombo maloma akwal mamumami hiami pase'ana tu'wanim God. Ea' ipe' pindihi'ama waf bu'unai ukup maimaila Godanai ukup mase'epana nape. Waf anama naloma waf pindalali pese'ana amamaga maim Godanai, anama pekolasana pihapilana etin pilana.

<sup>43</sup> Ipe' Farisi, ae' a'i uwahipipama niman-imi awami anona nemaf meatagamipei! Ukup ipe'imi mase'epa pa'i pepe siaifah bu'wami naep epesi nomon ifagw pa'i basef papeimi. Ea' esis amam nematawa seanifelipa sonda'mepa nemaf bu'unai ipe' anama epes hiesi sandatama sapoma.

<sup>44</sup> Ae' a'i uwahipipa endilisi ma nimanimi awami anona nemaf meatagamipei! Ipe' si'i hiegilif mape mandambaho' etap owin, epes ina

sogawam, owa'. Esis satoma safe' ilif ande' atogon.”

<sup>45</sup> Anona aman gawainai nawalipasa mi'uli Godi nagwamana basef na'i, “Dembina, ine' na'iam na'ama, na'i basef la'ifimi na'i afa' epes aofai.”

<sup>46</sup> Ea' Jisas nagwamana basef na'i, “Ipe' amam dembipei gawaipei pawalipasa mi'uli Godi, ae' a'i uwahipipa ipe' wapoti' ma nimanimi awami anona nemaf meatagamipei. Ipe' panda' amamaga nimanimi mapei'as esis amam nematawai, noma'w nahas. Ea' ipe' owa' pigiambas pefa' nimanimi amama lagof ipe'imi, owa'etin.

<sup>47</sup> Ae' a'i uwahipipama nimanimi awami anona nemaf meatagamipei! Esis akusipa ipe'isi saha amam profet maga', ea' ipe' pala' hi'agilif amamumi. <sup>48</sup> Waf anama nawalapa basef alihim na'i ipe' pa'i a'e ma esis saha amam profet fowa'imi maga'. Ea' dei' pala' hi'agilif amamumi, <sup>49</sup> panda'am na'ama si'i God anan gawa bu'unai napeinai na'i, ‘Anona nemaf ae' esapa' anom profet moloma Aposel mefe'mago esis, ea' soha anom moga' ea' anom sonda'am kwapete'am.’

<sup>50</sup> Ea' dei' amam nematawa nogota anae'isi, anona nemaf God nose'asa nimanimi ma ofagema amama saha profet hiami afum hi'alam fowa' gani dambadamba God nanda' ilif etap ea' nafi'i nataga nogota anae'. <sup>51</sup> Nali'i esimbel mali'i Abeli nafi'i natagama profet esimbel Sakaraiai sahana afuna la'afena ipat lu'unai Godi sanda' lotuwanai naloma balata saofa mafis sase' Godami. Amama ofagema nambimb mila ipe' etipa dei' pape etap anae'.

<sup>52</sup> Ipe' amam gawaipei pegawa mi'uli Godi, ae' a'i uwahipipa ma nimanimi lu'wami anona nemaf meatagamipei. Dei' main, ipe' pakwaha ki anama pefa' gawanai. Ipe' etipa ina pawisi' uta pawis nomon, owa'. Ipe' pahopa eafa enis sa'i siowis nomoni.”

<sup>53</sup> Ea' Jisas nakwaha ipat anama nawis ande', amam mawalipasa mi'uli Godi maloma amam Farisi wandafum kwapete'am endilisi ma magolopa anona eafa meanda'mana basef. Amam ma'i mogwamba malogel ananinai ma basef mamumami mahali'anami. <sup>54</sup> Amam mape mati anan la'ela'ef ma'i mome' anan ni'i anom basef motaga malogel ananinai ma monda'mana kot.

## 12

*Umbamehepama waf baso'mainai ma pie'i basefa malogof biam*  
(Mt 10:26-27)

<sup>1</sup> Nemaf anama do'ok enis amam nematawa hiesi endilisi safi'i sonduwa'anima endilisi sandafofo'asanama etin bo'wagah asasimi. Ea' Jisas nali' na'ipa alupumi ananimi na'i, “Ipe' pindumafuma andeande'ma yis amama amam Farisi. Basef ofagema ma yis amama ma'i waf baso'mainai ma'i malogof biam. <sup>2</sup> Amamaga mape mandambahi'i, anona nemaf motaga alihim. Amamaga mandambaho' mape, anona nemaf hiesi sotolom alihim. <sup>3</sup> Ea' basef hiami ipe' panda'am owambi anona nemaf sotolom alip. Ea' basef ipe' pa'iam so'uso'umbili ifagw

nomoni, nambimb sotoma ifagw ilif sowalapam alihim.

*Ipe' umbamohepama Dembinai atona*  
(Mt 10:28-31)

<sup>4</sup> Ipe' alupipei ae'ipei, ae' a'ipipa na'ama. Ipe' owa' umbamohepama esis soha alop atona neaga'i ea' anona nemaf esis ina la'ifisa sonda' anom amamaga wapoti', owa'. <sup>5</sup> Ea' ae' ata' i'ipipa aman ipe' umbamiehipamanai. Anama nohepa peaga'i, ea' anona nemaf wapoti' la'ifinai ma neakwahipa pefe' wambel aonai hel. Ae' a'ipipa, ipe' umbamiehipamanai, aman anama atona.

<sup>6</sup> Ipe' pegawa, epes satala amiguf sa'umi wanom biam otamba 2 toea. Ea' God ina okom mase'ana anona amil sa'unai na'amainai, owa'. <sup>7</sup> Endilisi, Anan neambam auf malo balagah ipe'imi God neambam dondo' hi'alam. Ipe' owa' umbamehepa. Anan okom napoma ipe' pikila' amiguf hiami amama sa'umi.

*Waf mowalapa agel Jisasi*  
(Mt 10:32-33; 12:32; 10:19-20)

<sup>8</sup> Ae' a'ipipa, ae' ataga epen endilisiwei. Emi egafis sewalapa agel Ae'anai ma amam nematawa hiesi, anona nemaf ae' ewalapa agof epes isima ma naep amam ensel Godi. <sup>9</sup> Ea' emi egafis sowa' alafugaha Ae'i naep amam nematawai, anona nemaf ae' ewa' alafuga esis ma naep amam ensel Godi. <sup>10</sup> Emi egafis seanda' anom basef awami findiwama ae' ataga epen endilisiwei, nambimb God nokwahomasa awami esis sanda'ami. Ea' emi egafis sanda' basef findiwama Ambal Bu'unai Godi, anona nemaf God



owa'etin endilisi ma neakwaha findiwa anama aonai ma epes isima. <sup>11</sup> Nambimb esis sofa' ipe' pefe' piowis ifagw amama esis Juda sa'i basef sapeimi o sofa'epa pefe'ma naep amam dembemi gavman moloma agufumi monda'mepa kot, ipe' ina umbamohepa, owa'. Ipe' ina pi'i, 'Nambimb ape' mi'i basef mi'imama? Nambimb mi'i maim basef?' Owa'. <sup>12</sup> Dei' main, nogota anama atona Ambal Bu'unai Godi nihi'ambepa maim basef atuwasi peagwami.”

*Basef womun etina anona aman otamba hiamunai okom nahaga nagaoli*

<sup>13</sup> Anona aman atotona ma amam nematawa hiesi anan na'ipa Jisas na'ama na'i, “Dembina, ae' a'i ine' ni'ipa sahalome ae'anai nowaloga amamaga amama ahalomafai nese'e amamaga wa'am.”

<sup>14</sup> Ea' Jisas na'ipana na'i, “Ae' andaiwa! Emi nandandepa ae' ma epe eawaloga amamaga ma ipe'? Owa'etin.”

<sup>15</sup> Ea' anan na'ipas na'i, “Ipe' pindumafuma andeande'ma ipe' ina kowalepama anom amamaga. Epen amamaga hiamini endilisi, ina nefa' ambal namunai ma amamaga amama ananimi, owa'.”

<sup>16</sup> Ea' nase'asa anom basef womun etin na'i, “Aof anona aman otamba hiamunai nola gwa'aimi hiami. <sup>17</sup> Aman anama okom napoma anan atona na'i, 'Dei' ae' ata' enda'am i'imama? Ae' ifagw a'e ma etama gwa'aimi ae'ami hiami imbe'am mea'ome.’

<sup>18</sup> Ea' na'i, ‘Ae' enda'am na'ama. Etala ifagw ae'ami ea' ila' dambaimi lu'wami mikila'

fowa'imi. Ama nambimb ikolasom ewa'aniam gwa'aimi wit hiami moloma amamaga hiami bu'wami ae'ami mo'oh ifagw amama. <sup>19</sup> Ea' i'ipa ae' i'i, "Ine' nape andeande'. Amamaga hiami bu'wami mape mondahama afagof hiami. Ea' dei' nepoma noma'w nea' gwa'aimi embel nendanifel nepe." '

<sup>20</sup> Ea' God na'ipana na'i, 'Ine' aman nahaga nagouli! Dei' owamb anae' igi ambal ine'inai nega'. Ea' amamaga amama hiami ine' nanda'am nandondombam ma'ihhi, amama nambimb emi nefa'am?'

<sup>21</sup> Amama na'ama etin si'i epes satama amamaga hiami asasimi atom sambe'am ma'oh. Esis amamaga a'asa naep Godi."

### *Ukup matamea ma hiahaom*

*(Mt 6:25-34)*

<sup>22</sup> Ea' Jisas na'ipa alupumi ananiami na'i, "Ae' a'ipipa, ipe' ina ukup motamea mefe' ma ambagof ipe'imi ea' pi'i, 'Ape' ata' mea' main?' Owa'. Ipe' ina ukup motamea ma alop ipe'inai pi'i, 'Nambimb ape' monda' main mombahe' alop ape'inai?' Owa'. <sup>23</sup> Dei' main, ambagof afa'imi ina gwa'aimi atom. Ea' alop ina luwaguf atom, owa'. <sup>24</sup> Ipe' ukup mopoma amiguf. Amiguf owa' mowa gwa'aimi, mola' gwa'aimi. Ea' owa' mefa' gwa'aimi membe'am ifagw amamumi. God atona nase'am gwa'aimi. Ea' ipe' epes pikila' amiguf amama endilisi. <sup>25</sup> Ipe' emi atuwasi la'ifina okom natanea nawis niwatania anona nemaf wapoti' ma ambal ananai nope nogota laona wapoti'? Owa'etin. <sup>26</sup> I'i ipe' owa' la'ifipama penda' anom amamaga sa'usa'umi

na'ama, dei' maina ipe' ukup ipe'imi motamea ma anom amamaga mamumami wapoti'?

<sup>27</sup> Ipe' ata' ukup mopoma afis. Amam ina manda' maol ina manda' luwaguf maim, owa'etin. Ea' ae' a'ipipa, fowa' gani anona aman amamaga hiamunai Solomon nanda' sosaf hianai ma luwaguf ananiami, sosaf ananinai ina bo'ona si'i afis amama, owa'etin. <sup>28</sup> Otalef amama dei' ata' motawa aof ama naman atef sotopa'am sokwahom mefe' nif. Otalef amama awami God no-falo'mam. Ea' ipe' amam nematawa pikila' otalef amama. Ea' dei' ipe' pembale'efa basef Godi, bale'ef ipe'inai ina la'ifina, ipe' pegawa endilisi anan numafipa andeande' wapoti'. <sup>29</sup> Ea' ipe' ina ukup motamea pi'i, 'Nambimb mea' gwa'a'imi embel eti?' Owa'. Ipe' ina ukup aom motamea ma amamaga amama, owa'. <sup>30</sup> Epes sololama Godi ukup matamea mafe' endilisi ma sogolopa amamaga amama hiami. Ea' ahalomepa ipe'inai nape heveni anan nogawa ea' amamaga amama a'ipei. <sup>31</sup> Ipe' ata' ukup mili' pegolopa waf bu'unai noloma piwis wambota Godi numafipa pili', ea' nese'epa amamaga amama ipe' wapoti'.

*Pekolasa amamaga bu'wami atom gani heven ilif*

*(Mt 6:19-21)*

<sup>32</sup> Ipe' epes si'i sipsip kwaie'umi ina umbamohepa, owa'. Ahalomepa ipe'inai okom bo'ona ma ipe' piowis wambota ananinai numafipa. <sup>33</sup> Ipe' pese'asa amamaga hiami ipe'imi ma enis epes sotalomepam, ea' pefa' otamba pewalogam pese' isima kwahusi pigiambamas. Ipe' penda'

maol pegolopa paos otambaimi anona nemaf owa' motaga aom. Ipe' pekolasa otamba wiga maim amamaga bu'wami atom heven ilif nemaf owa' hegilialami. Anama sakowalefi ina suwis sokowalopam, owa'. Sopafowa maim owa' meatotopa'am hiahaom, owa'. <sup>34</sup> Dei' main, maina wambel amamaga bu'wami ipe'imi ma'oma, wambel anama atona anona nemaf ukup ipe'imi wapoti' meapoma.

*Amam manda' maoli mundumafuma mope*

<sup>35</sup> Ipe' penda' luwaguf ipe'imi bandam, pewaho' legw, ea' pekata lamifah pendondombol pindumafuma pepe. <sup>36</sup> Ipe' pepe si'i epes sape sahafa aman dembinai asasinai na'i nokwaha gwa'aimi lu'wami sandase'amai notanima nifi'i. I'i nifi'i noha uta ipat ananinai, esis suwisi'manana mehip. <sup>37</sup> Andeande'ma amam manda' maoli mundumafuma mope miti dembinai amamunai nifi'i notoloma mondani-fel. Ae' a'ipipa endilisi, nambimb dembinai nili' nowaho' lowaf bandana nowaho' let, ama nonda'mam gwa'aimi. Ea' ni'ipam motoma tebol ea' anan nifi'i nease'am gwa'aimi. <sup>38</sup> Anan nifi'i amaneta la'afina o noloma awatagw muli' meanda'am, o maina nogota, ma nieti amam mundumafuma mope, amam mondanifel.

<sup>39</sup> Ipe' ukup mopoma anom basef womun etin. I'i ofagenama ipati nili' nogawa nogota nanda' wali neafi'ianai ma nundumafuma nope, nanda' wali ina nambimb nifi'i nupusila ipat ananinai nuwis nomon, owa'etin. <sup>40</sup> Ipe' wapoti' pundumafuma pepen. Dei' main? Ae' ataga epen

endilisiwei, ifi'i anona nemaf ipe' ina pegawa pi'i ifi'i ulal nemaf anama, owa'."

*Basef womun etina amam manda' maoli anom bu'wami maloma anom awami (Mt 24:45-51)*

<sup>41</sup> Ea' Pita na'i, "Dembinai, basef amama womun etini ine' nase'afam afa' atofa, o esis amam nematawa hiesi wapoti?"

<sup>42</sup> Ea' Dembinai na'i, "Emi egafis gawaisi sape sanda' maol andeande' panda' waf bu'unai? Epes isima dembinai asasinai nambimb nondandepas ma sumafi ananimi manda' maoli ma sease'ama gwa'aimi amam nogota dembinai na'ianai. <sup>43</sup> Anona nemaf dembinai asasinai notanima nifi'i ma nieti esis isima sanda' maol andeande', esis isima sendanifel. <sup>44</sup> Ae' a'ipipa endilisi, dembinai ananinai anona nemaf nondandepasa sope dambesi sumafi amamaga ananimi hiami. <sup>45</sup> Ea' i'i epes isima ukup mapoma opalef asasimi atom ea' si'i, 'Dembinai ape'inai ina nambimb nifi'i ulal, owa'etin.' Ama esis sohafel soha enis amam nematawa sanda' maoli, sa' gwa'aimi embel da gwa' sonda' spak sape. <sup>46</sup> Esis i'i sonda'am na'ama, dembinai asasinai nambimb notanima nifi'i anona nemaf esis isima ina nambimb si'i dembinai nifi'i ulal, ata' owa'. Dembinai nifi'i nogota anama esis ukup mease'asanama. Nifi'i nohambombaga esis isima endilisi, ea' nonda'asa sope soloma epes owa' seambale'efa Godi seapoma.

<sup>47</sup> Emi egafis sanda' maola anani, esis segawa ea' ma okom dembinai asasinai, ea' esis owa'

seandondomba amamaga siela nomonas dembinai, anona nemaf dembinai nohas mehip endilisi. <sup>48</sup> Ea' emi egafis sanda' maoli owa' seagawa okom dembinai asasinai ma seanda' waf nendahama esis sefa' nimanimi, nambimb dembinai nohas sa'ombel. Ea' emi egafis enis sease'asa amamaga hiami, anona nemaf epes isima si'ipas sogwamasam amamaga wapoti'. Ea' emi egafis enis sease'asa amamaga hiami sase'as sumafiami, anona nemaf epes isima si'ipas sogwamasam wapoti' mikila' fowa' sali' sase'asami.

*Maol Jisasi nawaloga esis amam nematawa sataga bieffis*

*(Mt 10:34-36)*

<sup>49</sup> Ae' afi'i ma ekata nif etap anae' ea' a'i nif amama dei' fendom lu'um. Owa', ata' owa'. <sup>50</sup> Ea' ae' okom na'i efa' anom baptais. Dei' ae' owa' ata' efa'am, okom ae'anai aona endilisi ma ehafa efa' baptais amama. <sup>51</sup> Ipe' pa'i ae' afi'i ma indiwa wandaf hianai netaga etap anae' ma hiesi sope opalef awanem? Owa'. Ae' a'ipipa, ae' afi'i ma ewala epes esis amam nematawa hiesi. <sup>52</sup> Ama dei', anona nemaf wapoti' epes wanis bias sope ipat atotona wambota atotona sondawaloga bieffis. Wenis soloma bias sifitap ea' bias soloma wenis sifitap ea' na'ama etin. <sup>53</sup> Nambimb esis sondawaloga, anona aman noloma ahalomana ananinai mondawaloga bieffim, ea' ano'w nemata'w koloma mama'wakw ondawaloga bieffiwa, ea' mefi'makw ako'ukwi koloma ma'makw kwandagi'mokwi ondawaloga bieffiwa.”

*Waf ape' mogawa nogota anama amamaga amama meataganai*

*(Mt 16:2-3; Mk 8:11-13)*

<sup>54</sup> Ea' Jisas na'ipa esis amam nematawa wapoti' na'i, "Ipe' pati otaga natefi gani aon newalama, mehipe' pa'i, 'Atuwasi asaf a' nelai' ea' asaf a' nalai. <sup>55</sup> Ea' ipe' pati uf la'ifinai naluwi aon natopa'ima wa'ol nataga, ipe' pa'i, 'Atuwasi owaf a' nuluwi la'ifina.' Endilisi, naluwi la'ifina na'ama etin. <sup>56</sup> Ipe' epes pa'i malogof biamipei! Ipe' pati ikwaf hianai ilifanai etapanai ande-ande', ea' dei' ipe' owa' peagawa ikwaf nogota anae' andeande'."

*Enis epes ukup mi'i sonda' kotima ape'*

*(Mt 5:25-26)*

<sup>57</sup> "Dei' maina ipe' owa' powaloga waf bu'unai? <sup>58</sup> Nema'f anama ipe' pefe' peloma epen inima na'i nenda' kotimipei, ipe' ata' pefe' eaf, nogota anama pese'ana okom pewalapa amama pi'iam peloman. Na'ama epen inima nenda'epa penda' basefa amama ma jas nonda'epa pefe'ma polisman ea' monda'epa penda' kalabus. <sup>59</sup> Ae' a'ipipa, ipe' ina nambimb pekwaha ipat anama sanda' kalabusanai ulal, owa'. Ama peagwa amamaga lu'wami sa'umi ma wiaf ipe'inai hi'ilana, pefe'."

## 13

*Ipe' pemboma opalef pekwaha waf aonai. I'i owa', a pega'.*

<sup>1</sup> Nema'f anama atona enis epes sape sa'ipa Jisasa enis epes Galilisi. Nema'f anama fowa' esis

sape sondolalima God sanda' ofa etin, gavman dembinai Pailat nahas saga'. <sup>2</sup> Ea' Jisas nagwamasa basef na'i, "Ipe' ukup mandanda'mas ma'i epes isima sa'i sikila' enis epes Galilisi sanda' waf aonai, ama ofagema amama atom dei' sofa' nimanimi amama saga'? <sup>3</sup> Ae' a'ipipa owa'etin endilisi! I'i ipe' owa' pemboma opalefa waf aonai ipe'inai, anona nemaf ipe' hipei pega' na'ama etin si'i esis. <sup>4</sup> Dei' si'i main enis epes isima 18-peleis wambel anama Siloam ipat launai nato nahas saga' hi'alas? Amama ipe' pa'i waf aonai asasinai nikila' waf aonai enis epes sape Jerusalemi? <sup>5</sup> Owa'etin. I'i ipe' owa' pemboma opalefa waf aonai ipe' panda'anai, anona nemaf ipe' hipei pega' na'ama etin si'i esis."

*Basef womun etina lawag owa' nola su'utipi*

<sup>6</sup> Ea' Jisas nawalapa anom basef wamon etin na'i, "Anona aman nawa anona lawag fik aof ananinai nawa wain. Anom nimeguf mafe' ea', su'utipa lawag anama owa' nili. <sup>7</sup> Ea' na'ipa anan nanda' maol aof anamai na'i, 'Neme'. Afagof wanom ae' afi'i agolopa su'utip lawag anama fik, owa' nili. Na'ama dei' ine' lena. Dei' main netawa nefa' ifat atona etap etin?'

<sup>8</sup> Ea' anan nanda' maol aofi nagwamana basef na'ipana na'i, 'Dembinai, ine' ata' kwahona notawa afagel anae' atona. Ama ata' ela' etap noloma umbu bulmakaum esembe'ana. <sup>9</sup> Ama iti nambimb niema su'utip afagel anae' o owa'. I'i owa', wila ine' nelena.'"

*Jisas nanda' ano'w nemata'w kwataga bo'okw nemaf sapoma noma'wanai*



<sup>10</sup> Nemaŋ anama esis Juda sapoma noma'wanai Jisas na'ipasa baseŋ esis amam nematawa anona ipat esis Juda sa'i baseŋ sapeinai nomon.

<sup>11</sup> Ea' ano'w nemata'w ambal aonai napei'wi kwape, ambal anama aonai nanda'akw awasi'w kwape afagof 18-peleim ea' alafuga akwa'unai nondala'akw, ina kohafel kwaitu andeande', owa'etin. <sup>12</sup> Ea' Jisas natolo'w noŋala'w kwafi'i na'ipakw na'i, “Nemata'w, ae' atofa awes ine'inai dei' nataga bo'wena.”

<sup>13</sup> Anan nasa lagel ananinai nemata'w akwama ea' mehıp kwaitu usi'ikw. Ea' kwafela agel Godi lu'una. <sup>14</sup> Ea' aman anama numafi ipat esis Juda sa'i baseŋ sapeinai okom wandaŋuna ma Jisas nanda'akw kwataga bo'okw nemaŋ anama sapoma noma'wanai. Ea' anan na'ipa esis amam nematawa na'i, “Nimeguf amama wanom wanom sanda' maolanami. Ea' dei' ipe' pi'i aman anama notofamepa awes ipe'inai, andeande'ma pifi'i nemaŋ anama sanda' maolananai. Ea' ipe' ina pifi'mai maol anama ma nemaŋ anama mapoma noma'wanai.”

<sup>15</sup> Ea' Dembinai nagwamana baseŋ na'i “Ipe' amam pa'i malogof biamipei! Peme! Nemaŋ mapoma noma'wanai ipe' hiŋpei pafe' ifagw bulmakauwi ma patagaha bulmakau maloma donki ipe'imi pao'wam mafe' ma' embel. <sup>16</sup> Ea' nemata'w akwama kwataga wambota Abrahami, Satan nowa'akw la'ifikw kwape afagof 18-peleim. Ea' dei' nemaŋ anama mapoma noma'wanai ae' a'i etagaha mandof nowa'akwi ma kweape wafifi'w.”

17 Jisas na'iam na'ama, nanda' esis naumbih ananisi ambagof aom kwapete!. Ea' amam nematawa hiesi sandanifel endilisi ma amamaga bu'wami la'ifimi hiami anan nanda'ami.

*Basef womun etina su'utip mastetim so'uso'um maloma yis sanda' bret natifi*

*(Mt 13:31-33; Mk 4:30-32)*

18 Ea' Jisas na'iam wapoti na'i, "Epes siowis wambota Godi numafias si'i main? Ae' indila'wifam i'imama? 19 Amama si'i anom nalelef so'uso'umi ape' mofalam ma'i mastet. Anona aman nofa' nalelef amama nawam aof ananinai. Anom nimeguf mafe' ea' mataga malo si'i lawah lu'wami ea' amiguf mafi'i mala' alegah mailam."

20 Ea' Jisas na'iam wapoti' na'i, "Ae' a'i indila'wifa epes siowis wambota Godi numafias i'imama? 21 Ae' indila'wifama anom yis ano'w nemata'w kofa'am kwambomam maloma plaua hiami. Ea' mafe' mawis plawa hiami manda'am matef lu'um."

*Uta sa'unai*

*(Mt 7:13-14,21-23)*

22 Jisas nafe' wambel hiagoma lu'wagoma sa'ogoma nape felefele'ma eaf nafe' Jerusalemi nawalipasa basef esis amam nematawa, ea' nafe' okom na'i nefe' Jerusalem ea' nafe'. 23 Ea' anona aman na'ipana na'i, "Dembinai, ae' a'i ihali'ina ma epes isima anona nemaf God nofa'as seatani-mani. Isima hiesi o kwaie'wis?"

Ea' Jisas na'ipas na'i, 24 "Ipe' pepe la'ifipa penda' maol lu'unai endilisi, pefe' piwis uta sa'unai. Dei' main, epes hiesi anona nemaf si'i suwis nomon, ea' owa' la'ifisi. 25 Anona

nemaf ofagena ma ipati nohafel nowalowa uta ipat anama. Ea' ipe' pifi'i pitu peha uta ande' pefalana na'ama pi'i, 'Dembina, usi'amapa uta.'

Ea' nogwamepa basef ni'i, 'Ipe' enimapei? Ae' owa' egaopei, ipe' enimapei?'

<sup>26</sup> Ea' pi'ipana pi'i, 'Ape' mape ma' gwa'aimi embel malomena, nape nawalapa basef na'ipapa wambel ape'inai.'

<sup>27</sup> Ea' anan anona nemaf nogwa basef ni'i, 'Ipe' enimapei? Ae' owa' egaopei. Ipe' epes panda' waf aonai, ipe' si'amae!'

<sup>28</sup> Anona nemaf ipe' piti Abraham noloma Aisak noloma Jekop moloma profet amama hi-ami mope wambel Godi ea' ipe' owa'. Ipe' no-galo'mepa pepe ande'. Anama pelef mehipe' pena' nalelef tilili talala' kwapete' pepe. <sup>29</sup> Ea' esis amam nematawa hiesi sifi'i gani aon natefima nowalama naso'ma noloma anama wa'owa'ol esis sope sea' gwa'aimi lu'wami wambel Godi. <sup>30</sup> A'e endilisi, enis epes dei' sataga sagi'i agof a'asi, anona nemaf sefa' agof lu'wami sope sili'. Ea' enis dei' sataga sali'i sofa' agof lu'wami anona nemaf agof a'as setaga sigi'."

*Jisas nalopa wambel Jerusalem*  
(Mt 23:37-39)

<sup>31</sup> Nogota anama atona anom amam Farisi mafi'mai Jisas ma'ipana ma'i, "Ine' nekwaha wambel anae' fo'o anagon. Dei' main, Herot na'i nehena nega'."

<sup>32</sup> Ea' Jisas nagwamama basef na'ipam na'i, "Ipe' fo'o pi'ipa aman anama nanda' do'ufi douf

si'i nombat aolopunai pi'ipana pi'i, 'Dei' naman wapoti' ae' etofa ambagof awami mape epesi, ea' enda' awes nanda'asi setaga bo'wes. Anom nimeguf mefe' ea', nemaf nefe'ma wenifi hi'ilana, embefa maol ae'anai hi'ilana.' <sup>33</sup> Ea' dei' naman bimb ae' efe' enda' maol anama. Ina andeande'ma esis soha anona profet noga' anona wambel, owa'. Sehana noga' Jerusalem atagon.

<sup>34</sup> Jerusalem, Jerusalem, ipe' paha amam profet afumi, pakwaha otamba paha amam God nas-apa'am mafe'mai ipe'i, la'ela'ef ae' a'i ekolasa ipe' epes hipei si'i awata numa'inai nowa'ani nogami nakolasom mawis behenagof ananiami. Owa'etin, ipe' pandaiwa'. <sup>35</sup> Ipe' peme'! Dei' ipat bu'unai naloma wambel ipe'inai atuwasi wafina notawa etin. Ae' a'ipipa, ipe' ina petolowe wapoti' ma nambimb pie'i, 'Ape' ma'i God nofalo'ma aman anama nafi'i agel Dembinai.' "

## 14

*Jisas nanda' anona aman alop nalatawanai bo'ona*

<sup>1</sup> Anona nemaf esis Juda sapoma noma'wanai sa'i Sabat Jisas nafe' naloma anona aman Farisi na' gwa'aيمي ipat ananinai. Ea' esis sanda'ana naep di'indi'ana endilisi. <sup>2</sup> Anona aman lagufi bo'wagah malatawana kwapete'i nape Jisas opa-funama. <sup>3</sup> Ea' Jisas nati aman anama, nahali' amam gawaimi mawalipasa mi'uli Godi maloma amam Farisi na'i, "A'i afa' onda' aman awes nanda'anai bo'ona nemaf anama Sabat mapoma noma'wanai, o owa'?"

4 Ea' amam masopama malogof. Ea' nahapila aman anama nanda'ana bo'ona nasapa'ana nafe'.

5 Ea' Jisas nahali'am na'i, "I'i anona aman ipe'inai awani ananini o anona bulmakau ananinai sowala hul lounai nemaf anama Sabat sapoma noma'wanai, a'i aman anama ahalomas asasinai nefe' nigiasi mehip nemaf anama o owa'? Endilisi, nefe' nigiasi."

6 Ea' amam basef a'am.

*Basef womun etina lawag owa' nil nola su'utipi*

7 Ea' Jisas nati esis safi'mai gwa'aimi amama sa'i sope siaifah bu'wami matawa sali'i bo'wagoma atogon. Ea' na'ipasa basef womun etin na'i, 8 "I'i anona aman nofalepama anom gwa'aimi lu'wami sonda'ama aman nasol nemata'wi ma pefe', ipe' owa' pefe' petoma pili' siaifah bu'wami amam dambami atom matomami, owa'. Na'ama aman anama nofo'o nofalai anona aman agel lu'unai nikila' agel ine'inai. 9 Ama aman anama nofalena nifi'i ni'ipina ni'i, 'Ine' kwahomana sia inima bu'wani aman anae'. Nonda'am na'ama, ine' ambal aona endilisi. Ea' nonda'ena nefe' nepe nigili ipat basagaf. 10 Ea' i'i anona aman nofalena nefe' nea' gwa'aimi nelomana, ine' nefe' nepe nigili ipat basagaf. Nenda'am na'ama ma atuwasi nofalena nie'i, 'Alupinai, ine' nifi'i nepe nili' bo'ogoma!' Anan nonda'am na'ama, atuwasi nefa' agel lu'unai ma naep epes isima hiesi sa' gwa'aimi salominai. 11 Dei' main, epes emi egafis sefela agof asasimi atom, God nonda'as sisila'.

Ea' epes emi egafis senda' agof asasimi misila'i, anona nemaf God nefela agofa esis.”

*Basef womun etina anona aman nofala enis epes sifi'mai gwa'aimi*

<sup>12</sup> Ea' Jisas na'ipa aman anama nahali'ana nafe'ma gwa'aimi amama na'i, “I'i ine' nenda' anom gwa'aimi lu'wami o sa'umi, ine' owa' nefala alupisi soloma sahin owan wambota ine'isi wambel atona amamaga hiamisi, owa'. I'i nenda'am na'ama, nambimb esis sofalena ma nefe' nea' gwa'aimi ifagw asasimi, ea' sogwamena gwa'aimi ine'imi. <sup>13</sup> Ine' nenda' gwa'aimi lu'wami, nefala isima kwahusa amamagai, bo'wagah awomisi, naep mase'asi. <sup>14</sup> Epes isima ina la'ifisa sogwamena gwa'aimi ine', owa'. I'i ine' nenda'am na'ama, nendanifel nepe andeande'. Ea' anona nemaf God nogwamena amamaga amama bu'wami nemaf anama epes isima sanda' waf bu'unai saga'i sohafel wapoti'.”

*Basef womun etina gwa'aimi lu'wami  
(Mt 22:1-10)*

<sup>15</sup> Anona aman asasinai na' gwa'aimi nalomas name' basef amama, na'ipa Jisas na'i, “Emi egafis sepe sea' gwa'aimi lu'wami wambel Godi, esis sendanifel.”

<sup>16</sup> Ea' Jisas na'ipana basef womun etin wapoti' na'i, “Anona aman na'i nonda' anom gwa'aimi lu'wami. Ea' nofalai epes hiesi safi'mai gwa'aimi amama. <sup>17</sup> Nemaf danda' endilisi ma gwa'aimi amama mataga, ea' nasapa' anona nanda' maola anani nafe' na'ipa epes isima fowa' nofalasi. Ea'

na'ipas na'i, 'Ipe' fi'i. Amamaga hiami mandandombam mape ea'.'

18 Ea' epes isima hiesi atona etin sohafel sa'i basef sa'i esis ina safe', owa'. Anona aman na'ipana na'i, 'Ae' andaiwa'ma efo'o. Ata' efe' etopa'ma aof ae'anai.'

19 Ea' anona na'ipana na'i, 'Ae' atala bulmakau 10-peleim monda' maol mowala etap, ea' dei' efe' endondomam. Ea' ae' ina efo'o.'

20 Ea' anona na'i, 'Dei' etef ae' aso' nemata'w. Na'ama ae' ina efo'o, owa'.'

21 Ea' aman anama nanda'mana maoli notanima nafe' na'ipa dembinai ananinai ma amama. Ea' ofagenama ipati opaf wandafuna ea' na'ipa nanda'mana maoli na'i, 'Ine' mehip fo'o eaf hianai lu'unama sa'onama ma taun anama ea' nefa'ai isima falafisi, naep mase'asi, lagof bo'wagah awomisi ine' nel'wasi sifi'i suwisi nomon ipat ae'anai.'

22 Ea' aman anama nanda' maolanana na'i, 'Dembinai, ae' aila basef ine'imi ea', ati ipat ina dei' si'ina, ata' owa'.'

23 Ea' dembinai na'ipana na'i, 'Ine' fo'o eaf hianai lu'unama sa'onama nila indaleleb nefe' aof ea' ni'ipasa basef la'ifimi sifi'i suwisi nomon ipat ae'anai ma si'ina. 24 Ae' a'ipina endilisi, epes isima hiesi fowa' ali' efalasi, dei' andaiwa' ma sea' gwa'aimi ae'ami.' ”

*Esis ukup la'ifim sogawa andeande'i amama atom sila Jisas*

*(Mt 10:37-38)*

25 Amam nematawa hiesi safi'i saloma Jisas, ea' nandamboma na'ipas na'i, 26 “Emi egafis sifi'mai

Ae', ma esis owa' sesambala mamapas wauhia-mas wauhupawa batawisas asasisi soloma sahin owan wambota asasinai, ea' ambagof asasimi wapoti', esis ina nambimb sepe la'ifis sepe alupisi ae'asi, owa'. <sup>27</sup> Ae' efa' nimanim awami anda' maol Godi sehe ega' lawag usi'inai tu'wanainai. Emi egafis owa' senda'am na'ama etin si'i ae' ma sieili, epes isima ina la'ifis setaga alupisi ae'asi, owa'.

<sup>28</sup> Enin epen ipe'ini i'li nenda' anona ipat lu'unai nolata ilif, enin nenda'am ni'imama? Enin ata' nope nomonas motamea andeande' nili' ma nogawa andeande' otamba amama nanda' ipatami. Nambimb otamba ananiami mondahama ipat anama hi'ilana o owa'? <sup>29</sup> I'i owa'etina nenda' amama meali', ma nili' nonda' simen etina owa' nonda' ipat anama hi'ilana. Nambimb epes hiesi satolonai si'i basef aman anama sonda' findiwana <sup>30</sup> si'iam si'i, 'Epen in-ima nasefela ipat anama, ea' enin owa' la'ifin nembefanae.'

<sup>31</sup> Anom basef wapoti' amama. I'i anona aman dembinai king ni'i nofe' nopa' noloma anona king, anan ata' nope okom notanea andeande'. Soldia ananiami 10-tausen etin, ea' king anama nagi'i anan nifi'i noloma soldia ananiami hiami 20-tausen. Ea' king anama nali'i na'i ata' nili' nogawa na'ama. Anan nambimb nopa' noloma king anama nagi'i la'ifinama notofam o owa'? <sup>32</sup> Anan nonda'am na'ama ma i'i nogawa anan ina la'ifina, naumbih ananiami ata' mopani laogon, nili' nosapa' anom amam mofe'ma anan mofalana mi'ipana basef mi'i wandaf hapainai.



<sup>33</sup> Ea' ipe' na'ama etin. Ipe' emi egafipa owa'etina pewa' alafugah ma amamaga ipe'imi ma pesambalom, ipe' ina nambimb la'ifipa pepe alupipei ae'ipei, owa'.

*Jisas na'i basef womun etina sol owa' usihimi  
(Mt 5:13; Mk 9:50)*

<sup>34</sup> Ipe' pegawa sol amama bu'wami. Ea' i'i sol amama mumbul owa' usihim, owa'etin. Nambimb ipe' penda'am pi'imama usihim wapoti'? Owa'. <sup>35</sup> Sol amama ina bo'oma ape' monda'am aof, o mokwahom moloma umba bulmakaum, owa'etin. Ape' mokwahom etin. Emi egafipa aligah magalipei pame' basefi, pilam.”

## 15

*Basef womun etina sipsip higilalanai  
(Mt 18:12-14)*

<sup>1</sup> Epes hiesi saloma anom mofa' takisi maloma enis epes sanda' waf aonai safi'i felefele'ma Jisas same' basef ananiami. <sup>2</sup> Ea' amam Farisi maloma amam mawalipasa mi'uli Godi manda' megah mahama anan ma'i, “Aman anama naloma epes isima sanda' waf aonai nofalas alupisi nalomas na gwa'aimi.”

<sup>3</sup> Ea' Jisas nase'ama basef amama womun etin na'ipam na'i, <sup>4</sup> “I'i anona aman ipe'inai numafi anom sipsip 100-peleim ama anona atotona hegililana, aman anama ata' nokwaha sipsip amama 99-peleim mitu mea' otalef anagon, anan ata' nefe' nogolopa anona hegilalanai. Nogolopana nafe' nafe' natolona nafelana <sup>5</sup> nowandefana ekaf ananinai, nandanifel

nefa'ana nafi'i. <sup>6</sup> Nafi'i nataga ipat ananinai, nofalai esis alupisi ananisi saloma esis wambel atona sandakolas etifigin. Ea' na'ipas na'i, 'Ipe' pendanifel peloma ae'! Anona sipsip ae'anai hegilalana, ea' ae' afe' agolopana atolona efa'anai ea'.' ”

<sup>7</sup> Dei' Jisas na'ipas na'i, “Ae' a'ipipa na'ama etina esis amam nematawa sape heven ilifi sandanifel ma epes isima 99-peleis ambo'wes, ina sanda' waf aonai ma sotanima somboma opalef, owa'. Ea' i'i enin epen nenda' waf aonai ni'i nemboma opaf, esis sape heven ilifi sondanifel endilisi ma enin. Danifel asasinai nikila' sandanifela epes isima sape bu'wasi.

*Basef womun etina anona moni higilalanai*

<sup>8</sup> I'i ano'w nemata'w anona moni 10-peleina siliwa anona atotona higililana, atuwasi konda' maina kogolopana kwutolona? Akwa'w kwakata lam kombefagon ipat nomon kogolopana andeande' hi'alagon kofe' kofe' ma kwatolona.

<sup>9</sup> Akwa'w kwatolona ea', kofala esis alupisi wambel akwa'unai sondakolasi ea' kwi'ipas kwi'i, 'Ipe' pendanifel peloma ae'! Anona moni ae'anai higilalana, ea' dei' agolopana afa' atolona etanima efa'anai ea'.' <sup>10</sup> Dei' ae' a'ipipa na'ama etin si'i amam ensel Godi mandanifela enin epen nanda' waf aonai nemboma opaf nafe'ma God.”

*Basef womun etina nogalomana higilalanai nakwaha ahalomana*

<sup>11</sup> Ea' Jisas na'ipam wapoti' na'i, “Anona aman batausan biam. <sup>12</sup> Aonama awagufunai nafe' na'ipa ahalomana ananinai na'i, 'Ahalome,

ae' okom napoma otamba maim amamaga afa' ofa'ami ma nemaf ine' nega'. Dei' ae' a'i efa' tu'wanim ae'ami. Ine' niwalom biefim newaloga-mafam afa' biafa. Ae' a'i ine' nese'eam dei'.

Ea' ahalomam nawaloga amamaga hiami ananimi mafe'ma amam batausana biam.

<sup>13</sup> Ea' ina ata' nogota laona aonama awagufunai nefa' amamaga hiami ananimi nafe' napani anona wambel laogoma ea' nase'asam amamaga hiami ananimi ma waf naninani aonai anan naila okom ananinai na'i neanda'anai. Ea' otamba ananimi hi'alama ma waf aonai.

<sup>14</sup> Anan nakwaha otamba ananimi hi'alam, nogota nolomahasana nataga lu'una etap anama hiagoma hi'alagon. Ea' anan amamaga a'ana nape wafina. <sup>15</sup> Ea' anan nafe' nanda' maola anona aman etap anamainai. Aman anama nasapa'ana nafe' etap ananinai ma numafi bogof ananimi. <sup>16</sup> Bogof amama ma' su'utip lawahim, ea' anan wapoti' na'i nea' su'utip amama ma opaf ananinai. Anan ina enis sase'ana gwa'aimi, owa'. <sup>17</sup> Anan nape na'ama anom nimeguf, okom ananinai nogawa andeande' ea' na'iam na'i, 'Amam hiami manda' maola ahalome ae'anai amam gwa'aimi hiami endilisi. Ea' ae' ape na'ae nolomahe endilisi. <sup>18</sup> Hapaimi, ae' atuwasi ehafel efe'ma ahalome ae'anai. Ea' i'ipana i'i, "Ahalome, ae' anda' waf aonai ma God ine' wapoti'. <sup>19</sup> Dei' ae' ina aman bu'uwei ma ine' nefala ae' nogalomena ine'iwei, owa'. Ine' nenda'e epe si'i anona nanda'mena maoli." '

<sup>20</sup> Ea' nohafel nafe'ma ahalomana.

Ea' anan ata' nafi'i laogon ahalomana natolona, okom nainailana endilini nasagih nafe'

nahapilana nombalo'ana nasisi' dalogw. <sup>21</sup> Ea' nogalomana na'ipana na'i, 'Ahalome, ae' anda' waf aonai ma God ine' wapoti'. Ae' ina ata' aman bu'uwei ma ine' nefala ae' ni'i nogalomana ine'iwei, owa'etin.'

<sup>22</sup> Ea' ahalomana na'ipa amam manda' maola anani na'i, 'Ipe' fa'ai lowaf bu'unai launai namunai ae'anai pefa'ana pifi'i ulal pewaho'manana anan. Ea' pelamana anona ring faf ananinai, pelamana su bo'wagah ananiami. <sup>23</sup> Fa'ai bulmakau noganai anama lu'unai gigititi'i pehana ma ape' mea'ana mondanifel molomana. <sup>24</sup> Dei' main, nogalome anama ae'anai andowelamana si'i naga'i, ea' dei' ambal napaina wapoti'. Anan higilalana ea', dei' matolona wapoti'.'

Ea' esis sandanifel salomana.

<sup>25</sup> Ea' nogalomana dembenama napani aof nafi'i. Ea' anan nafi'i nataga felefele'ma ipat, name' maguf sanda' musik salemb.

<sup>26</sup> Ea' nofala anona nanda' maoli nahali'ana na'i, 'Esis sanda' main?'

<sup>27</sup> Ea' anan nanda' maoli na'ipana na'i, 'Owalomena ine'inai notanima nafi'i, ea' ahalomena ine'inai nandanifel nalomana, na'ama dei' naha anona bulmakau lu'unai. Dei' main, anan notanimai ina ata' nape aona, owa'. Nape andeande'.'

<sup>28</sup> Ea' nogalomana dembenama okom wandafuna ea' nandaiwa'ma nuwis nomon ipat. Ea' ahalomana nawisi ande' na'ipana mehpa nuwis nomon, owa'etin. <sup>29</sup> Anan nagwamana basef ahalomana na'i, 'Afagof hiami ae' ahapila maol ine'inai si'i agel a'e anda' maol atona. Ae'

ina esambala basef mi'uli ine'imi anona nemaf, owa'. Ea' ine' owa' nese'e anom amamaga so'umi atom si'i meme noganai ma eandanifel eloma alupisi ae'asi, owa'etin. <sup>30</sup> Ea' sa'usa'uni anama ine'inai anan nase'awa amamaga hiami ine'imi ma awau nematawa gembaiwai. Ea' dei' notanimai, ine' okom napomana dei' nahamana bulmakau anama anan.'

<sup>31</sup> Ea' ahalomana na'ipana na'i, 'Nogalome, la'ela'ef afa' biafa wape etifigin. Ea' amamaga ae'ami amama ine'imi atom. <sup>32</sup> Ea' dei' afa' ondanifel, opalef afa'imi mope bo'om. Dei' main, owalomena anama ine'inai fowa' nafe' laogon si'i naga'i, ea' dei' nafi'i nataga ambal napaina wapoti!. Anan higilalana, ea' dei' afa' watolona wapoti.' "

## 16

### *Basef womun etina anona aman gawainai numafi maoli*

<sup>1</sup> Ea' Jisas na'ipa alupumi ananiami na'i, "Anona aman amamaga hiamunai nao'wa anona ananinai numafi opeh ananiami nape. Ea' enis safi'mai anan sambaso'mana anan nanda'mana opehi ma basef sa'i, 'Numafi maol ine'imi anan nakwaha otamba hiami ine'imi mafe' etin.'

<sup>2</sup> Ea' nofala aman anama numafi maoli nafi'i na'ipana na'i, 'Dei' maina basef anama ae' ame'ama ine'? Ine' nefe' niamba amamaga ae'ami mape lagel ine'inai newalapam. Ina ata' nepe nimafi maol ae'anai wapoti!, owa!.'

<sup>3</sup> Ea' numafi maoli okom natanea na'i, 'Ae' nambimb ata' enda'am i'imama? Dembinai na'i

nigalo'me ma epe imafi maol dei'. Ae' ina la'ifiwi ma ewala etap. Ea' ambal aona indaila enis epesa gwa'aimi maim. <sup>4</sup>Ea' ae' okom natanea ma anom amamaga eanda'ama nambimb epes sofa'e efe' ifagw asasimi ma nemaf anama dembinai nigalo'me ma maol anama dei' anda'anai.'

<sup>5</sup> Ea' nofala amam hiami atona etin wialef mataomami mafi'mai anan. Anona aman nali' nafi'manai nahali'ana na'i, 'Ine' wialef ma'um mapoma dembinai ae'anai?'

<sup>6</sup> Ea' anan na'i, 'Darep wel lu'wami 100-peleim.'

Ea' na'ipana na'i, 'Ine' mehip nepe niti tiketa wiaf nenda' amefa darep 50-peleim atom mil.'

<sup>7</sup> Ea' anona nataga nahali'ana na'i, 'Wialef ine'imi ma'um?'

Ea' anan na'i, 'Begah witim 100-peleim.'

Ea' na'ipana na'i, 'Ine' nefa' tiket anama wiaf ine'inai nailanai ea' nenda' 80-peleim.'

<sup>8</sup> Ea' aman dembinai nafela agela aman anama aonai numafi maoli. Dei' main, anan nanda' waf gawainai si'i aman nomonas mapeinai. Epes ukup asasimi maimaila amamaga maim mape etap anae' esis sanda' maola waf gawainai si'i epes nomonas mapeisi sikila' epes sape howalagon owa' segawa andeande'i."

<sup>9</sup> Ea' Jisas na'i, "Ae' a'ipipa ma moni wiga maim ma'oh etap anae', ipe' penda' enis amam nematawa sotaga alupisi ipe'isi. Ea' i'i nemaf esis sohapila wiga monianai hi'ilana, anona nemaf God nofa'epa pefe' ifagw mape ilif heveni pepe andeande' la'ela'ef hihif.

<sup>10</sup> Emi egafis sumafi amamaga sa'umi andeande', anona nemaf sumafi amamaga

lu'wami andeande' wapoti'. Ea' emi egafis sembaso'am, owa' seanda' maol andeande'ma amamaga sa'usa'umi, anona nemaf esis ina senda' amamaga lu'wami andeande' wapoti', owa'etin. <sup>11</sup> I'i ipe' owa' pimafi moni wiga maim mape etap anae', anona nemaf emi nese'epa amamaga bu'wami endilisi pimafiam? Owa'etin endilisi. <sup>12</sup> I'i ipe' owa' pimafi amamaga enis epesi, emi nese'epa amamaga ipe'imi atom pimafiam? Owa'etin.

<sup>13</sup> Ina enin epen nanda' maoli la'ifin nihapila maol biefina amam dambami biam, owa'etin. Na'ama okom nila anona, anona nesambalona. Ea' na'ama etin ipe' ina la'ifipa pepe owina God noloma wigai moni wapoti', owa'."

*Anom basef ma'i mi'uli Godi fowa'inai maloma epes siowis wambota Godi numafias*

<sup>14</sup> \*Amam Farisi mame' basef amama hiami Jisas na'iami, amam manda'mana salamal etin. Dei' main, amam ukup maimaila moni atona. <sup>15</sup> \*Ea' anan na'ipam na'i, "Ipe' panda' maol ma epes hiesi sitilipa si'i ipe' epes bu'upe'i. Ea' God nogawa ukup ipe'imi nomon. Amamaga epes safela agofami satalom otamba lu'wami, amama falafumi atoma naep Godi. <sup>16</sup> \*Basef amam profet mawalipasami maloma basef mail mi'uli God nase' Mosesanai amama amam mawalipasam la'ela'ef mape mafi'i metambel nogota Jon natanagai. Ea' nogota anama Joni nafi'i nataga dei' basef bu'wami ma epes siowis wambota Godi

---

\* **16:14:** Mt 23:14      \* **16:15:** Mt 23:28; Lu 18:9,14; Pro 6:16,17

\* **16:16:** Mt 11:12,13

numafias, amama mape mafe' mataga wambel hiagoma. Ea' epes hiesi la'ifis sanda' maol mehip ma sefe' siowis wambota Godi numafias.

<sup>17</sup> \*Anom basef tu'wanima\*

amef sa'usa'umi moloma anom basef bandami mail nomona buk mi'uli Godi ina anona nemaf mefe' higililam hi'ilam, owa'etin. Mope la'ela'ef hihif na'ama etin. Ea' etap naloma otaga anona nemaf hegililam.

*Jisas na'i basefa sawala waf dase'amainai*

*(Mt 5:31-35; 19:9; Mk 10:11-12)*

<sup>18</sup> Emi egalín nakwaha waulu'mana anani'wi ma nease' ano'w nemata'w wapoti', anan nanda' waf aonai so'a waola nemata'w akwama nali nase'akwi. Ea' emi egalín naso' ano'w nemata'w fowa' anona aman nagalo'makwi aman anama nagi' nase'akwi wapoti' nanda' waf aonai so'a waola nemata'w akwama.

*Anona aman amamaga hiamunai naloma Lasarus*

<sup>19</sup> Anona aman amamaga hiamunai nape. La'ela'ef anan nala siaogw bu'wami atom luwaguf bu'wami satalom otamba lu'wami. Ea' nimeguf hiami nefa' gwa'aimi bu'wami atom nape andeande' endilisi. <sup>20</sup> Ea' felefele'ma ipat ananinai anona aman kwahunai nandailasa gwa'aimi moni maim nape, agilinama Lasarus. Alop ananinai si'ina ma maselis. <sup>21</sup> \*Enis epes sofa'ana safi'i na'oh felefele'ma ipat aman anamai. Anan na'i notatama gwa'aimi tukwakwanimi mowa ma'oh tebol owinam aman

\* 16:17: Mt 5:18      \* 16:17: Niti futnot Matyu 5:18.      \* 16:21: Mt 15:27



anama amamaga hiamunai ma ata' nea'am nease' opaf. Ea' nombagw mafli' mapalo'mana maselis ananiami afegah amamumi.

<sup>22</sup> Anom afagof mafe'ma ea', aman anama falafunai naga', ea' anom ensel mofa'ana mafe' mahaponana nape wambel bu'unai felefele'ma Abraham. Ea' aman anama amamaga hiamunai anan wapoti' naga, sawana. <sup>23</sup> Ea' nafe' wambel aonai hel nofa' nimaniami lu'wami. Ea' natologon nalata ilif, nati Abraham napani laogon endilisi, Lasarus nape nalomana. <sup>24</sup> Ea' nofalana na'i, 'Ahalome Abraham, ine' niti uwahipiwi nesapa' Lasarus nufli' nola faf ananinai tu'wanina atona embel nupihl'ame afega ae'anai. Ae' ame' nimaniami lu'wami endilisi ma nif amae.'

<sup>25</sup> Ea' Abraham na'ipana na'i, 'Nogalome, ine' okom nondanda'ma fowa' ata' nape naminai etap anae' nefa' amamaga bu'wami atom. Ea' Lasarus nofa' amamaga hiami awami. Ea' dei' wambel ana'e opaf ananinai nape bo'ona, ea' ine' nefa' nimaniami lu'wami. <sup>26</sup> Ea' anom amamaga wapoti' mape. La'afena ape' maloma ipe' God nanda' anona kwambiwag lu'unai. Na'ama epes sape na'ae ma sa'i sotopa' kwambiwag anama seafo'o ma ipe', esis ina la'ifis. Ea' epes sapani na'amai, esis ina la'ifisa sotopa'i kwambiwag siefi'mai ape', owa'etin.'

<sup>27</sup> Ea' aman anama na'i, 'Ahalome, ae' a'i ine' nesapa'o Lasarus notanima nofo'o ipat ahalome ae'anai. <sup>28</sup> Ae' anom owape wanom biam mape. Ama Lasarus ni'ipama basef la'ifimi ma momboma opalef. Na'ama amam wapoti' mufli' wambel anae' mofa' nimaniami lu'wami.'

29 Ea' Abraham na'ipana na'i, 'Owa'. Owapena inelimi mome'ago basefa Moses noloma amam profet miyambamam. Amam mome'ago basef amama.'

30 Ea' na'ipana na'i, 'Ahalome Abraham, owa'etin. Ina nambimb mome'am, owa'. Ea' i'i enin epen naga'i nehafel hi'agif nefe'ma amam, nambimb meme'ana momboma opalef.'

31 Ea' Abraham na'ipana na'i, 'Owa'etina meame' basefa Moses noloma amam profeti, ea' nambimb enin epen naga'i nitanima nehafel hi'agif, amam ina mombale'efana wapoti', owa'.

## 17

### *Waf aonai nahambombaga bale'ef epesi* (Mt 18:6-7,21-22; Mk 9:42)

1 Ea' Jisas na'ipa alupumi ananiami na'i, "Endilisi amamaga amama meagwambipei motagamepa ma penda' waf aonai. Endilisi amamaga anona nemaf miatagai, ea' emi egefis sonda' amamaga amama awami motaga, ae' ati esis uwahipis endilisi. Dei' main, esis anona nemaf sefa' nimaniami lu'wami. 2 I'i enis epes sofa' epes isima sepa' owap lu'unai nil bagafowa asasimi, sofa'as sefe' sokwahis sowala naoh mami lu'wami ma afis, esis ata' sepe awes. I'i epes isima senda' enin so'uso'win nekwaha nembale'efa Ae', epes isima anona nemaf sepe awes endilisi sikila' sewala naoh afis. 3 Ipe' pindumafuma andeande'. I'i owalomewa ipe'inai nonda' waf aonai, pi'ipana basef mehupa nokwahana. Ama i'i anan nemboma opaf,

ipe' pekwahomana waf aonai ananinai. <sup>4</sup> I'i anan nonda'mepa waf aonai ma ipe' la'ela'ef 7-peleif nemaf atotona, ama anan netanima nifi'mai ipe' 7-peileif ni'i, 'Ae' amboma opaf.', ipe' pekwahomana waf aonai anan nanda'anai."

*Waf ape' mombale'efanai*

<sup>5</sup> Ea' amam Aposel Jisasi ma'ipa Dembinai amamunai ma'i, "Ine' nenda' afa' ombale'efena la'ififa wikila' wali' ombale'efena."

<sup>6</sup> Ea' Dembinai na'ipam na'i, "I'i bale'ef ipe'inai so'ona nendahama si'i nalelef sa'umi mastetimi lawag, nambimb ipe' pi'ipa lawag nanima su'utip mailanai pi'i, 'Ine' degia neloma ofagena nefe' newala naoh embel nomon,' ea' nila basef ipe'imi."

*Waf epes sanda' maoli sanda'anai*

<sup>7</sup> "I'i anona aman ipe'inai nofa' anona aman nanda' maola anan nowala etap aof o numafi sipsip, ea' wambomota notanimai nifi'i ipat, atuwasi dembinai numafi anani ni'ipana ni'i, 'Ine' fi'i mehip nepe nea' gwa'aimi'? Owa'etin.

<sup>8</sup> Atuwasi ni'ipana ni'i, 'Ine' nendondomba gwa'aimi ae'ami, newaho' let, nenda'me gwa'aimi ae' nili' nefa'am nifi'i. Ma ili' ea'am, ine' nigi' nea' ine'imi.'

<sup>9</sup> Ea' atuwasi anan ninifela aman anama nanda'mana maoli ma nila basef ananimi? Owa'etin. <sup>10</sup> Ea' ipe' wapoti' na'ama etin. I'i ipe' penda' amamaga hiami hi'ilam si'i God na'ipipa, ipe' pi'i basef pi'i, 'Afa' wanda' maoli aofai. Amamaga afa' wanda'ami, amama maol afa'imi atom.' "

*Amam 10-peleim awes aonai nanda' alop amamunai nambo', Jisas nanda'am bo'om*

<sup>11</sup> Ea' Jisas nafe' eaf na'i nefe' Jerusalem, nafe' la'afena etap hiagoma biefigin Samaria naloma Galili. <sup>12</sup> Anan nataga anona wambel, ea' amam 10-peleim awes aonai nanda' alop amamunai nambo' mafli' eaf ata' maituwi laogon, <sup>13</sup> mofalana mehipe ma'i, “Jisas, Dembinai, ine' niti uwahipifa!”

<sup>14</sup> Ea' Jisas natolom na'ipam na'i, “Ipe' fo'o pihil'amba alop ipe'inai ma amam pris.”

Amam ata' mafe' etin, alop amamunai nataga bo'ona.

<sup>15</sup> Anona aman amamunai nati alop ananinai bo'ona, notanima nafe' noga na'i mehipe nafela agel Godi. <sup>16</sup> Ea' natambe nowafa notawa etap felefele'ma bo'wagah Jisasi nanifelona. Anan ina Judainai, owa'. Anan Samariainai.

<sup>17</sup> Ea' Jisas natolona na'i, “Ae' a'i ipe' 10-peleipa ambo'wepa etin. Dei' 9-peleim emuma? <sup>18</sup> Amam motanima mifi'i mefela agel Godi? Aman anama anona wambelinai, anan atotona.”

<sup>19</sup> Ea' Jisas na'ipana na'i, “Ine' hafel fo'o. Ine' nembale'efa ae', amama atom dei' nataga bo'wena wapoti'.”

*Nemaf anama epes hiesi siowis wambota Godi Dembinai numafias nambimb neataga*

*(Mt 24:23-28,37-41)*

<sup>20</sup> Anom Farisi mahali' Jisas ma'i, “Maina nogota nemaf anama bu'unai notaga ma ape' miowis wambota Godi numafiapa?”

Ea' anan nagwamama basef amam na'i, "Amama esis ina satolom naep, owa'. <sup>21</sup> Esis ina anona nemaf si'i, 'Piti, amama mape na'ae, o mape gani, owa'etin.' Peme! Amama mape opalef ipe'imi nomon ea'."

<sup>22</sup> Ea' Jisas na'ipa alupumi ananimi na'i, "Anona nemaf notaga, opalef ipe'imi pelef endilisi pi'i, 'Ape' ma'i aman anama notaga epen nofa' alop epesi ata' nifi'i notaga ulala ata' mutolona.' Owa'etin. Ipe' ina petolowe, owa'. <sup>23</sup> Ea' nam-bimb enis epes si'ipipa si'i, 'Piti nani nape gani,' enis si'i 'Piti anan nape na'ae.' Ea' ipe' ina peme'as pigi'mas, owa'. Hapaisi. <sup>24-26</sup> Ipe' pegawa pelele'ala ma otaga dilulum bogwalag pele' pele' nafe'agon hi'alagon. Ea' ae' ataga epen endilisiwei, anona nemaf enda'am na'ama etina nemaf ae' iefi'ianai. Ea' ae' ata' ili' efa' nemanimi hiami ma epes anai'isi dei' sowa' alafugahe. Waf fowa' gani sanda'ana nogota anama Noa napeinai, ea' na'ama etin si'i anona nemaf esis sonda'ana nemaf anama felefele'ma ifi'i etaga etap anae'. <sup>27</sup> Sa' gwa'aimi, sa' embel, amam nematawa sindikikila'ma sandase'ama etin safe' safe' sataga nemaf anama Noa nafe' nawis sip. Ea' embel lu'wami mataga maha esis amam nematawa hiesi afis hi'alas.

<sup>28</sup> Esis sanda' waf na'ama etin si'i nogota anama Lot napeinai wapoti'. Sa' gwa'aimi, sa' embel, satala amamaga sase'asam safe'ma enis satalom, sawa amamaga aof, sala' ifagw. <sup>29</sup> Ea' Lot nakwaha Sodom nafe', ma nemaf anama atona nif maloma otamba salfa fandumi mowai heven si'i asaf nalai ea' mahambombaga amam

nematawa hiesi saga' hi'alas.

<sup>30</sup> Ea' na'ama etina nemaf anama ae' ataga epen endilisiwei iefi'ianai. <sup>31</sup> Nemaf anama emi epen neape ipat andi'i felefele'i, ina ata' netanima nuwis nefa'ai amamaga ananiami ipat nomon, owa'. Ea' na'ama etin epen napani aofi, ina ata' netanima nefe' ipat, owa'.

<sup>32</sup> Ipe' nomonas mondanda'ma Lot waulu'mana. <sup>33</sup> Emi egafis si'i sili'akwa ambagof asasimi, ambagof asasimi anona nemaf higililam. Emi egafis sesambala ambagof asasimi, anona nemaf ambagof asasimi mope andeande' la'ela'ef hihif. <sup>34</sup> Endilisi ae' a'ipipa, nemaf anama owamb amam biam mo'oh ipat lehis atifim, God nofa' anona, anona nokwahona nope. <sup>35</sup> Anowa nematawa biawa onda' maola plaua onda' bret, atuwasi God nofa' ano'w, nokwaha ano'w kope.” <sup>36</sup> [Amam biam meape aofi, atuwasi God nofa' anona, nokwaha anona nope.]

<sup>37</sup> Alupumi ananiami mame' basef amama mahali'ana ma'i, “Dembinai, amama anona nemaf motaga eti?”

Ea' Jisas na'ipam na'i, “Anama alop saga'i sa'oma, ea' anama atogon anona nemaf komemb mufi'i mondowa'anima.”

## 18

*Basef womun etina nemata'w alifi'wi kofala dembinai jas*

<sup>1</sup> Ea' Jisas nase'am basef wamon etin alupumi ananiami ma nihi'ambam monda' beten nimeguf hiami ma amam ina ala'uta neam, owa'. <sup>2</sup> Ea'

anan na'iam na'i, "Anona dembinai jas nape anona taun. Anan ina umbamahana ma God, ina okom napoma enis epes wapoti', owa'.

<sup>3</sup> Ano'w nemata'w alifi'wi kwape taun anama. La'ela'ef akwa'w kwafi'mai jas anama kwa'ipana kwa'i, 'Naumbih ae'asi sa'i sohambombaga ae'. Ine' ata' nigiambame ma kot.'

<sup>4</sup> Jas anama nali' nandaiwa'ma niegiambama'w. Nogota launai nafe' ea', okom ananinai ma'i, 'Ae' ina umbamahema God, ea' ina ila basef epesi, owa'. <sup>5</sup> Ea' nemata'w akwama alifi'wi kwase'e nimanimi ae'. Ea' hapaimi, ata' igiambama akwa'w mehpa kot. Na'ama kwafi'i la'ela'ef konda' okom nalowe.' "

<sup>6</sup> Ea' Dembinai na'ipam na'i, "Ipe' peme' basefa jas anama aonai. <sup>7</sup> Epes isima God nandandepas ea' ananisi, esis salef sakokowe la'ela'ef owamb alip. Dei' God nigiambamasa kot o owa'? Anan nigiambamas. Anan ina ni'ipas mamumami, owa'. <sup>8</sup> Ae' a'ipipa endilisi, nambimb nigiambamas mehpa. Ae' ataga epen endilisiwei. Ea' anona nemaf ae' iefi'i, nemaf anama iti amam nematawa etapesi sembale'efa ae', o owa'?"

*Basef womun etina amam biam anona Farisi naloma anona nofa' takisi*

<sup>9</sup> Enis epes ukup mapoma esis etis sa'i esis epes bu'wasi sanda' waf bu'unai, ea' sa'i enis sanda' waf aonai. Epes isima Jisas nase'asa basef womun etin na'i, <sup>10</sup> "Anom amam biam ma'i mofe' monda' beten ipat lu'unai Godi. Anona Farisi, anona aman nofa' takisi. <sup>11</sup> Farisi anama naitu okom napoma anan atona nanda' beten na'ama na'i, 'Ae' anifelina God, ama ae' ina si'i

enis epes sanda' waf aonai. Esis sambaso'mas sofa' wiga hiahaom enis epesi, sanda' waf aonai, sanda' waf aonai so'a waulanai. Ae' anifelina ma ae' ina si'i aman nanima aonai nofa' takisi. <sup>12</sup> Wikifah hiami ae' akwaha gwa'aimi nimeguf bifa anda' beten. Ea' amamaga hiami ae' efa'ami, awala tu'wanim amamaga ase'enam ine'.' ”

<sup>13-14</sup> “Ea' aman anama nefa' takisi naituwi laogon nandaiwa'ma niniga niti heven ilif, owa'. Naha mafata ananinai la'ela'ef na'i, 'God, ae' aman anda' waf aonai, ine' niti ae' owahipiwi nigiangbame.’

Ae' a'ipipa endilisi, aman anama nofa' takisi na'iam na'ama, anan bo'ona ma naep Godi. Ea' aman anama nali' nanda' beteni, owa'. Dei' main, emi egafis sefela agof asisimi atom, nambimb God nonda' agof asasimi mowala. Ea' emi egafis senda' agof mowala, nambimb God nefela agof asasimi lu'um.”

*Jisas na'ipasa basef bu'wami mafe'ma awasi isima ata' sa'wisi*

*(Mt 19:13-15; Mk 10:13-16)*

<sup>15</sup> Esis sao'wamanai enis awasi sofa'as safi'mai Jisas, sa'i anan nowamona lagofa ni'ipasa basef bu'wami ma God nofalo'mas. Ea' alupumi ananiami mati isima ea' minifalis esis sofa'as sifi'mai anan. <sup>16</sup> Ea' Jisas nofala awasi isima safi'i felefele'ma anan ea' na'ipam na'i, “Ipe' kwahowas awasi isima sifi'mai ae'. Ipe' ina pindaiwa'mas. Fa'asi sifi'mai Ae'. Dei' main, esis amam nematawa siowis wambota Godi numafias esis same' basef ananiami sailam si'i awasi isima. <sup>17</sup> Ae' a'ipipa endilisi. Emi egafis si'i a'e ma siowis wambota Godi numafias ama sese'ana



ukup asasimi ma Anan si'i awasi isima sa'i a'e mana, isima sanda'am na'ama nambimb siowis wambota Godi numafias. I'i owa', owa'etin.”

*Aman amamaga hiamunai*  
(Mt 19:16-30; Mk 10:17-31)

<sup>18</sup> Anona agilinai Judainai nahali' Jisas na'i, “Tisa bu'winai, ae' nambimb enda' maina efa' ambal namunai epe andeande' la'ela'ef?”

<sup>19</sup> Ea' Jisas na'ipana na'i, “Dei' maina ine' na'i Ae' bu'uwei? God atona bu'unai. <sup>20</sup> Ine' negawa mi'uli God nasol Mosesanai na'i, ‘Ina nenda' waf aonai so'a waulanai, ina neha enis epes sogal nenda' wal, owa', ina nembaso'ma enis epes, ine' neme' basef mamaşınai nembale'am nilam ea' nimafias andeande'.”

<sup>21</sup> Ea' na'ipana na'i, “Mi'uli anama hianai ahapilana ailana fowa' ata' sa'owe afi'i afi'i ataga dei'.”

<sup>22</sup> Ea' Jisas name' basef amama na'ipana na'i, “Ine' anona waf bu'unai atotona ata' owa' neanda'ana. Ine' fo'lo nese'asa amamaga ine'imi hiami enis epes sotaluma ine' nefa' moni anama nenda'ana neso' isima kwahusi. Nenda'am na'ama ma anona nemaf nefa' amamaga bu'wami gani heven ilif. Ea' nifi'i nembale'efe ae' nila ae'.”

<sup>23</sup> Anan name' basef amama, opaf ananinai nimanina endilisi. Anan amamaga hiamunai. Na'ama dei' anan okom nimaninai.

<sup>24</sup> Ea' Jisas natolona na'i, “Epes isima hiahaom moni hianaisi, sanda'am ahifim endilisi ma siowis wambota Godi numafias. Atona etin sefe' siowis. <sup>25</sup> Anona mafin lu'unai kamel nuwis nil nagala sagundisa luwagufanai, anama wila ma

niowis. Ea' amam nematawa amamaga hiamisi i'i suwis wambota Godi, sonda'am ahifim endilisi ma siowis. Maol anama ahifina endilisi nikila' maol kamel niowis nil nagala.”

<sup>26</sup> Ea' epes isima same' na'ama sa'i, “I'i na'ama, anona nemaf God nofa' emi egafis setanimani sopen andeande' la'ela'ef? Owa'etin.”

<sup>27</sup> Ea' Jisas na'ipas na'i, “Amamaga epes owa' la'ifisa seanda'ami, amama God atona la'ifinama nonda'am.”

<sup>28</sup> Ea' Pita na'ipana na'i, “Neme', afa' wak-waha amamaga afa'imi hiami ea' dei' wafi'i wambale'efa basef ine'imi wailina.”

<sup>29</sup> Ea' Jisas na'ipas na'i, “Ae' a'ipipa endilisi, ipe' emi egafipa pekwaha ifagw ipe'imi ma penda' maola epes siowis wambota Godi numafias, <sup>30</sup> anona nemaf God nogwamepa amamaga hiami mikila' amama pali' pefa'ami. Anona nemaf nogota bu'unai neataga, ipe' pefa' ambagof namumi ma peape andeande' la'ela'ef.”

*Jisas na'iam wenifa noga' notanima nohafel wapoti'*

*(Mt 20:17-19; Mk 10:32-34)*

<sup>31</sup> Ea' Jisas nao'wa alupumi ananiami 12-peleim na'ipam na'i, “Peme', dei' afa' ondowasa' Jerusalem. Ama basef amama hiami amam profet fowa' gani manda'am mail buki ma'i ae' ataga epen endilisiwei motaga alihim mondawalap hi'ilam. <sup>32</sup> Nambimb amam monda'e efe'ma enis epes sololama Godi. Ea' sonda'e findiwae sehe sonda'me waf aonai sisisi'wafe sopagahowe sehe ega'. <sup>33</sup> Ama nimeguf biam mefe' hi'ilam

ama anona nefe'ma wenifi ae' etanima ehafel wapoti'."

<sup>34</sup> Ea' amam alupumi ananimi ina mogawa basef amama, owa'. Basef ofagema ma'iam ata' mandambaho'ma amam, ea' ina ukup mandanda'mam andeande'ma amamaga Jisas na'i neanda'ami, owa'.

*Jisas nagiangama anona aman naep mase'anai ambo'ona*

*(Mt 20:29-34; Mk 10:46-52)*

<sup>35</sup> Jisas nafe' nataga felefele'ma anona wambel Jeriko, ea' anona aman naep mase'anai nape eaf wa'ana dawalegef nandailasa gwa'aimi moni maim. <sup>36</sup> Ea' name' esis hiesi safi'i sikila'ana safe', nahali'as na'i, "Esis sanda' main notaga?"

<sup>37</sup> Ea' sa'ipana sa'i, "Jisas Nasaretinai anama dei' nafi'i nikila'ena nafe'."

<sup>38</sup> Ea' nofalana na'i, "Jisas, ine' akunamana Deviti, niti ae' uwahipiwi!"

<sup>39</sup> Epes isima sali' safi'i sinifalana na'ama sa'i, "Ine' feso'mena!"

Ea' anan fala etin nape na'i, "Ine' Devit akunamana, niti ae' uwahipiwi."

<sup>40</sup> Ea' Jisas nafi'i naitu na'ipas na'i, "Kipana nifi'mai ae'."

Anan nafe' felefele', Jisas nahali'ana na'i, <sup>41</sup> "Ine' na'i ae' enda'mena main?"

Ea' na'ipana na'i, "Dembina, ae' a'i iti andeande' wapoti'."

<sup>42</sup> Ea' Jisas na'ipana na'i, "Naep ine'imi miti. Ine' nembale'efa ae' la'ifina. Amama atom dei' nataga bo'wena wapoti'."

<sup>43</sup> Ea' mehip naep matiana andeande', naila Jisas nafe' eaf nafela agel Godi. Ea' esis amam nematawa sati amama safela agel Godi wapoti'.

## 19

### *Basef Sakiusi*

<sup>1</sup> Ea' Jisas nafe' nawis Jeriko, na'i nefe'.  
<sup>2</sup> Ea' anona aman amamaga hiamunai nape, agel ananinai Sakius anan agilina ma amam amama mofa' takisi. <sup>3</sup> Anan na'i niti Jisasa no-gawana anan emi egafuna. Ea' amam nematawa wambelisi hiesi saitū sili'akw. Sakius anan band-abandanai, ea' ina nati Jisas, owa'. <sup>4</sup> Ea' nasagih nali' nafe' nalata natoma anona lawag fik ama niti Jisas niefi'i.

<sup>5</sup> Ea' Jisas nataga anama naniga nati ilif na'ipana na'i, "Sakius, dei' ae' efe' epe ipat ine'inai. Ine' sila'i mehip."

<sup>6</sup> Ea' nisila'i mehip okom ananinai nandanifel, nao'wa Jisas nafe' ipat ananinai.

<sup>7</sup> Ea' esis amam nematawa sati amama, ukup aom endilisi sa'i basef mamumami sa'i, "Anan nafe' nape ipat anona aman nanda' waf aonai."

<sup>8</sup> Ea' Sakius nehafel naitu na'ipa Dembinai na'i, "Dembinai, ine' neme'. Dei' ae' a'i ewala amamaga hiami ae'ami la'afen na'ama etin, ea' ese'as tu'wanim isima kwahusi. I'i ae' embaso'ma enin epena ekwalopa amamaga ananimi, nambimb ae' egwamana hiami bifibif."

<sup>9</sup> Ea' Jisas na'ipana na'i, "Dei' God nefa' amam nematawa sape ipat anae'i sotanimani ea'. Dei'

main, aman anama wapoti' akunamana Abrahami. <sup>10</sup> Ae' ataga epen endilisiwei, ae' afi'i ma egolopa epes higilalasi efa'as setanimani.”

*Basef womun etina amam manda' maoli 10-peleim mofa' moni*

<sup>11</sup> Esis same' basef amama, ea' Jisas nafe' nataga felefele'ma Jerusalem, ea' epes hiesi ukup ma'i dei' atef God nifi'i numafi epes Ananisi nupe dembinai ma esis ea' epes hiesi sotolona. Na'ama Jisas na'i basef amama womun etin <sup>12</sup> na'i, “Anona aman dembinai na'i nefe' anona wambel laogoma ma esis sonda'ana nope king. Anona nemaf anan notanima nifi'i. <sup>13</sup> Ea' nofalai anom amam 10-peleim manda' maol ananinai, ea' natambe' moni 20 kina nandahama amam. Ea' na'ipam na'i, 'Ipe' penda' maolana moni anama pefe' petagama ae' etanima iefi'i.’

<sup>14</sup> Ea' esis wambel atona aman anamai ukup aoma anan endilisi. Ea' nafe' sasapa' anom amam magi'mana mafe' ma'i, 'Ape' mandaiwa'ma ine' nepe king ma ape'.’

<sup>15</sup> Owa'etin. Esis sanda'ana nataga nape king dembinai nape anom nimeguf, notanima nafi'i. Ea' na'i, 'Falai amam amama manda' maoli fowa' ae' ase'ama moni. Ae' a'i ata' egawa moni wamanai ma'ufina amam hiami atona etin mofa'anai.’

<sup>16</sup> Ea' nali'i nafi'i na'ipana na'i, 'Dembinai, ae' anda' maol 20 kina anama ine'inai anda' maolanana dei' efa'ai 200 kina wamanai.’

<sup>17</sup> Ea' dembinai na'ipana na'i, 'Ine' nanda' maol andeande'. Ine' nimafi moni anama

kwawie'una andeande'. Dei' ese'ena agel lu'unai ine' ma nimafi taun lu'wagoma 10-peleina.'

<sup>18</sup> Ea' anona nafe'ma biami nafi'i na'ipana na'i, 'Dembina, ae' anda' maola 20 kina ine'inai dei' etanima efa'ai 100 kina wamanai wapoti.'

<sup>19</sup> Ea' dembinai na'ipana na'i, 'Ae' enda'ena nimafi taun lu'wagoma 5-peleina.'

<sup>20</sup> Ea' anona nagi'i nafi'i wapoti' na'ipana na'i, 'Dembina, 20 kina ine'inai anae'. Ae' ewa'ana hankisip ambe'ana na'oh. <sup>21</sup> Ae' egawa ine' aman la'ifinai. Anom amamaga enis epes sambe'am ma'ih, amama ine' nefa'am. Gwa'aimi enin epen nawami, amama ine' nala'ami. Na'ama ae' ombamahe ma ine'. Ea' dei' ewa'ana moni anama na'omena.'

<sup>22</sup> Ea' dembinai na'ipana na'i, 'Ine' nanda' maoli, ine' epen awinai natotopa' basefi. Basef ine'imi atom ewalogen. Dei' ine' negawa ae' aman la'ifiwei ala' gwa'aimi anona aman nawami. <sup>23</sup> I'i ine' negawa na'amai, dei' nefa'ana nembe'ana benga ae' etanima ifi'i efa'ana neloma anona wamanai wapoti.'

<sup>24</sup> Ea' na'ipa esis saitua na'ama felefele'i na'i, 'Ipe' dalombana 20 kina aman anama pese'anana aman anama nofa' moni 200 kinai.'

<sup>25</sup> Ea' esis sa'ipana sa'i, 'Dembina, anan nofa' 200 kina ea'.'

<sup>26</sup> Ea' anan na'i, "Ae' a'ipipa, emi egafis sohapila amamaga amama nambimb ese'asa anom amamaga wapoti' esis. Ea' emi egafis owa' sehapila anom amamaga, amamaga kwawie'um esis sahapilami, amama nambimb ae' endalombasam. <sup>27</sup> Ea' esis isima satago naumbih ae'asi,

sandaiwa'ma ae' epe dembiwei king asasiwei imafias, ipe' fa'as fi'i na'ae pehas ma naep ae'ami.' ”

*Jisas nafe' nawis Jerusalem si'i anona dembinai king*

*(Mt 21:1-11; Mk 11:1-11; Jo 12:12-19)*

<sup>28</sup> Jisas na'i basef amama ea' nali' nafe' naila eaf nafe' Jerusalemi nondowasa'. <sup>29</sup> Ea' nataga Betfagei Betani wambel anama felefele'ma halaf anama oliv motawama ea' nasapa' alupumi ananiami biam mali' mafe'. <sup>30</sup> Na'ipam na'i, “Ipe' bipa pefe' wambel nanima nape gani wa'ili felefele'ma na'ae. Pefe' piwis piti anona mafin donki sa'unai esis saundana nail. Ina dei' enin epen natomana, ata' owa'. Petagahona pefa'ana pifi'mai ae'. <sup>31</sup> I'i enin epen nihali'ipa ni'i, ‘Patagahona ma main?’ ea' pegwaman pi'ipan pi'i, ‘Dembina i afa'inai na'ipafa na'i nonda' maolanana.’ ”

<sup>32</sup> Ea' amam biam mafe' mati amamaga amama na'ama etin si'i do'ok na'ipam. <sup>33</sup> Ea' matagaha mandofa donki anama sa'unai. Matagahona etin, amam mumafi donki anamai ma'ipam ma'i, “Dei' maina ipe' patagaha donki anama?”

<sup>34</sup> Ea' amam ma'ipam ma'i, “Dembina i na'i nonda' anona maolanana.”

<sup>35</sup> Ea' amam mofa' donki anama mafi'mai Jisas mawamona sagegw amamumi matoma ilifa donki anama. <sup>36</sup> Ea' magiambama Jisas nalata natoma donki anama nafe', ea' esis amam nematawa sa'i sefela agel ananinai lu'una. Ea' dei' sambe'amanam sagegw sase'wiam eaf so-falo'mana.

<sup>37</sup> Anan nafi'i felefele'ma eaf nakini'i halaf lawah oliv motawama, alupusi ananisi hiesi sandanifel, ukup mapoma amamaga amama pepel fowa' nanda'anai. Ea' sanda' la kolo' sa'oh mehip, safela agel Godi lu'una.

<sup>38</sup> Sa'iam na'ama sa'i,  
 “Ape' mefela agel God nape ilifi lu'una, howalagon anan atona. Ma'i anan nofalo'ma ine' dembinai king nafi'i agel Ananinai nese'ena pepel ma nenda' maol Ananinai. Esis sape heveni opalef awanem.”

<sup>39</sup> Ea' anom dambami Farisi mape maloma epes hiesi ma'ipa Jisas ma'i, “Dembinai Tisa, ine' nini-fala alupusi ine'isi ma ata' sosopama malogof.”

<sup>40</sup> Ea' Jisas nagwamasa basef na'i, “Ae' a'ipipa endilisi, i'i esis seasopama malogof, atuwasi otamba atom ma'oh etapi mope mi'i mehip.”

### *Jisas nalopa Jerusalem*

<sup>41</sup> Ea' Jisas nataga felefele'ma Jerusalem natol-ogon nalopagon. Nalopa esis amam nematawa sape taun anamaisi. <sup>42</sup> Ea' na'i, “I'i dei' nemaf anae' atona ipe' pegawa basef ofagema ma pepe opalef awanem, amama andeande'. Owa'etin. Basef amama ata' mandambahe', dei' ipe' owa' ata' pegawam. <sup>43</sup> Anona nemaf netaga, naumbih ipe'isi sifi'i sola' indaleleb sonda' wandaf sili'akwepa. Ea' sili'akwepa endilisi ma anama hiagoma. <sup>44</sup> Ea' sehapa soham-bombagepa endilisi, peloma awasi ipe'isi sape nomona wambel ipe'inai. Esis sohambombaga wambel awagon hi'ilagon endilisi, ea' ina nambimb otamba sala' ifagwami mondapapei'ma



etin mope, owa'. Mo'oh deindei'. Dei' main? Ipe' owa' pegawa nemaf dei' God niefi'anai ma nefa'epa pitanimani pepe andeande', owa'."

*Jisas nagalo'mas amam manda' bisnis ipat lu'unai Godi sanda' lotuwanai nomon*

*(Mt 21:12-17; Mk 11:15-19; Jo 2:13-22)*

<sup>45</sup> Ea' Jisas nehafel nawis ipat lu'unai Godi sanda' lotuwanai ea' nagalo'mas amam amama manda' bisnis matala amamaga ipat anama nomon. <sup>46</sup> Anan na'ipam na'i, "Basef mape Baibeli, God na'i, 'Ipat ae'anai nondapoma esis sifi'i sopama sonda' beten sohali' Ae!' Ea' ipe' panda'ana nataga si'i sanda' walanai."

<sup>47</sup> Nimeguf hiami Jisas nawalipasa basef ipat anama nomon. Ea' amam pris dambami maloma amam agufumi Judai maloma amam mawalipasa mi'uli Godi magolopa eafa mohana neaga'. <sup>48</sup> Ea' esis amam nematawa hiesi ukup bo'om endilisi ma seame' basef ananiami. Na'ama amam ina mati anona eafa meahana, owa'.

## 20

*Esis sahali' Jisas sa'i, emi nase'ana agel lu'unai*

*(Mt 21:23-27; Mk 11:27-33)*

<sup>1</sup> Anona nemaf Jisas nape nase'asa basef amam nematawa ipat lu'unai Godi nomon, nawalapa basef bu'wami Godi. Ea' amam pris dambami maloma amam mawalipasa mi'uli Godi maloma agufumi amam Judai mafi'mai anan. <sup>2</sup> Ea' mahali'ana ma'i, "Ine' ni'ipafa. Ine' nanda' maol anama ma pepel eminai? Emi na'ipina dei' nape dembinai nanda' maol anama?"

<sup>3</sup> Ea' Jisas nagwamama basef na'i, "Ae' wapoti' a'i ihali'ipama anom basef pi'ipiam. <sup>4</sup> Aman anama Jon napisi'as embeli, God nape heveni na'ipana napisi'as o enin epen etapani na'ipana?"

<sup>5</sup> Ea' amam mame' basef amama manda'ipama ma'i, "Afa' wi'i, 'God nape heveni na'ipa Jon napisi'asi', atuwasi anan ni'ipafa ni'i, 'Dei' maina ipe' owa' pembale'efana?' <sup>6</sup> Ea' afa' wi'i, 'Enin epen nape etapanai na'ipana', na'ama esis amam nematawa sohafa. Dei' main, hiesi sa'i Jon anona profet dembinai."

<sup>7</sup> Ea' magwamana basef Jisas ma'i, "Afa' ina ogawana."

<sup>8</sup> Ea' Jisas na'ipam na'i, "Na'ama etin ae' ina i'ipipa ma emi nase'e agel lu'unai anda' maol anama Ae'anai, owa'."

*Basef womun etina epes awami mumafi aof sawa mandalef wainim*

*(Mt 21:33-46; Mk 12:1-12)*

<sup>9</sup> Ea' Jisas na'ipasa basef amama womun etin esis amam nematawa na'i, "Anona aman nanda' anona aof nawa wain. Ea' nakwahomana aof anama anom amam monda' maolana aof anama mofa' monianai. Ea' nafe' napani nogota launai anona wambel laogoma. <sup>10</sup> Ama nogota su'utip mailanai, anan nafamona aofi nasapa' anona nanda' maoli nafe'ma amam manda' maol aof ananinai. Anan na'i amam mose'ana anom su'utip gwa'aimi ma aof anama. Ea' amam mahana matofana notanima nafe'. <sup>11</sup> Ea' nafamona aofi nasapa' anona nanda' maoli nafe' wapoti' ma amam, ea' mahana wapoti' manda'ana aona

matofana nafa' nafe'. <sup>12</sup> Ea' nasapa' anona nafe'ma wenifi. Ea' amam mahana makwahona nawis ande'.

<sup>13</sup> Ea' anan nafamona aofi na'i, 'Ae' ata' enda' main? Nogalome ae'anai ae' okom nainailana, esapa'ana nofo'o. Nambimb mome' malogel ananinai o owa'?

<sup>14</sup> Ea' amam mati nogalomana ananinai nafi'i, manda'ipama etin ma'i, 'Aman anama anona nemaf nofa' amamaga hiami ahalomanai. Afa' ohana ma afa' atofa ofa' aof anae'.

<sup>15</sup> Ea' mahana makwahona nawis aof ande'ana, mahana afuna. Ea' nambimb anan nafamona aofi nonda' maina amam?  
<sup>16</sup> Nambimb nifi'i noham afum hi'ilam, nose'asa aof anama nofe'ma enis epes."

Esis same' basef amama sa'i, "Waf anama aonai endilisi. Afa' wandaiwa'mana."

<sup>17</sup> Ea' Jisas natilis andeande' na'ipas na'i, "Ea' na'ama etin si'i basef amama mape Baibeli ma'i, 'Owap anama amam mala' ipati magalo'mana, dei' nataga owap nape nali'i ma nembalo' ipat.'

Basef amama ofagema ma'i main? <sup>18</sup> Emi egafis hilili'ilamas sowa owap anama, pepe'etas. Ea' i'i owap anama nowa nesali'as, loloweas si'i sopof atona."

<sup>19</sup> Ea' amam agufumi esis Judai mogawa Anan na'i basef amama womun etini mondela'wifa amam. Ea' ma'i mombalo'ana. Ea' amam um-bamahama esis amam nematawa hiesi.

*Amam mahali' Jisasa esis sease'ana takis Sisar gavman dembinai Romunai o owa'?*

*(Mt 22:15-22; Mk 12:13-17)*

20 Ea' amam mawalipasa mi'uli Godi mal-oma amam pris dambami manda'ana naep di'indi'ana ma mombalo'ana mofa'ana. Ea' masapa' anom amam mafi'i matolona. Amam amama manda' doufindouf mambaso'am ma'i amam manda' waf endilisinai. Owa'etin. Amam ma'i mombalo'a Jisasa anom basef na'iami ma moso' anan neafe'ma gavman dembinai ma nonda' kotimana.

21 Ea' mahali' Jisas ma'i, “Dembinai tisa, ape' mogawena basef ine'imi bu'wami atom na'ipasam esis amam nematawa. Ine' na'i basef atifima epes isima hiesi agufisi saloma isima agof a'asi na'ama etin hi'alas. Ine' na'ipasa basef maloma waf bu'unai Godi endilisi ma epes hiesi. 22 Mi'uli ape'inai na'iam na'imama? Ape' mose'ana takis Sisar gavman dembinai esis Romi o owa'?”

23 Jisas negawa ea' ma baso'am amamunai. Ea' na'ipam na'i, 24 “Ipe' pihiambe anona moni ma ata' itolona. Ambal naloma agel anama mailanai emina?”

Ea' ma'i, “Amama gavman dembinai Sisar esis Romi.”

25 Ea' nagwamam na'ipam na'i, “Ea' amamaga Sisari, amama pese'anam Sisar. Ea' amamaga Godi, pese'anam God.”

26 Ea' amam ina la'ifima mombalo'ana ma anom basefa naep esis amam nematawa hiesi, owa'. Amam ukup matamea ma basef amama na'ipamami, ea' masopama malogof tol mape.

*Amam manda' doufindouf mahali' Jisasa epes  
saga'i sohafel wapoti'*

*(Mt 22:23-33; Mk 12:18-27)*

<sup>27</sup> Anom Sadyusi mafi'mai Jisas. Amam hiami mombale'ef saga'i ina anona nemaf sotanima sohafel wapoti', owa'. <sup>28</sup> Ea' mahali'ana ma'i, “Dembina tisa, fowa' gani Moses nanda' anom basef mail buki ma ape' ma'i, 'I'i anona aman noga' ma anan awasi a'ana, waulu'mana ata' kope, owalomana ananinai nose'akwa nola enis awasi ma soho'ofana.’ <sup>29</sup> Ea' fowa' amam wambota atotona 7-peleim mape. Nali'i sahalomam nase'akw so'uso'win a'akw naga' nakwaho'w kwape. <sup>30</sup> Ea' owalomana nafela'w nase'akw. <sup>31</sup> Ea' anona owalomana la'efinai wapoti' nanda'am na'ama etin, ea' anona natu'ulanai nase'akw manda'am na'ama etin mafe' matagama owagufunai akutainai. Amam amama wambutaim 7-peleim ina mola enis awasi, owa'. Maga' etin hi'alam. <sup>32</sup> Anona nemaf nemata'w waulu'mam kwagi'mam kwagi' kwaga'. <sup>33</sup> Ea' anona nemaf esis saga'i sohafel wapoti', nemata'w akwama kope nemata'w emi'wi? Amam 7-peleim mase'akw hi'alam.”

<sup>34</sup> Ea' Jisas na'ipam na'i, “Amam nematawa nogota anae'isi dei' sandase'ama. <sup>35</sup> Ea' emi egafis God na'i bo'wes andeande'ma sotanima sohafel wapoti' sope namusi nemaf anama etap dambainai neataga ina sendase'ama, owa'. <sup>36</sup> Esis ina sogal wapoti', owa'. Sopen si'i ensel Godi. Sotanima sohafel hi'agilif wapoti'. Na'ama sope awasi Godi. <sup>37</sup> Basef amama ma saga'i sotanima sohafel wapoti', amama fowa' gani Moses

nihia'ambepam nif ilalowa mataga lawag sa'unai fandonai, ma'ia anan nofala Dembinai na'ia 'Ae' God Abrahami, Aisaki, naloma Jekopi.'

<sup>38</sup> Basef amama ma'ia God ina Dembinai ma epes isima saga'ia, owa'. Anan Dembinai ma epes isima sape namusi. Dei' main, epes hiesi sape namisa naep Godi hi'alas."

<sup>39-40</sup> Jisas na'iam na'ama, amam mawalipasa mi'uli Godi umbamahama mohali'ana ma anom basef wapoti'. Ea' anom magwamana basef ma'ia, "Dembinai Tisa, ine' na'iam andeande'."

*Jisas nahali' amam Farisi ma Kraisi anan nogalomana eminaia*

*(Mt 22:41-46; Mk 12:35-37)*

<sup>41</sup> Ea' Jisas na'ipam na'ia, "Amam ma'ia Kraisi, God nasapa'ana nafi'ia anan akunamana Deviti. Ma'ia Kraisi aman atona falafunai si'ia epes sape etapi. Dei' maina amam ma'iam na'ama ma Kraisi? <sup>42</sup> Buk anama Songi Devit na'ia na'ama na'ia, 'Dembinai God na'ipa Dembinai ae'anai na'ia, "Ine' nepe lagel da'isinai ae'anai,

<sup>43</sup> la'ela'ef nefe' netagama anona nemaf ae' enda' naumbih ine'isi sefe' owina, ine' si'ia sia bo'wagah ine'imi maituma."

<sup>44</sup> Devit fowa' gani nofala Kraisi na'ia anan Dembinai. Amama atom Kraisi ina aman atona falafunai, owa'. Anan Dembinai. Dei' maina Devit nofala Kraisi akunamana ananinaia?"

*Jisas na'ia waf aonai amam tisa mawalipasa mi'uli Godi manda'anai*

*(Mt 23:1-36; Mk 12:38-40; Lu 11:37-54)*

<sup>45</sup> Amam nematawa hiesi ata' sape same' basef amama, Jisas na'ipa alupumi ananinaia na'ia,

<sup>46</sup> “Ipe' pindumafuma amam amama mawalipasa mi'uli Godi. Amam ma'i mundawisam luwaguf bu'wami atom mefe', si'i dambami atom mandawisami. Ma'i enis epes sotolom sondalalimam sonda'mam nemaf bu'unai sinifelom anama lu'wagoma ma naep hiesi sandatama sapoma ma sefela agof amamumi lu'um. Ea' amam ukup ma'i siaifah amama motawa mali'i atom, dambami atom mapoma, nomon ifagw esis Juda hiesi sa'i basef sapeimi o anama hiesi sandakolasam nimeguf amama sanda' gwa'aimi lu'wami.  
<sup>47</sup> Amam amama mawis ifagw amama nematawa alifiwai, manda' wala amamaga awoumi. Ea' manda' beten launai etina esis sotolom si'i amam bu'wami. Anona nemaf God nowaloga epes hiesi, enis epes owa' seanda' waf aonai na'amainai sofa' nimanimi kwawie'um ea' amam mofa' nimanimi lu'wami endilisi.”

## 21

### *Nemata'w alifi'wi kwanda' ofa kwase' God*

<sup>1</sup> Ea' Jisas nape ipat lu'unai Godi natologon tulif nati enis epes moni hianaisi sakwaha moni nowala bokis moni nalami soaso' God. <sup>2</sup> Ea' nati ano'w nemata'w alifi'wi kwala moni sa'unai bie-fina newala bokis amama. <sup>3</sup> Ea' na'i, “Ae' a'ipipa endilisi, nemata'w akwama alifi'wi kwa'waha moni lu'unai nikila' otamba hiami esis amam nematawa hiesi sakwahomi. <sup>4</sup> Epes isima hiesi moni hianai na'omas sakwaha tu'wanina atona newala bokis. Ea' nemata'w akwama moni a'akw endilisi kwa'waha moni akwa'inai hi'alana. Ea' owa' anona no'oh kweatala gwa'aimi, owa'. Ea'

moni akwa'inai biefiṇa sa'unai nikila' moni hi-anai esis sakwahonai.”

*Jisas na'i anona nemaf ipat Godi lu'unai sanda' lotuwana'i aona hi'ilana*

<sup>5</sup> Anom alupumi Jisasi ma'i basefa ipat lu'unai Godi sanda' lotuwana'i ma'i, “Esis sofalo'ma ipat anama otamba bu'wami amamaga bu'wami esis amam nematawa sase'anam Godi.”

Ea' Jisas na'i, <sup>6</sup> “Amamaga amama dei' pat-ulumu, anona nemaf dahandahama neataga, ina anom otamba mandapapei'ma etin la'ifima mopan, owa'. Sugulatam sowalom hi'ilam mofe' mo'oh atona etin hi'ilam.”

*Jisas na'i amamaga nimanimi hiami anona nemaf motaga*

<sup>7</sup> Ea' mahali'ana ma'i, “Dembina'i Tisa, maina nemaf amama motaga? Maina ikwaf nili' netaga ma afa' weagawa amama felefele' motaga?”

<sup>8</sup> Ea' Jisas na'i, “Ipe' pindumafuma pepe. Na'ama enis epes sombaso'mepa. Epes hiesi anona nemaf sifi'i si'i agel ae'anai si'i, 'Ae' ea' ma'uwi.' Ea' enis si'i, 'Dei' nemaf nafi'i felefele' ea'.' Ipe' ina pefe' pila esis, owa'. Hapeimi.

<sup>9</sup> Anona nemaf peme'asa basefa wandaf lu'unai hianai ea' enis si'i sondaiwa'ma amam gavman dambami mumafias sonda' wandaf. Nemaf anama ipe' ina umbamohepa, owa'. Amamaga amama ata' mili' motaga, ea' nemaf akutainai ina notaga mehipe, ata' owa'.”

<sup>10</sup> Ea' na'ipam na'i, “Enis epes sape etap hiagoma sefela wandaf sopa' soloma esis sape anona etap hiagoma. Anona aman dembinai king no'wa enis wambel hiagoma ananisi sopa'



soloma anona dembinai king no'wa ananisi anona wambel hiagoma. <sup>11</sup> Anona nemaf sowambon lu'unai nokoto' etap hiagoma. Anagon nolomeahas lu'unai neatagamas, wambel hiagoma ea' awes lu'unai notaga wambel hiagoma. Esis anona nemaf siti gani ilif ikwaf lu'unai neatagama amamaga mamumami monda' epes umbameahahas endilisi.

<sup>12</sup> Amamaga amama hiami ina motaga mehip, ata' owa'. Esis sili' sombalo' ipe' paila basef ae'ami. Ea' sonda'epa kwapete'epa. Sonda'mepa kot nomon ifagw esis Juda sa'i basef sapeimi ea' sonda'epa penda' kalabus. Ea' sofa'epa pefe' sohaponepa pitu naep amam king moloma gavman dambami. Ipe' pefela agel ae'anai paila basef ae'ami. Amama atom sonda'epa na'ama. <sup>13</sup> Sonda'mepa waf anamanai si'i anona eafa pewalapa basef bu'wami pi'ipasam. <sup>14</sup> Ea' ipe' pihapila nomonas ipe'imi mope la'ifim, ama ipe' ina ukup mopoma anom basef pi'i pegwamasam mehip, owa'. <sup>15</sup> Dei' main, nemaf anama ae' atowe enda' basef mope malogof ipe'imi ese'epa gawa bu'unai ma epes isima ina la'ifisa seagwa basef amama ae' iesi'ipami, owa'. <sup>16</sup> Ehasapa mamasepa sahin owan esimbel atom ipe'isi soloma alupisi, esis wapoti' anona nemaf sowalapepa ma naumbih ipe'isi. Ea' soha enipa pega'. <sup>17</sup> Anona nemaf epes hiesi wambel hiagoma opalef aoma ipe' endilisi. Esis sati ipe' paila basef ae'ami, na'ama dei' sahepa. <sup>18</sup> Ea' ipe' ina nambimb pega', owa'etin. Ina anona auf atotona nape balagah ipe'imi higililana, owa'. <sup>19</sup> Ipe' pepe

la'ifipa ma anona nemaf pefa' ambal namunai.

*Jisas na'i basefa Jerusalem anona nemaf notaga awagon*

<sup>20</sup> Nemaf anama ipe' piti soldia hiami esis naumbih sifi'i sonauli' Jerusalem, ipe' pegawa nambimb felefele'ma taun anama lu'unai neataga aona. <sup>21</sup> Nemaf anama amam nematawa sape etap hiagoma Judiai sofa' sefe' sondowasa' halafutagw. Ea' esis amam nematawa sape nomon Jerusalemi sokwaha wambel anama sofa' sefe' laogon. Ea' isima sape aof wambel anama, ina ata' sefe' suwis, owa'. <sup>22</sup> Dei' main, nemaf anama God nogwamasa awami isima sanda' waf aonai si'i basef hiami mail buk Baibeli mondawalap alihim endilisi. <sup>23</sup> Nematawa opafuwai waloma awama awasi ata' sa' nomagof atomi, ae' a'i awau uwahipiwa endilisi ma nogota anama ofa' nimanimi lu'wami. Nimanimi amama aom endilisi motaga etap anae' ma okom wandafunai Godi nambimb neafe'ma epes isima. <sup>24</sup> Enis, bainat nohas sogal. Enis, naumbih sonda' kalabusimas sofa'as sefe' sope etap anae' hiagoma hi'ilagon. Ea' epes isima sololama Godi sotaga sofa'asa wambel anama Jerusalem bo'wagah asasimi sumafiagon. Ea' sope la'ela'ef sefe' na'ama etina nemaf God nandandepanai ma nogota asasinai hi'ilana.”

*Jisas na'i, “Anona nemaf ae' ataga epen endilisiwei ifi'i.”*

<sup>25</sup> “Nemaf anama ikwaf hianai notagama aon alipunai owambunai neloma ondowa. Etap anae' amam nematawa hiesi sape anona etap lu'unai

hiagoma gegela'asis kwapete'as. Esis umba mohas kwapete'as ma naoh lu'wami mohafel lu'um mowa bililig etin ea' sowa selef. <sup>26</sup> Ea' ondowa maim mape gani ilifi mondakoto' bolatin mofe' mifi'i mope. Na'ama esis amam nematawa hiesi umbamohas kwapete'as sowa so'oh etap si'i saga'i. Esis ukup mopoma amamaga amama ma'i meataga etap anae'.

<sup>27</sup> Ae' ataga epen endilisiwei. Nema'f anama siti ae' eloma elagw otaga ilif ifi'i eloma amamaga mafifili bu'wami Godi moloma pepel ananinai. <sup>28</sup> Nema'f anama amamaga amama mohafel, ipe' pitu piniga. Dei' main, nema'f anama felefele'ma neataga God notagahipa ma waf aonai ipe' panda'anai nofa'epa petanimani.”

*Lawag fik nanda'am nihi'ambapa mogawa nogota anama amamaga meatagai*

<sup>29</sup> Ea' Jisas na'ipasa basef womun etin na'i, “Ipe' piti lawag anama fik noloma lawah hiami wapoti'. <sup>30</sup> Ipe' piti elif monafa ma masowa, pegawa nogota anama nelemb ea' felefele'ma meaof. <sup>31</sup> Ea' na'ama etin, i'i ipe' piti amamaga amama ae' ali' a'ipipami motaga, ipe' pegawa nema'f anama Kraisa' nifi'i nupe dembinai numafi epes hiesi Ananisi felefele'ma neataga.

<sup>32</sup> Ae' a'ipipa endilisi, amam nematawa dei' ata' papani ina nambimb pega' mehipe, ata' owa', ipe' piti amamaga amama hiami motaga hi'itam. <sup>33</sup> Otaga noloma etap hiagoma anona nema'f a' higililam hi'itam, ea' basef ae'ami ina hi'itam, owa'. Mope la'ela'ef hihif.

*Amam alupumi Jisasi mundumafuma ande-  
ande'ma mihi'ama waf hianai aonai*

<sup>34</sup> Ae' ataga epen endilisiwei. Ipe' pindu-  
mafuma andeande' nemaf anama ae' iefi'ianai.  
Na'ama penda' waf aonai penda' waf alop  
atonai, pea' embel la'ifimi hiami ukup motamea  
ma nimanimi mamumami etapami atom. I'i  
waf anama nose'elipa hi'ilipa, nemaf anama  
ae' iefi'ianai notagamepa mehipe si'i sakwaha  
wambawa saha mafis. <sup>35</sup> Nemaf anama no-  
taga ma amam nematawa hiesi sape etap hiago-  
mai ganigani hi'alas na'ama etin. <sup>36</sup> La'ela'ef  
pindumafuma pepe ma ina penda' waf aonai  
anama, owa'. Pepe penda' beten la'ela'ef ma  
God nose'epa pepel pitu la'ifipama pihi'ama ama-  
maga amama ma'i meatagamipei. Ama pitu  
la'ifipa ma ae' ataga epen endilisiwei isimba'epa  
ewalogepa.”

<sup>37</sup> Nimeguf hiami la'ela'ef Jisas nape nawalipa  
esis amam nematawa ipat lu'unai Godi nomon,  
ea' owamb nafe' na'ihi halaf anama oliv  
motawama. <sup>38</sup> Ea' amam nematawa hiesi sohafel  
kuhumbita atona safi'mai anona seme' basef  
ananimi ipat lu'unai Godi la'ela'ef.

## 22

*Judas na'i basef la'ifimi naloma agufumi Juda  
ma nihi'ambamam Jisas napoma*

<sup>1</sup> Felefele'ma nemaf anama Pasova sonda'  
gwa'aيمي lu'wami esis Juda sogwa' bret owa'  
neatef lu'unaia felefele'ma netaga. <sup>2</sup> Ea' amam  
pris maloma amam mawalipasa mi'uli Godi

magolopa eafa moha Jisas neaga'. Dei' main, amam umbamahama esis amam nematawa.

<sup>3</sup> Ea' Satan nawis okom Judasi Kariotinai. Anan amam 12-peleim alupumi Jisasi. <sup>4</sup> Ea' Judas nafe'ma amam pris dambami maloma amam plisman dambami mumafi ipat lu'unai Godi. Amam amama ma'i basef mandame'mama Judas nogolopa eafa nease'ama Jisas nofe' lagof amamumi. <sup>5</sup> Ea' mandanifel ma'i basef mandame'mama mose'ana anom otamba Judas. <sup>6</sup> Ea' anan na'i a'e ma basef amamumi, ea' nafe' nagolopa eafa nihi'ambama Jisas amam meambale'ana. Anan nahafa anona nemaf ma owa' enis amam nematawa sope solomana.

*Alupumi biam mandondomba gwa'aimi lu'wami Pasova*

<sup>7</sup> Nemaf anama nataga esis Juda sa'i sonda' anom gwa'aimi lu'wami sea' anona bret owa' neatifi. Anama sa'i soha anom sipsip nogami hiami ma sonda' gwa'aimi amama Pasova. <sup>8</sup> Ea' Jisas nasapa' Pita naloma Jon na'ipam na'i, "Ipe' bipa pefe' pendondombamafa gwa'aimi amama Pasova ma afa' weagwa'am."

<sup>9</sup> Ea' amam mahali'ana ma'i, "Ine' na'i afa' ofe' ondondomba ipat enima?"

<sup>10</sup> Ea' na'ipam na'i, "Peme', ipe' pefe' piwis gani wambel lu'unai, atuwasi piti anona aman nofa' embel malep lu'unai nitilipa eaf. Ea' pigi'mana pefe' piwis ipat anama anan nefe' niowisanai. <sup>11</sup> Ea' pihali' ofagena ma ipat anama mai pi'i, "Tisa afa'inai na'ipafa na'i, ipat anama sapeinai netawa eti? Anan na'i no'wa afa' atofa alupufai ope onda' gwa'aimi amama lu'wami

Pasova.’ <sup>12</sup> Ea' anan nihi'ambepa rum anama lu'unai nape ilifi, tebol siaifah ma'oh etifim. Ipe' pendondomba gwa'aimi rum anama.”

<sup>13</sup> Ea' amam mafe' mati amamaga amama na'ama etin si'i Jisas nali' na'ipamam ea' mandondomba gwa'aimi amama Pasova.

*Jisas nase'ama bret naloma embel wain alupumi ananiami ma'am*

<sup>14</sup> Nogota a' nataga ma sogwa' gwa'aimi amama lu'wami Pasova, Jisas nao'wa alupumi ananiami mafi'i mape, anan nafe' nape fele-fele'ma tebol.

<sup>15</sup> Ea' na'ipam na'i, “Ae' okom na'i ata' ea' gwa'aimi amama Pasova elomepa uli', ma atuwasi efa' nimanini awami. <sup>16</sup> Ae' a'ipipa endilisi, ae' ina ata' ea' gwa'aimi amama Pasova wapoti', owa'. Anona nemaf basefa gwa'aimi amama Pasova ofagema motaga mondawalap alihim anama wambel Godi, eagwa'am wapoti'.”

<sup>17</sup> Ea' anan nafela anona kap embel wain nalami nanifela God na'i, “Ipe' fela embel amama pendandamam. <sup>18</sup> Ae' a'ipipa, dei' anona nemaf wapoti' ae' ina ea' embel wainim elomepa, owa'. Anona nemaf epes hiesi siowis wambota Godi numafias wambel Ananinai, ae' ea' embel wain anama wapoti' elomepa.”

<sup>19</sup> Ea' anan nafelai bret nanifela God nawalona nase'am na'i, “Bret anama alop ae'anai. [Ae' ase'epana ma iegiangamepa. Penda'am la'ela'efa ukup mopoma ae'.”

<sup>20</sup> Amam ma'am hi'alam, nanda'am na'ama etina anona kap embel wain nalami, na'i, “Wain

embel amama esimbel ae'ami manda' basef Godi dambaimi endilisimi mataga la'ifim. Esimbel amama ae' ekolo'wama iegiangamepa.]

<sup>21</sup> Ea' ipe' piti aman anama na'i nowalapa ae' ma amam naumbih ae'ami, nape na' gwa'aimi nalome tebol amae'. <sup>22</sup> Ae' ataga epen endilisiwei, naman ega' si'i eaf fowa' gani God nandandepanai. Ea' aman anama neawalape ma amam naumbih, ae' ati uwahipina endilisi. Dei' main, nimanimi lu'wami motagamana.”

<sup>23</sup> Anan na'iam na'ama, alupumi ananimi atom mandahahali'ma ma'i, “Epen afa'ini emi atuwasi neanda' waf anama?”

*Alupumi Jisasi ma'i basef mandahihianamam ma'i emi nepe nili' ma amam*

<sup>24</sup> Amam alupumi Jisasi ma'i anom basef mandahihi'anamam ma'i, “Emi nepe dembinai afa'inai?”

<sup>25</sup> Ea' Jisas na'ipam na'i, “Amom king dambami ma esis hiesi sololama Godi sape lu'wagoma, mape dambami asasimi manda'as kwapete'as. Amam mumafi esis la'ifim, ea' ma'i esis so-falam agof lu'wami si'i manda' waf bu'unai mi-giangamasi. <sup>26</sup> Ea' ipe' ina penda'am na'ama, owa'. Emi egalini ni'i nope dembeni ma ipe', anan ata' nope si'i amama agof a'ami si'i isima sanda' maoli ma segiangamepa. <sup>27</sup> Emi epen dambeni nikila' enis epes? Epen natoma na' gwa'aimi teboli o epen nanda' gwa'aimi nefa'am nafe'manai? Ea' ae' ape alomepa si'i nanda' maoli ma iegiangamepa. <sup>28</sup> Fowa' amamaga amama magwamba ae'i, nimeguf amama ipe' pape palome, ipe' ina pakwahowe, owa'etin.

29 Ahalome ae'anai nase'e agel lu'unai na'ipi ape dembiwei, imafi enis epes. Ea' na'ama etin ae' ese'epa agof lu'wami i'ipipa pepe dembipei king pimafi enis epes. 30 Nemaf anama ipe' pepe dembipei king peloma ae' pea' gwa'aimi embel pelome tebol ae'ami wambel Godi. Ea' pepe siaifah bu'wami amam dambami kingi, pewaloga epes wambotagw 12-peleim ape'isi Israel.”

*Jisas na'ipa esis na'ama na'i, “Atuwasi Pita nembaho' agel ae'anai ni'i, ‘Ae' ina egawa Jisas.’”*

31 Ea' Jisas na'i, “Saimon, Saimon, ine' neme'. God na'i a'e ma Satan nogwamba ipe' ma penda' waf aonai si'i sandilama rais ama bu'wami mafe' anagon awami mafe' anagon. 32 Owa'etin. Ae' anda' betena egiambamena ma nembale'efa ae' la'ela'ef. Atuwasi nemboma opaf nenda' owapena ine'imi motaga la'ifim.”

33 Ea' Pita nagwamana basef na'ipana na'i, “Dembinai, ae' andandombam elomena weafe' kalabus. Ea' ae' andandombam ega' ealomena wapoti'.”

34 Ea' Jisas nagwamana basef na'i, “Pita, ae' a'ipina endilisi! Atuwasi owamb anae' awata ata' owa' neanda'am, ine' nembaho' agel ae'anai ni'i wenif ni'i, ‘Ae' owa' egawa Jisase.’”

*Jisas na'ipam basef amama ma paos maloma brasbeli su*

35 Ea' Jisas na'ipa amam na'i, “Fowa' ae' as-apa'epa pandailagof pafe', ipe' ina pefa' paos moni nalami maloma brasbeli su, owa'. Pafe'



etin. Nemaŋ anama anom amamaga a'epa o owa'?"

Amam magwam ma'i, "Owa'etin."

<sup>36</sup> Ea' Jisas na'ipam na'ama na'i, "Ea' emi dei' aman paos moni nalami ma'omanai anan nefa'am. Ea' brasbel wapoti' na'ama etin. Aman bainat a'anai anan nose'asa saket ananinai enis sotalona, notala anona bainat.

<sup>37</sup> Dei' main, anom basef ma ae' felefele'ma motaga mondawalap. Anom basef mail Buk Baibeli fowa' gani ma'iam na'ama ma'i, 'Esis ukup ma'i ae' epen aowe' atowe.'

Ae' a'ipipa endilisi! Basef amama felefele' motaga endilisi ma nimanimi lu'wami atuwasi motaga ma ae'."

<sup>38</sup> Ea' alupumi ananiami ma'i, "Dembina'i, ine' niti. Afa' bainah biam amae'."

Ea' nagwamam na'ipam na'i, "Ea' amama."

*Jisas nanda' beten anagon lawah oliv motawama agiliguma Getsemani*

<sup>39</sup> Ea' Jisas nakwaha taun nawis ande' nafe' halaf lawah oliv motawama si'i la'la'ef nanda'am. Ea' alupumi ananiami magi'mana mafe'. <sup>40</sup> Anan nataga na'ama na'ipam na'i, "Ipe' penda' betena amamaga meagwamba'pei ina motagamepa, owa'."

<sup>41</sup> Ea' nakwaha amam nindiki'ah nafo'o felefele', nogota bandana si'i aman nakwaha anona otam nafe' nowama. Ea' nindiwa nembawa notawa nanda' beten na'i, <sup>42</sup> "Ahalome, ine' ni'i a'e, nekwahome kap anama. Ea' ine' nila okom ine'inai atona, ae' owa'." [ <sup>43</sup> Ea' anona ensel nafi'i heven ilif nase'ana pepel. <sup>44</sup> Jisas name'

nimanimi ea' aom endilisi, ea' nanda' beten la'ifinai endilisi, agwah mandana si'i esimbel malo etap.]

<sup>45</sup> Anan nanda' beten ea' nohafel nafe'ma alupumi ananiami. Ea' nati amam ukup nimanim ambeh maham ma'oh etin. <sup>46</sup> Ea' na'i, "Dei' maina ipe' pa'oh? Ipe' hafel penda' beten. Na'ama amamaga meagwambipei mafi'i fele' ea' motagamepa."

*Judas na'ipa amam naumbih ma Jisas napoma, ea' mafi'i mofa'ana*

<sup>47</sup> Jisas ata' na'i etin, amam hiami mafi'i. Aman anama sofalana sa'i Judas, anan alupunai amam 12-peleim Jisasi, nafi'i nali'ma amam. Anan nafi'i felefele'ma Jisasa neasisi' dalogw ananiami. <sup>48</sup> Ea' Jisas na'ipana na'i, "Judas, ae' ataga epen endilisiwei. Ine' nasisi'i nihi'amba amam naumbih ae'ami?"

<sup>49</sup> Alupumi ananiami mape malomana mati amam naumbih Jisasi ma'i mombalo'ana mohana ea' mahali' Jisas ma'i, "Dembina, ine' na'i afa' oham bainah?"

<sup>50</sup> Ea' anona alupunai ananinai naha anona aman nanda'mana maola pris dembinai nape nali'ma pris hiami ea' natopa' aliga da'isinai pele'atana nowa.

<sup>51</sup> Ea' Jisas na'ipana mehipe na'i, "Kwaha waf anama."

Ea' Jisas nasa lagel aliga aman anamai, nataga bo'ona wapoti'.

<sup>52</sup> Ea' Jisas na'ipa agufumi Judai maloma amam pris dambami maloma amam dambami mumafi polisman hiami mumafi ipat lu'unai Godi,

mafi'i ma'i mombalo'ana. Ea' na'i, "Ipe' pefa'ai bainahi belep pafi'i si'i pa'i pewa' anona aman nanda' wandaf naloma gavmani? <sup>53</sup> Nimeguf hiami la'ela'ef ae' ape alomepa ipat lu'unai Godi awalapa basef bu'wami ma esis amam nematawa hiesi, ea' ipe' owa' peambale'e. Ea' dei' nogota anae' nemaf ipe'inai. Dei' waf anama owambunai a' nikila' ae'."

*Pita nambaso'am nembaho' agel Jisasi na'i, owa' nogawa Jisase*

<sup>54</sup> Ea' amam mombale'ana mofa'ana mafe' mawis ipat pris dembinai. Ea' Pita ina nalomam nafe' etin, owa'. Nagi'mam nafe' nape laogon. <sup>55</sup> Amam makata nif indalelemb anama nomon ipat napoma mapomam. Ea' Pita nape nalomam.

<sup>56</sup> Ea' ano'w nemata'w kwanda' maoli kwati anan napoma nif. Ea' kwatolona kwa'i, "Aman anama wapoti' anan nape naloma Jisas."

<sup>57</sup> Ea' Pita na'i, "Ehae', ae' owa'." Anan na'i, "Nemata'w, ae' ina egawa anan, owa'."

<sup>58</sup> Ea' nogota bandana hi'alana, anona aman nati Pita na'i, "Ine' wapoti' ine' aman epes hiesi ananisi."

Ea' Pita na'i, "Aman, ae' owa'."

<sup>59</sup> Ea' nogota bandana si'i aua atitin, anona aman na'i basef la'ifimi na'i, "Endilisi etis, aman anama wapoti' nape naloma anan. Dei' main, anan wapoti' Galilina'i atona."

<sup>60</sup> Ea' Pita nagwamana basef na'i, "Ehae', ae' owa' eagawa basef amama ine' na'iami."

Anan ata' na'iam etin, awata nanda'am. <sup>61</sup> Ea' Dembinai nandamboma nati Pita, ea' okom Pitai nandanda' ma basef amama do'ok Dembinai

na'ipanam na'i, "Owamb anae' awata ata' owa' neanda'am, ine' atuwasi nembaho' agel ae'anai ni'iam wenif ni'i, 'Ae' owa' egawa Jisase.'" <sup>62</sup> Ea' Pita nawisi nafe' ande' nalef mehip.

*Amam soldia ma'i basef manda' Jisas findiwana mahana*

<sup>63</sup> Amam mumafi Jisasi manda' anan findiwana mahana. <sup>64</sup> Amam mapete' anona lowaf mam-baho'mana naep mahali'ana ma'i, "Ine' ni'i basef profeti newalapa emi nahena." <sup>65</sup> Ea' manda' basef hiami awami wapoti' ma anan.

*Amam manda'mana basef Jisas ma'am dambami gavman Judai*

<sup>66</sup> Ama aon natefi'am agufumi esis Judai maloma'am pris dambami maloma'am mawalipasa mi'uli Godi,'am hiami mon-dowa'anima mape. Ea' mofa' Jisas mafi'mai'am mahali'ana ma'i, <sup>67</sup> "Ine' ni'ipafa. Ine' Krai, God nandandepena nasapa'ena nafi' o owa'?"

Ea' Jisas nagwamama basef na'ipam na'i, "I'i ae' ipipa, ina atuwasi pembale'efam owa'. <sup>68</sup> Ea' i'i ihali'ipa ma anom basef, ipe' ina pegwam, owa'. <sup>69</sup> Ea' dei' anona nemaf wapoti' ae' ataga epen endilisiwei epe wa'ol lagel da'isinai Godi."

<sup>70</sup> Ea''am hiami ma'i, "Dei' ine' God Nogalomanana a'amon?"

Ea' anan nagwamama basef na'i, "Ipe' pa'iam ea' ma'um."

<sup>71</sup> Ea''am ma'i, "Afa' wa'i ata' ome' maim basef wapoti'? Owa'. Malogel ananinai atona na'i basef amama afa' wame'am ea'."

## 23

*Amam dambami manda' kotima Jisas ma naep gavman dembinai Pailat*

<sup>1</sup> Ea' amam dambami hiami mohafel mofa' Jisas mafe'ma dembinai gavman Pailat. <sup>2</sup> Ea' ma'i mombaso'mana manda'mana basef ma'i, “Afa' wati aman anama nanda' waf aonai nafela ukup epes hiesi ma sonda' wandaf soloma gavman. Anan nandaiwa'ma epes sese'ana takisa gavman dembinai Sisar ea' na'ipapa na'i anan atona anona dembinai king Krai.”

<sup>3</sup> Ea' Pailat nahali'ana na'i, “Ine' king dembinai Judai o owa'?”

Ea' Jisas nagwamana basef na'i, “Basef amama ine' na'iam endilisimi.”

<sup>4</sup> Ea' Pailat na'ipa amam pris dambami maloma esis amam nematawa hiesi na'i, “Ae' ina ati anom amamaga awami ma epen anama, owa'. Ina ati anona waf aonai ma aman anama enda'mana anom basef, owa'.”

<sup>5</sup> Ea' amam manda'mana basef Jisasi ma'ipana basef la'ifimi ma'i, “Anan nase'asa basef esis amam nematawa hiesi nanda'as sehafel la'ifis sa'i sonda' wandafa ganima hiagoma Judia. Anan nanda'i maol gani etap hiagoma Galili ea' nafi'i nataga na'ae.”

*Amam mofa' Jisas nafe'ma gavman dembinai Herot nanda'mana basef*

<sup>6</sup> Pailat name' basef amama sa'i anan nanda' maol etap hiagoma Galili ea' nahali' amam na'i, “Aman anama anan Galilinai?”

<sup>7</sup> Amam ma'ipana ea' negawa Jisas anan Galilina'i gavman dembinai Herot numafiagoma. Ea'

Pailat nasapa'ana nafe'ma Herot. Nogota anama Herot ata' napani Jerusalem.

<sup>8</sup> Herot nati Jisas nandanifelamana endilisi. Anan name' basefa anan nogota launai, ea' na'i notolona. Anan name' basefa maol Jisas nanda'anai ea' na'i Jisas ata' nonda' anona pepel si'i God nanda'anai ma ata' notolona. <sup>9</sup> Ea' Herot nahali'anama amamaga hiami. Ea' Jisas ina nagwamana anom basef anan, owa'. <sup>10</sup> Amam pris dambami maloma amam mawalipasa mi'uli Godi mafi'i maitu felefele' manda'mana kot baso'manai la'ifinai endilisi. <sup>11</sup> Ea' Herot nao'wa amam soldia ananiami manda' Jisas findiwana ma basef awami. Ea' mofa'ai anona lowaf bu'unai mowahe'amonana masapa'ana notan-ima nafe'ma Pailat. <sup>12</sup> Fowa' Herot naloma Pailat manda' naumbih, ea' dei' nemaf anama mataga alupumi.

*Gavman dembinai Pailat na'i noha Jisas lawag usi'inai tu'wanainai*

<sup>13</sup> Ea' Pailat nofalai amam pris dambami maloma agufumi esis Judai maloma esis amam nematawa hiesi safi'i sandakolas. <sup>14</sup> Ea' na'ipas na'i, "Ipe' fa'ai aman anama pa'i nafela ukup epes hiesi nahambombagasa sanda' wandafi sifi'mai ae'. Do'ok ahali'ana ma amamaga amama ma naep ipe'imi pame'e. Ae' ina ati anona waf aonai ma aman anama ma amamaga amama ipe' panda' basefami, owa'. <sup>15</sup> Dembinai gavman Herot wapoti' na'ama etin. Dei' main, anan nasapa'ana netanima nafi'mai ape'. Ipe' pegawa aman anama ina nanda' anona waf aonai ma

ape' mohana neaga', owa'etin. <sup>16</sup> Ea' atuwasi ehana etin ekwahona nefe' wafifina.”

[ <sup>17</sup> Ea' waf esis Judai nape na'ama. Afagof danda nemaf anama sanda' gwa'aimi amama lu'wami Pasova gavman dembinai Pailat nata-gaha anona nanda' kalabusi nafe' wafifina ma esis.]

<sup>18</sup> Ea' esis amam nematawa hiesi sa'i mehip na'ama sa'i, “Ha aman anama ma noga', ea' tagaha Barabas nifi'mai ape'.”

<sup>19</sup> Aman anama Barabas anan napa' naloma amam gavmani ma taun anama lu'unai ea' naha enin epen naga'. Ea' dei' sanda'ana nanda' kalabus.

<sup>20</sup> Pailat na'i nokwawa Jisas nefe' wafifina, ea' nahali'as wapoti'. <sup>21</sup> Ea' sa'i mehip sa'i, “Hana noga', hana noga' lawag usi'inai tu'wanainai.”

<sup>22</sup> Ea' Pailat netambel nahali'as wenif wapoti' na'i, “Dei' nanda' maina waf aonai? Ae' ina ati anona waf aonai ofagena napoma aman anama ma ape' mohana neaga', owa'etin. Ea' ae' i'ipa amam soldia mohana mopagahona ea' ekwahona nefe' wafifina.”

<sup>23</sup> Owa'etin. Esis sa'i mehip sa'i anan no-hana noga' lawag usi'inai tu'wanainai. Ea' basef asasimi mikila' basef Pailati. <sup>24</sup> Ea' Pailat nasopama malogel ananinai naila ukup asasimi. <sup>25</sup> Aman anama nanda' wandaf naloma gavmani naha enin epen naga'i, sanda'ana nape nanda' kalabus, Pailat nakwahona nafe'mas wafifina. Ea' nagi'ma ukup asasimi nakwahona nafe'mas wafifina ea' nase'asa Jisas nafe'ma esisa amam soldia mefa'ana mafe' mohana noga'.

*Amam soldia maunda Jisas lawag usi'inai tu'wanainai*

<sup>26</sup> Amam soldia mofa' Jisas mafe' ea' mati anona aman Saimon, anan anona etap hiagoma Sairini, napani aolop nafi'i na'i nefe' nuwis wambel taun lu'wagoma. Ea' masasapa'ana nowandefa lawag anama usi'inai tu'wanainai ekaf ananinai nofa'ana naila Jisas nafe'.

<sup>27</sup> Ea' enis amam nematawa hiesi safe' sagi'mana ea' anowa nematawa wapoti' wafe' walef watawea wafe' wa'i uwahipina ma anan.

<sup>28</sup> Ea' Jisas nandamboma na'ipawa na'i, "Ipe' nematawa Jerusalemipei, ipe' ina pelopa ae', owa'. Ipe' pelopa ipe' peloma awasi ipe'isi'.

<sup>29</sup> \*Dei' main, anona nemaf netaga ma enis epes si'i, 'Awau nematawa asawai, ea' awama owa' weaso' nomambeha awasi, awama nambimb ope andeande' ondanifel.'

<sup>30</sup> \*Nemaf anama esis si'ipa halafutagw ma mowai mopei'as mose'elis. Ea' esis si'ipa dohotagw mose'elis.

<sup>31</sup> \*Dei' esis sanda' waf aonai ma lawag namunai.\*

Ea' anona nemaf lawag anama notaga alina, esis sonda' maina waf?"

<sup>32</sup> Ea' amam soldia mofa' amam biam manda' waf aonai ma'i moham moga' moloma Jisas.

<sup>33</sup> Ea' safe' sataga anagon sofalagon sa'i Pipitagel

---

\* 23:29: Lu 21:23      \* 23:30: Hos 10:8; Re 6:16      \* 23:31: 1 Pi 4:17; Lu 23:34; Ais 53:12; Mt 5:44; Ap 7:60; Sam 22:18      \* 23:31: Basef amama wamon etina lawag namunai alinai ofagema ma'i na'ama. Esis Juda saha Jisas naga', ea' anona nemaf nimanimi lu'wami motagamas.



Balagaina. Anama amam soldia maunda Jisas lawag usi'inai tu'wanainai. Ea' maunda anom biam manda' waf aonai manda' wali mandolam mail wa'olwa'ol Jisas nail la'afen. <sup>34</sup> Ea' Jisas na'ipa God na'i, "Ahalome, ine' nekwahomama waf aonai amam manda'meanai. Amam ina moga-wa andeande' amamaga amama manda'meam ae'i, owa'."

Ea' amam soldia manda' satu ma luwaguf maim Jisasi ma emi nikila' nefa'am mandandamam atona etin. <sup>35</sup> \*Ea' esis amam nematawa saituu sape satolona ea' amam agufumi esis Judai manda' salamalana manda'iafana ma'i, "Anan nagiambama enis epes. Ea' endilisi anan Kraiis God nandandepana, ata' nigiambama anan atona nondatagah nisila'i."

<sup>36</sup> \*Amam soldia wapoti' manda' salamalana manda'iafana. Ea' mafi'i felefele'ma anan ma'i mose'ana anom embel wainim numbutimi.

<sup>37</sup> Ea' ma'ipana ma'i, "I'i endilisi ine' king Judai, ine' ata' nigiambama ine' etina."

<sup>38</sup> Anom basef mail lawag anama ilifa balaga ananinai ma'iam ma'i, "AMAN ANAMA DEMBINAI KING ESIS JUDAI."

<sup>39</sup> Ea' anona aman nanda' waf aonai nail wa'ol na'i basef findiwaimi ma Jisas na'i, "Ine' Kraiis endilisi, ine' ata' nigiambama ine' nili' ea' nigiambamafa wapoti'."

<sup>40</sup> Ea' anona nail wa'oli na'ipana mehip na'i, "Ine' nefa' nimanimi na'ama etin si'i aman anama. Ine' owa' umba mehenama Gode?"

---

\* 23:35: Sam 22:7,8      \* 23:36: Sam 69:21

<sup>41</sup> Amam soldia maha afa' oga' andeande' wanda'hama waf aonai afa' wanda'anai. Ea' aman anama ina nanda' waf aonai, owa'etin."

<sup>42</sup> Ea' nandamboma na'ipa Jisas na'i, "Jisas, anona nemaf ine' netaga dembinai king, nemaf anama ine' okokoma ae'."

<sup>43</sup> Ea' Jisas na'ipana na'i, "Ae' a'ipina endilisi, ine' dei' nepe nelome wambel bu'unai Paradais."

### *Jisas naga' ea'*

<sup>44</sup> Aon na'i naho'walom, awamb lu'unai nataga naofenia etap hiagoma esis Judai nape nafe' nafe' nataga aon nandamboma nape gani 3 klok wambomota. Ea' owaf naluwi wapoti'. <sup>45</sup> Ea' anona lowaf lu'unai si'i uta nail ipat lu'unai God nomoni palalana hi'alana nandawal nataga bie-fina. <sup>46</sup> Ea' Jisas noga na'i mehip na'i, "Ahalome ae'anai, ae' ese'enago ambal ae'anai nofo'o lagel ine'inai."

Anan na'iam na'ama ma ea', a' naga'.

<sup>47</sup> Ea' kepten numafi amam soldiai naitu nati amamaga amama mataga, ea' nafela agel Godi na'i, "Endilisi, aman anama bu'unai."

<sup>48</sup> Ea' amam nematawa isima hiesi safi'i sandakolasa sati amamaga amama mataga, satolom ea' saha mefetagw اساسيمي sihi'ambasa ukup اساسيمي aom endilisi ea' setanima safe'. <sup>49</sup> Esis alupusi hiesi Jisasi saloma anowa nematawa wafi'i etap hiagoma Galili waila Jisas wafi'i, esis saitu laogon felefele' sati amamaga amama.

*Esis sasapa' alop Jisasi nawis anona hi'agif owap lu'unai nagali*

<sup>50</sup> Anona aman agilinama Josep anan Ari-mateainai etap hiagoma Judia. Anan aman bu'unai, dembinai ma amam mumafi esis Juda hiesi. <sup>51</sup> Anan ina na'i a'e ma amam dambami Juda moha Jisas noga', owa'. Anan nape nohafa nemaf bu'unai neataga ma epes hiesi siowis wambota Godi numafias. <sup>52</sup> Aman anama nafe'ma Pailat nahali'ana ma nefa'ai alop Jisasi neawana. <sup>53</sup> Ea' nafe' natagaha alop Jisasi nisila'i, nanda' anona lowaf afitinai nowa'ana ma nom-bafana, nasapa'ana nawis hi'agif anama nalana nomon. Hi'agif anama sagwasana nawis anona owap lu'unai. Fowa' esis ina dei' sawa enin epe-nagon, ata' owa'. <sup>54</sup> Nemaf anama sa'i sogolopa gwa'aimianai. Nemaf sapoma noma'wanai sa'i Sabat felefele'ma neataga.

<sup>55</sup> Nematawa awama Galiliwai nimbewa' waloma Jisas wafi'i, awau do'ok wagi' waila Josep wafe' wati hi'agif anama. Ea' wati nomon na'ama Josep nawa Jisasa. <sup>56</sup> Watolona ea' otanima wafe' ifagw awaumi, wandondomba wel maloma amamaga alogw bu'wami ma'ami ma bimb ofa'am ofe' hi'agif undisa alop Jisasi.

Nemaf anama Sabat nataga, wapoma noma'w si'i mi'uli Godi na'i.

## 24

### *Jisas nohafel wapoti'*

<sup>1</sup> Wafilu nemaf anama Sande nali'ma wik, kuhimbata atona awau ohafel wafe' hi'agif. Agufuwama awama. Maria Makdalai'wi kwaloma ano'w awau agel atona Maria mama'wana Jemsi waloma Joana ea' waloma anowa wapoti'. Ea'

ofa' wel maim alogw bu'wami ma'ami awau wali' wandondombami, ofa'am wafe' hi'agif. <sup>2</sup> Ea' watologon, wati owap anama ina ata' nape nowalo uta, owa'. Enin epen nafe' nawisana nafe' na'oh wa'ol. <sup>3</sup> Wawis nomon ea' awau ina wati alop Dembinai Jisasi, owa'etin. <sup>4</sup> Ea' awau ukup matamea mafe'ma amama. Ea' mehiep wati anom amam biam mataga felefele'ma awou. Luwaguf amamumi memb'al endilisi. <sup>5</sup> Ea' awau umbamahawa endilisi windiwa balagah wati etap. Ea' amam ma'ipawa ma'i, "Ipe' pafi'i pagolopa aman anama ambal napeinai ma na'ae epes saga'i ma main? <sup>6</sup> Anan ina ata' nape na'ae, owa'. Ea' nohafel ea'! Ipe' ukup mopoma basef amama fowa' nali' na'ipipemi. Nema'f anama ata' nape nalomepa ganima etap hiagoma Galili na'ipipa na'i,

<sup>7</sup> 'Ae' ataga epen endilisiwei. Esis nambimb sese'e efe'ma amam manda' waf aonai, munde lawag usu'inai tu'wanainai. Ma nimeguf biam hi'ilam, anona nema'f wapoti' etanima ehafel.' "

<sup>8</sup> Ea' awau ukup mandanda'ma basef amama fowa' na'iami. <sup>9</sup> Ea' wakwaha hi'agif otan-ima wafe' wa'ipa amam alupumi ananisi 11-peleim maloma enis alupusi hiesi ananisi wapoti' ma amamaga amama. <sup>10</sup> Nematawa awama wanowa Maria Makdalai'wi kwaloma Joana kwaloma ano'w Maria Jems mama'wana. Awau wape waloma anowa nematawa wa'ipa amam Aposel 11-peleim. <sup>11</sup> Ea' amam ma'i awau wambaso'mam wa'i basef atom wafimi. Owa' meme'awai.

<sup>12</sup> Ea' Pita nohafel nasagih nafe' hi'agif

natambe' nati nomon ea', nati luwaguf mowa'anami atom ma'oh. Ea' notanima nafe' ipat okom ananinai nataneama amamaga amama matagai.

*Anom amam biam mati Jisas eaf nafe' Emeusi*

<sup>13</sup> Nema'f anama atona anom amam biam alupumi Jisasi mohafel mafe' anona wambel sa'unai felefele' agilinama Emeus. Eaf anama nakwaha Jerusalem nafe' Emeusi kilomita 11-peleina. <sup>14</sup> Amam mafe' ea' manifa amamaga amama dei' matagai. <sup>15</sup> Amam ma'iam mandahahali'mam mafe', ea' Jisas atona nataga felefele' nafe' nalomam. <sup>16</sup> Ea' naep amamumi walufum, ina mati Jisas mogawana, owa'.

<sup>17</sup> Ea' na'ipam na'i, "Ipe' bipa pa'i main pafe'?" Nahali'am na'ama, ukup amamumi aom maitu.

<sup>18</sup> Ea' anona amam biam Kliopas nahali'ana na'i, "Epes hiesi sape Jerusalemi sati amamaga amama mataga nema'f anae' sogawam. Ea' ine' etina owa' negawai."

<sup>19</sup> Anan na'iam na'ama, Jisas nahali'am na'i, "Main de'im?"

Ea' ma'ipana ma'i, "Amamaga amama matagama Jisas Nasaretinai. Anan dembinai profet na'ipa esis amam nematawa basef bu'wami. Anan la'ifinai ma nawalipasa basef amama nanda' maol la'ifinai ma naep Godi naloma epes wapoti'. <sup>20</sup> Ea' amam pris dambami maloma agufumi ape'imi mase'ana nafe'ma amam gavman dambami. Ea' amam gavman manda'mana basef mohana naga'. Ea' maundana lawag usi'inai tu'wanainai. <sup>21</sup> Ea'

fowa' afa' ukup ma'i endilisi wa'i, 'Aman anama notagaha ape' Israel meape wafifipa.' Ea' anom basef wapoti'. Amamaga amama mataga ea' nemaf dei'inai nafe'ma wanifi. <sup>22</sup> Dei' anowa nematawa afa'iwai wanda'afa gegelalasofa kwapete'afa. Kuhimbita atona ohafel wafe' hi'agif, <sup>23</sup> ea' awo ina wati Jisas, owa'etin. Ea' otanima wafi'i wa'iam wa'i, 'Afa' wati anom ensel si'i wa'oh wandanda'ah watolom ma'ipafa ma'i." Anan nohafel nape namunai." '

<sup>24</sup> Ea' anom amam afa'imi mafe' hi'agif mati amamaga na'ama etin si'i awau wa'iam. Ea' anan ina matolona, owa'."

<sup>25</sup> Ea' Jisas na'ipam na'i, "Ipe' bipa nomonas a'ipei. Ukup ipe'imi ea' mase'epa, ina pembale'a basef hiami amam profeti, owa'. <sup>26</sup> Krai anan ata' nili' nofa' nimanimi ea' nigi' nofa' pepel howalagon ananinai nigi'."

<sup>27</sup> Ea' nali' nasefela basef hiami Baibelimi amam profet maloma Moses manda'ami nawalipamam. Na'ipam basef amama hiami ma'i anan nawalipamam ofagema hi'alam.

<sup>28</sup> Ea' amam mafe' mataga felefele'ma wambel anama ma'i meafe'ma. Ea' Jisas na'i ata' nefe' etin, <sup>29</sup> ea' ma'ipana ma'i, "Ine' nepe nelomafa. Aon nowala felefele'ma owamb."

Ea' nawis nape nalomam.

<sup>30</sup> Amam ma'i mea' gwa'aimi, anan nape nalomam nafela bret nanifela God nawalona nase'amana. <sup>31</sup> Anan nanda'am na'ama ma amam ea' naep amamumi pele'atam dei' mogawana. Ea' nohafel nafe' nakwaha amam matimana owa'.

<sup>32</sup> Ea' ma'i, "Afa' wafi'i eaf ukup afa'imi ea' mohafel endilisi ma anan nawalapa basef mape Baibeli na'ipafam nogota anama."

<sup>33</sup> Amam ma'iam na'ama ea', dei' atef mohafel motanima mafe' Jerusalem. Ea' mati alupumi 11-peleim Jisasi maloma enis alupusi amamisi sandatama sape. <sup>34</sup> Ea' sa'ipa amam biam sa'i, "Endilisi etis Dembinai notanima nohafel! Saimon natolona ea'."

<sup>35</sup> Ea' amam biam ma'ipasa amamaga amama do'ok matolom eafi. Ma'ipasam ma'i, "Anan nalomafa wape nawala bret watolona ea' ogawana."

### *Esis alupusi Jisasi satolona*

<sup>36</sup> Esis ata' sa'i basef amama atom, Jisas naitu la'afena esis na'ipas na'i, "Ae' a'i opalef ipe'imi mope awanem."

<sup>37</sup> Ea' satolona sohafel gegelalasis kwapete' umbamahas. Esis sa'i sati anona gamba.

<sup>38</sup> Ea' na'ipas na'i, "Ipe' gegelalasipa kwapete'epa ma main? Dei' maina ukup ipe'imi matamea? <sup>39</sup> Ipe' piti lagufi bo'wagah ae'ami. Ae' atowe ea' ma'uwi ape si'iwi. Ipe' pesa lagofa ae' peme'e. Gambefah ina alop naloma bihitagof mapeis si'i pati mape alop ae'anai, owa'."

<sup>40</sup> Anan na'iam na'ama ma ea', nihi'ambasa lagofi bo'wagah ananimi.

<sup>41</sup> Ea' sandanifela sati anan. Ea' esis gegelalasis kwapete' ukup matamea, owa' ata' seam-bale'efanai.

Ea' nahali'as na'i, "Ipe' anom gwa'aimi o owa'?"

<sup>42</sup> Ea' sase'ana anona aol tu'waninai saofanai.  
<sup>43</sup> Nandalombasana na'ana ama naep اساسيمي.

<sup>44</sup> Ea' na'ipas na'i, “Fowa' ae' ata' ape alomepa, a'ipipa ea' ma basef hiami mail buk Baibeli ma mi'uli God fowa' gani naso' Mosesanai. Buk anama amam profeti maloma Buk Songi, basef amama hiami ma'i ae'. Basef amama hiemi dei' mataga endilisi mandawalap alihim.”

<sup>45</sup> Anan nihi'ambas andeande'ma ukup اساسيمي ma segawa basef mail Buk Baibeli.

<sup>46</sup> Ea' na'ipas na'i,  
 “Fowa' gani amam manda' basef amama mail buk Baibeli ma'i Kraisi nefa' nimanimi sohana noga' ma nimeguf bi'am hi'ilam anona neafe'ma wanomi, notanima no-hafel hi'agif wapoti'. <sup>47</sup> Ama agel anan-inai anona nemaf alupusi ananisi sili' sowalapa basef Jerusalem ea' si'ipasam amam nematawa hiesi hi'ilas sape wambel hiagomai ma seamboma opalefa God nok-wahomasa waf aonai esis sanda'anai. <sup>48</sup> Ipe' pati amamaga amama matagamai ma nambimb pi'ipa amam nematawa hiesi. <sup>49</sup> Ipe' peme! Anom amamaga la'ifimi fowa' Ahalome na'iam endilisi na'i niesi'ipami felefele' miefi'imipei. Ipe' pepe la'ela'ef taun anama pefe'ma petaga nemaf anama la'ifimi amama misila'i heven ilifi meafi'mai ipe'.”

### *God nofa' Jisas nalata heven ilif*

<sup>50</sup> Jisas nao'wa esis amam nematawa hiesi safe' sataga felefele'ma Betani ea' nasa'ma lagof malata nofalo'masa nonda'as la'ifis. <sup>51</sup> Anan



ata' nofalo'mas etin, God nagiana nakwaha esis nalata heven ilif. <sup>52</sup> Ea' sanifelana sanda' lotumana ea' sandanifel endilisi sotanima safe' Jerusalem sandanifel la'ela'ef sape. <sup>53</sup> Ea' la'ela'ef sape ipat lu'unai Godi sanda' lotuwanai safela agel ananinai lu'una endilisi.

**BASEF BU<sup>1</sup>WAMI GODI**  
**The New Testament in the Filifita Language (Ilahita**  
**Dialect), East Sepik Province, PAPUA NEW GUINEA**  
**Nupela Testamen long tokples Filifita long Niugini**

copyright © 1998 Wycliffe Bible Translators, Inc.

Language: Filifita (Filifita dialect of Mufian)

Dialect: Filifita or Ilahita

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-18

---

PDF generated using Haiola and XeLaTeX on 3 Mar 2023 from source files dated 9 Oct 2020

042dd872-74b3-5958-88ef-d4db936348e2